


# Djinang Bible



Portions of the Holy Bible in the Djinang language of  
Australia

# Djinang Bible

## Portions of the Holy Bible in the Djinang language of Australia

copyright © 1977-2021 Wycliffe Bible Translators

Language: Djinang

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-07-26

---

PDF generated using Haiola and XeLaTeX on 21 Feb 2024 from source files dated 31 Aug 2023  
b155f5b5-eb2a-5d57-8908-7eacfb349fb3

## Contents

Ngurrununggal bilidjirri . . . . .	1
Luke . . . . .	60
1 John . . . . .	61

## NGURRUNUNGGAL BILIDJIRRI

### *Goddji ngamangamadjili bukmak mala*

<sup>1</sup> Ngurrununggal bilidjirri, bilapilakinjing Goddji ngurr yirrpini ngamangamadjili gurrbi ngirki ga bukmak nami. <sup>2</sup> Ngunukining wirrpmban miri gumbala gurrbi ngirki, ga gar malirdji ngagirrdjini gapi djalkng ga ngunungiri Godngiri waṭi galminyi gapimirrpolit. <sup>3</sup> Nyani God yan kungliban, “Badayaladjirriban!” Girri badayala birraldjinaban, miri gar kambarrdjini. <sup>4</sup> Manngibirri nyani nyangini miri ngunung butalban. Ga manngibirri ga gar malir nyani biliny maltjiliban, nyani rarrmali nyani rarrmali. <sup>5</sup> Nyani Goddji biliny bultjidjini Manngibirri ga Malir. Mir bindjinaban balnggidjini ga milwartjini, yuwardjakinim wurpm yakirri.

<sup>6</sup> Manymak, nyani wanginiban, “Gapi irr rindigban, mir rarrmalipm bil djirridji, wurpm irr bilibiligidjigi nguymirri ga wurpitji gilitjiligi nammirri, marrga banim irr djamadjigi miral garrkuluk.” <sup>7</sup> Mir nyani bindjin, girr gapi inydi rindingiliban. Ga Goddji biliny garrwurdjili gapi rarrmali rarrmalipm, mir wurpmi rarrmalipm djarrinyi djili gurrbi munganmirri, ga wurpu nammirri djarrinyi rarrmalipm, ga banimi miral garrkuluk dja'djarrynibar. <sup>8</sup> Ga mir ngunu miral nyani bultjidjini Ginimbirri. Mir bindjinaban balnggidjini ga milwartjini, bingili yakirri inydi malimdjiliban.

<sup>9</sup> Manymak, nyani wanginiban, “Ngunu gapi nguymirri irr rirrbigi yilitjigi wurpbirimili marrga gurrbi bandany irr nyangi.” Mir bindjin, girri gurrbi bandany birraldjinaban. <sup>10</sup> Gurrbi bandany nyani bultjidjini Munatja, gapi djalkng nyani bultjidjini Wulan. Nyani milngili nyangini, girri marrkapdjiliban. <sup>11</sup> Girr nyani yan kungili “Lidji djurriguw kiruwban mir minitjigining mala, bubalkining djalwaligining mala galinmi minitji nambidi walimirri, djurriguwban.” Mir nyani bindjini, girri wali birraldjinaban. <sup>12</sup> Munatjangir djin djurrginy kirinyban wurpi wurpi mala miri yurryarr, gurrtpi, ga wali mala bubalkining nyim nyim kunyirri minitjigining mala ga bubalkining djunggi djalwaligining. Nyani nyanginiban mir bukmak butaldjinaban. <sup>13</sup> Mir bindjinaban balnggidjini ga milwartjini, yakirri warrangguwili inydi malimdjiliban.

<sup>14</sup> Manymak, nyani God wanginiban, “Walirr, rangu, ga kata irr ngamangamadjigi nam irr yirrpigi, marrga djanī milmildjigi nguli, ga djin yingarraydjigi wurpi wurpi bilidjirri, miri yakirri bilidjirri ga rarranydjarr bilidjirri, bilapilang. <sup>15</sup> Ga gurrbili munatjali djin milmildjigi. Nyani bindjini, girri guditjimarr mala djin birraldjinaban. <sup>16-17</sup> Ga ngunupili badayala mirrpili, miri ngunung bingili wana mirrpili, nyani biliny ngamangamadjili walirr ga rangu. Mir manngibirri bilidjirri ngunukuma walirr miri bunggawa nyani djirridji giri walirr gurrpigi, ga ngunukuma rangu bintji giri ngurrguma malir gurrpigi. Ga ngunukining bilidjirri Goddji djamadjili gata mala girri. <sup>18-19</sup> Mir bilapilang nyani biliny yirrpini namili, marrga bil milmildjigi bapili, ga bilang badayala, ngunung bil rindigi gar malirngiri. Manymak, nyani Goddji nyanginiban mir bukmak butaldjinaban. Mir bindjinaban balnggidjini ga milwartjini, bingili ga bingili yakirri inydi malimdjiliban.

<sup>20</sup> Manymak, nyani wanginiban, “Galbi wanngi mala irr ngamangamadjigi, gapimirri djin nyinidji giri, ga waykining mala irr ngamangamadjigi

girri, djin ḥunydjirri giri ḥamnammirrpm.” Mir nyani bindjini, girri gapibi mala ga waykiṇing mala djin birraldjiniban. <sup>21</sup> Mir nyani ngamangamadjili maypal wana wulanbi, ga wurpi wurpi mala walim girim mala gapibi, ga wurpi wurpi mala waykiṇing girrgima. Nyani nyanginiban mir bukmak butaldjiniban. <sup>22</sup> Girr nyani yabulu djina wangini, “Yuwardjingpilinginyi lidji djamadjigi inydji lidji galbidji kiri, wulanmirrpm lidji garrwurdji kiri, ga ngilidji waykiṇing mala lidji galbidji kiri gurrbi munganmirri.” <sup>23</sup> Mir bindjiniban balnggidjini ga milwartjini, gumbirri wurpingirpm yakirri inydji malimdjilaban.

<sup>24</sup> Manymak, nyani wanginiban, “Wurpi wanngi mala irr ngamangamadjigibar mir djin gukirridji giri gurbi munganmirri, irr ngamangamadjigi wurpi wurpi mala maypal mala, mir buluki mala, walim girim mala, ga nyim ngunupilang mala.” Mir nyani bindjini, girri maypal mala djin birraldjiniban. <sup>25</sup> Nyani ngamangamadjili wurpi wurpi maypal mala, ga bukmak wurpi wurpi mala walim girim mala. Mir nyani bindjini munatjabu mala ngamangamadjili. Ga nyani djiny nyanginiban, ga djina marrkapdjlilaban.

<sup>26</sup> Girr nyani wangini, “Yulban ngilimi lim ngamangamadjigi mir ngilimibipm, ga nyani yul djina ngurrdawalangudjidi guyipilin-girgi waykiṇingirgi maypalpilingirgi ga bukmakigi walinyirakiniringirgi.”

<sup>27</sup> Marrga yul nyani Goddji ngamangamadjili mir nyanibipm, mir nyani ngamangamadjili yulnginyi marri djayał mir miligidjinginyi, gumbirr nganggining ga gumbirr ganigining biliny djamadjili. <sup>28</sup> Nyani bumir yilimbirring bilingga wanginiban, “Mala nyim pung kiri nyim galbidji kiri ga barrkirrdjidi wurpili wurpili djawalili. Bukmak mala djiny nyim djanadjanadjigi, mir maypalpilingirgi munatjabu ga waykiṇingirgi nampi ga guyipilin-girgi gapibi djina nyim ngurrdawalangudjidi.” <sup>29</sup> Girri nyani wangini yiligma, “Mir nyim nyawi, Ngarri nyirr kumban bupalikining wali ngambulgining ga bupalikining djunggi djalwaligining gatjimmi, ngunitjini mala dja'djarri mala djalwaligining nyim dirradjigi.” <sup>30</sup> Ga maypalpilingirgi munatjabu waykiṇingirgi ga bukmak walinyirakiniringirgi mala djiny irr gung yurryarr wali.” Mir bilapilang wurpi wurpi walipili nyani yirrpinan djina, yulgi ga maypalgi. <sup>31</sup> Nyani nyanginiban ngunung miri ngamangamadjili djina, girri marrkapdjlilaban mirrpmban. Mir bindjini balnggidjini ga milwartjini, gumbirr wurpingirpm ga nyani wurpm yakirri inydji malimdjilaban.

## 2

<sup>1-2</sup> Mir bilapilang nyani malimdjili bukmak mala. Ga wurpili yakirrdji mir ingki ngamangamadjnyir, ngunung gumbirr wurpingirpm ga biling bingili yakirri, ngunukining bilidjirri nyani gandi inydji galdirrdjiniban djamangiri. <sup>3</sup> Djini'djining malir nyani bultjidjini djuyu walirr, gima ngunukiningban guldjili nyangang djamangiri. <sup>4</sup> Bilapilang nampi ga gurrbibi djanguny mir nyalikidjny djamadjili.

### Djanguny miri nyalikidjny Goddji djamadjili yul ga miyilk

<sup>5</sup> Ngunukining bilidjirri nyadji Goddji djamadjili gurrbi ngirki ga nami, yarim wirrppm djunggi ga yurryarr djirrinir, wirrppm djurriginyir kirinyir, gima wirr yanginyir mayurrik munatjali. Ga wirrppm yul nyininyir, marrga ingki wari ngunupilang gaminir miri wali yirrpinis gima ganbapm, <sup>6</sup> mir yirrim munatjangir nambidjingir gapi buwalbuwaldjny kiriny gurrbi mungan gapiriny djarrinyi. <sup>7</sup> Ngunukining Goddji ngamangamadjili

yul ngurrudawalangu, mir munatja marrngili marrga munatjabu djamadjilaban yulnginyi, girri wupwupdjili ngurrimirrpum marrga nyani ngalwartjingini kirinyban. Mir bindjini ngunung yul ngalwartjinakinining.

<sup>8</sup> Girri Goddji wali ngamangamadjili, girri lamudjili bumir djimurrungir, ngunung gurrbi bultjidjini Idin (Eden), nguli nyani yirryirrpini yulnginyi.

<sup>9</sup> Ga djurriginy kiriny djunggi garay ga manymak dirradjnyirbi. Ga bingili gurrtji nyani djamadjili, yagirri bilingga miri Djunggi Wanngi Gunyirbi ngunung budjirrmintu dja'djarri, ga wurpi djunggi dja'djarri yagirri ngunugirki Djunggi Marnggi Gunyirbi Ngungirapibi Buṭalbi ga Mirkngibi.

<sup>10</sup> Mir nguli gapi buwalbuwaldjny kirinyi balangawdjili girri wurpili wurpili mani bipini biling bingili ga biling bingili mani. <sup>11-12</sup> Wurpm mani djin bultjidjini Pidjun (Pishon), ngunung mani wiltjnyi wiltjnyiring djawalmirrpum Abilamirrpum (Havilah) wirrwirrdjny kirinyi, mir nguli djin gamirrdjini djimuku munatjabu miri gold, ga nguli djin marrnyi giriny laytu mala miri rirrkiyan butal nyanyirbi ga galanyan butal nyuminirbi. <sup>13</sup> Ga wurpi mani djin bultjidjini Guyun (Gihon), ga djining wirrwirrdjny kirinyi djawalmirrpum Kutjmirrpum (Cush). <sup>14</sup> Wurpi mani djin bultjidjini Tigris, djining wirrwirrdjny kirinyi djimurrului Atjurli (Asshur) gurrbili. Ga wurpi mani djin bultjidjini Yupperatis (Euphrates).

<sup>15</sup> Manymak, Goddji gangili yulnginyi, girri yirryirrpini gatnimirri Idin miri nyani yul lamudjigi wali ga djagadjigi gatni. <sup>16</sup> Ga nyani God inga wangini yulgi, "Mir nyuni dirradjigi wali bupalikininingi gurrtjibi, <sup>17</sup> bil mir wurpm gurrtji dja'djarri djiligmia, ingki nyuni dirradjigi ngungirapibi, mir ngunung Djunggi Marnggi Gunyirbi Ngungirpibi Butalbi ga Mirkngibi, mir ngunung nyuni gubidji. Ngunubilang nyuni dirradjigi ngungirapibi, mir warray nyuni balidji ngunyili yipi."

<sup>18</sup> Manymak, girri gungi inydi wangini, "Mir ingki djining butal mir yul ngidawa nyi'nyinidji giri. Ngarri ingarr djamadjigaban balpirginin."

<sup>19</sup> Marrga nyani Goddji djamadjili wanngi mala munatjadji, mir wurpi wurpi mala maypal mala ga waykining mala, girri inga birrungili yulgi ga nyantja yuldjii yagirri djiny yirrpini kirinyi rarrimali pilm. Mir nyani djiny yagirri yirrpini minydjin djirridjipm yagirri djini. <sup>20</sup> Mir yuldji yagirri djiny gungili bukmaknignyi waykinninginyi ga maypalpilinginyi, bil ingki inga manyayir balpirginin inga.

<sup>21</sup> Marrga Goddji yakkirri galwupini yulnginyi, lunbu darrarrmiyngili ga biliwurrwarr gayplibaban wurpmi. Girri djidji inga miylibili marrga galngi bulanggitdjiliban. <sup>22</sup> Biliwurrwarr bat, miyilkban nyani djamadjili Goddji ngungirapibi ngirkibi yilyilmiyngili yulngiri, girri inga birrungili yulgi. <sup>23</sup> Ga nyani yul wanginiban bindjiniban, "Djinimi mir ngirkib ngirkib ngirrapibi, ga munydjil munydjalpi ngirrapibi, marrga djinim ngarri bultjigi Miyilk gima nyuni gaypili galngibi yulangpibi."

<sup>24</sup> Mir bilapilang rum djiningi minydjii djirridjipm ban limila, mir wari ngunupilang yul djiny gubidji nyannang gunydjirri ga ngambirri, girri miyilk nyanngapibi galiki marrga gididjirrim bil nyinidji giri, mir wurpilipm galngi bil nyinidji giri ngingipingim ga nyanimngim bil wurpilipmdjidjiban.

### *Yul ga miyilk bil butjir djumilidjini Godki*

<sup>25</sup> Manymak, ngunu yul ga miyilk biling bil girinyi gar gurriyili, bil ingki inydi bil gunidjnyir inydi bili.

**3**

<sup>1</sup> Manymak, Goddji djamadjili nyibi maypalpili ginginyakin, bil nyani minarr mani wanginyakin, mirppm. Nyani minarr inga wangini miyilkigi, "God nyimila yan gungili mir ingki nyim dirradjigi bupalikin, ngunung liny dirradjigi gurrribi bupalikin, ngungirapib, dja'djarri banimi mir ngunugiriny girri ingki liny dirradjigi ngungirapib, gima nyani God linya wangini 'Ingki nyim dirradjigi ngungirapib, ga ingki nyim gatjigi ngunugirinyi bintji nyim balidji.' "<sup>4</sup> Bil ngunung minarr inga wanginiban, "Ingki nyum balidji. <sup>5</sup> Mir birral God marnnggi mir nyadji ngunupilang nyim dirradjigi, ganydjirrdjipm marrga mil inydjim lapmiygi marrga mirkng malagi ga manymak malagi nyim marnnggi, marrga nyumib ga nyani nyim inydjilidji djjirridjiban."

<sup>6</sup> Manymak. Nguni miyilkdj nyangini wali butal dirradjnyirbi djungimirri wirardjingin, ga ngunu waligi nguy djalngdjin, ga nyani gingga mir nguni walidji gadamadjigi, marrga nyani butnyirdjili ngunuguma djalwali girri dirradjiliban, yili rindingili ga inga birlungili nginipingirgimi ga nyantja dirradjili girrgima. <sup>7</sup> Rirringir ngunungir girri mil inydjil bil lapmiyngili marrga marnngkiningban bili. Girri galngi inydjil bil nyanginiban mir inydjil bil birlaldjnyirdjili gar gurriyili bil girinyi, marrga bumalng mapalpili bil rarri baringili mundandji marrga gar inydjil bil ngagirrdjin.

<sup>8</sup> Djaming yabuludjini bil marrngini God yirryarrdjny kiriny biliny balpariny kirinyi, marrga mururrurmirri inganydjil bil gulgirrdjin. <sup>9</sup> Nyani God inga witjiliban yulgi, "Nyali nyini?" <sup>10</sup> Ga nyani yan bumir gaypili, "Mir ngarri nyirr marrngini mururrurmirrp bi giriny nyininyi marrga inmarr yawngini gima gar gurriyili irr nyininyi marrga inmanydjirr gulgirrdjin." <sup>11</sup> Ga nyantja butjalmi, "Wari ngunung inma wangini miri gar gurriyili nyuni nyi'nyininyi? Bina ngurr dirradjili ngununggirapib, gurrtji budjirrminy gatni dja'djarri mir ngunung nyirr nunggatmiyngili?" <sup>12</sup> "Djini miyilkdj nyuni irra djamadjili nyani nyirr gungili djalwali ngungirapib, gurrtjili girri ngarri dirradjiliban." <sup>13</sup> Girri God inga wangini miyilkigi, "Nyimki miriku nyuni djamadjili mir bindjini?" Ga nyantja wangini, "Djinim minarrtji irra mani wangini marrga irra dirradjiliban."

<sup>14</sup> Girri God inga wangini minarrki, "Gima nyuni mirrp murgungili ngarri nyirr bulu ngurri bukmakngiri maypalpilingir. Budjirrdjipm ban nyuni waliki giri, ga midjirri dirradjili giri bintji giri ngurrguma. <sup>15</sup> Nyuni ga ngunu miyilk inydjim djabir marginidjidi, nyungung mala ga nyanganng mala inydjim djabir marginidjidi gurrkunyi. Djani gungi nyin djin balpigil bil miri nyuni djiny dirradjigi nu bunyan."

<sup>16</sup> Girri miyilkigi inga wangini, "Nyadji ngunupilang nyuni gapalmirrpilidjidi ngunukiningban nyuni galngi djalgidjidi mirrpmban. Miri djalgidjidi kiri nyuni yidjipili mini, bil yirrim inga djalngdjidjipm nginipingirgim inma, ga nyantja ngurrdawalangudjidi inma."

<sup>17</sup> Girri inga wangini yulgi, "Gima nyuni butjir inganydjii gungili nyani miiki ga dirradjili djalwali ngungirapib, djunggibi nyirr nunggatmiyngili, munatja inma mirgidjidjib gima mir nyungupib. Nguy wargugugining nyuni dirradjigi wali munatjabi bintji giri ngurrguma. <sup>18</sup> Ingki galbi wali inma djurri giri, bil yarim galbi djindjinkili inma djurri giriban. <sup>19</sup> Nyuni manbing djamadjigi ngurribidj marrgi wali inma marrgi, yarimipm nyuni winidjji munatjali, gima munatjangir ngarri nyirr djamirrdjini. Miri

nyuni yarim midjirrdjini, marrga ngunyilipm ngarri nyirr wiñidjingilgi midjirrlili."

<sup>20</sup> Manymak, ngunung yul yagirri inga Adam, ga yulđji bultjidjini nyanngang miyilk Yip (Eve) gima nyani ngurrudawalangu ngambirri djina nyininyi bukmakigi yulpiligi. <sup>21</sup> Ga nyani Gunydjirrar bipiñi maypal girri maypaldji gilingkaldji biliny ngagirrdjiniban.

<sup>22</sup> Manymak, Gunydjirri wanginiban, "Ngunung yul miri marnggiban butalbi ga mirkngibi, mir marnggiban mir ngilim. Ngunubilang nyani rindinýirr djalwali ngungirapibi djunggibi ngunung Wanngi Gunyirbi, dirradjnyiri, girri nyani wanngigakinining nyininyirr girinyiri." <sup>23</sup> Marrga Gunydjirrar biliny bulu nguli gatningiri Idinngiri, miri nyani miny-dji yaniliban djawalili wurpili miri nguli bil lamudjigi wali wurpirri gurrbuwi. <sup>24</sup> Rirringir ngunungir girri wugilinginyi nyani yirryirrpini Gunydjirrar, wugili badji nyanyirakinining, ga nyani maltjirri djarrinyi gadjigirring, ga ngurri djarrkut giliwilingi mandjawak gatjini, ga ngunung mandjawak burrtjirrin ydjarrinyi, marrga wirapili djani bilayili minydjin yilitjirridji djunggingir ngidjirrkngiri.

## 4

### *Kayndji minydjii bipini nyanggang gulmigipm*

<sup>1</sup> Manymak, giliwiliñ bil ngurrinyi girri nyani Yip gapalmirrpilidjini. Djamingi yidjipili bungtjili, girri nguni miyilkdji yagirr yirrpini Kayn (Cain) gima nyanibi inyndji wangini, "Goddji irriny gunggatjili miri yul irr marrngili yuwardjing." <sup>2</sup> Ga djamingi yili bungtjili djirrakay, yagirri bil yirrpini Abil (Abel). Kayn ga Abil biling galngi bil wanadjini. Nyani Abil djagadjnyi maypal bimbi mala, ban Kayn nyani lamudjnyi girinyi wali. <sup>3</sup> Guyumban mundjarr inga bil birrungili Godki Gunydjirrgirki. Miri Kayn inga birrungili nyanngapibi djamadjnyirbi wali, <sup>4</sup> ban Abil gultjigining munydjai bimbi inga birrungili, galbi yuwendjingipili. Marrga nyani God marr inga bulanggitdjini Abilgi ga nyanngang mundjarrgi. <sup>5</sup> bil Kaynnyi biri yirrpini ga nyanngang mundjarr biri yirrpini girrgima. Girri Kayn nguy murmurjdjilinan ga bumir nyirryirrdjilinan. <sup>6</sup> Marrga God inga wangini Kayngi, "Nyimki nyuni nguy margindjini, nyimki bumir nyirryirrdjili?" <sup>7</sup> Miri waray ngunubilang gadjigarr butal nyuni bargi, girri nyuni marrkapdjidjibin. Bil ngunubilang nyuni mirgi djamadjigi, nyungung mirgpili galngimirri inma ngu'ngurri nyin wanngi dutjigi miri mirrir. Bil ginginyirbi mirgpili nyuni bilang biri yirrpigi, marrga ngunugirri gadjigarr mirkngi miri ngunung nyuni gubidjibin."

<sup>8</sup> Manymak ngunungir girri Kayn inga wangini gulmingirgipm Abilgi, "Il giruwban ngunyili murrurrtilli." "Ngyi manymak." Biling bil giriny nyininyi murrurrtmirrpm, girri Kayn minydjii bipiniban gulmigipm. <sup>9</sup> Ga guyumban God inga wangini Kayngi, "Nyaling inma gulmigipm Abil?" Nyani yan bumir gaypili, "Ingki irr marnggi! Ingki ingarr djagagining bina?" <sup>10</sup> Girri nyani inga wangini, "Mirikuñu nyuni mirrppm djamadjilinan! Nyuni butjir inyndji guw! Nyungung gulmigirang budi nyuni irra witjim kirimban munatjangir. <sup>11</sup> Miri gumbirrdji nyunguri nyuni bipiñi, marrga nyanggang budi rarri miyngili munatjali, marrga ngarri nyirr bulu ngurriban munatjangir. <sup>12</sup> Miri nyadjii ngunupilang wali nyuni lamudjigi, yarim wirrppm inma djurri giri wali. Yarim miri nyuni mulkuru gu'gukirridji walikban, gurrbi wirrppm inma djirridjibin."

<sup>13</sup> Girri Kayn inga wangini, “Djining bulu ngurriginyirbi irr mini giri djiningi miri biri manbi irra gungan mirrpmi. <sup>14</sup> Miri djini’djining nyuni irriny bulu nguli munatjangir, ga ngarri bilang inmanydjirr gilkilgirrgiban, miri nguy wargugugining mulkuru minydi irr gukirridji walikibani, marrga wili ngunupilangir irriny manyang irriny bungi!” <sup>15</sup> “Ingki birral,” Gunydjirri inga wangini, “bilang wili ngunupilangir nyin bunyiri, ngunuguma ngarritja warray yarti dapilidjnyir mirrpguma.” Rirringir ngunungir girri nyani mak inga yirrpini Kayngi galngimirri, marrga wili ngunupilangir mildji bunyiri, mir ngunung mak djin nyanyiri, girri ingki djin bunyiri nyaninyyi.

<sup>16</sup> Manymak, rirringir ngunungir girri nyani Kayn gubini, ga bilayili giraliban. Nguli gawarrkamirri gukirriny girinyban wurpirri gurrbuw Nud bumir djumurrumirri.

### *Kaynang gurtiginingirang mundan*

<sup>17</sup> Manymak, biling giliwilim bil ngurrinyi Kayn ga nyanimngim inga, girri ngunugirri miyilk gapalmirrpilidjini, yidjipili miniginy kirinyi yagirri Inuk (Enoch). Ga nyani Kayn manyangini gurrbi, girri galbi bala’ mutjpiningili nguli, ga gurrbi wana yagirri yirrpini djining ngurrguma mir nyanggang walkiripm yagirri Inuk. <sup>18</sup> Manymak, Inukang walkiripm Irad, djabiringir ngunungir girri Iradang walkiripm Mayudjayil, djabiringir ngunungir girri Mayudjayil walkiripm Mitjutjayil, ga djabiringir ngunungir girri Mitjutjayilang walkiripm Lamitj. <sup>19</sup> Lamitj biliny marrngili nyanimwilingim bingili biliny galini, wurpm yagirri Ada ga wurpi yagirri Djila. <sup>20</sup> Manymak, bingili yutjuwili bil bungtjili Adangpibi. Mir milimiti bungtjili yagirri Djabal, ga nyani ngurrdawalangu djina yulpilingirgi miri wininimirri djin ngurriny mala ga djagadjny girinyi mala buluki. <sup>21</sup> Ga nyanggang gulmingim yagirri Djabal, nyani ngurrdawalangu djina wuyimbal gatjinakinjing djina malagi, mir nyim ngunupilang djani djin gatjini mir wuyimbal, bilma, manikay, bilapilang. <sup>22</sup> Ban ngunugirri miyilk Djila, nyanggangpibi milimiti yagirri Djabal-Kayn. Ga djini yuldujiri djamaadjny girinyi miri djimuku mala manbing wurpi wurpi. Ga nyanggang gadingjimi yagirri Nama.

<sup>23</sup> Manymak, nyani Lamitj bilingga wangini nyanimwilingirgim, “Ada ga Djila irriny nyim marrngirri yan, butjir irranjdjim guw miri irr djabarrkdjigibani. ‘Miri nyani irriny gatpurrdjili marrga ngarritja irr bulkitj marrngili nyanyi irr bipini, miri yawirrinhynginyi irr bipini gima nyani ngurrum irriny gatpurrdjili. <sup>24</sup> Mir ngunubilang wirinyi Goddji yarti dapilidjigi Kayngi warray, miri mirrppm yili ngarribi irr bintji ngurrguma irr yarti dapilidjigi.’”

<sup>25</sup> Manymak, bilingi Adam ga Yip yili bil ngurrinyi, ga yili nyani gapalmirrpilidjini, ga guyumban yidjipili bungtjili. Ga yagirri yirrpini Sit, djining yagirri mayaligining miri ‘Gumi’ gima nyani Goddji gungili yuwiridjing yidjipili miri ngunung ngurrguma Kayndji bipini. <sup>26</sup> Manymak, Sitang walkiripm bungtjili, ga yagirri yirrpini Inutj. Ga miri Inutj bilidjirri yulpilingir djin ngurr yirrpini miri Godnyi djin butjalmimi girinyi yagirrmirrppm Yawaymirrppm.

<sup>1</sup> Djining djanguny Adamang gurrutigining mundandji. Manymak, baman pир nyadjи Gunydjirrar ngamangamadjili yulnginyi, mir nyaniпibm ngamangamadjili miri God. <sup>2</sup> Bingili nyani djamadjili gumbirr ngangigining ga gumbirr ganigining. Nyani djamadjili, girr yabulu bilingga wanginiban, ga yagirri wana biliny bultjidjini miri Yul.

<sup>3</sup> Manymak. Nyani Adam ngurrum gatjini galbi gunmal ga rarranydjarr (130 years) nyadjи ngunupilang bungtjili walkiripm inga mir nyanibpm, ga yagirri yirrpini Sit, girri nyibi mala gatjini waigurwalgur mala inga galbi, <sup>4-5</sup> ga rirringir ngunungir girri Adam nga'ngalwartjingini kiriny gunmal ga rarranydjarr galbi galbi (800 years) bilidjirri, girri nyani wirrdjinibан.

<sup>6-20</sup> Manymak, nyani Sit walkiri marrngili Inutj, ga Inutj walkiri marrngili Kinan, ga Kinan walkiri marrngili Mayalalil, ga Mayalalil walkiri marrngili Djarid, ga Djarid walkiri marrngili Inuk. Djintiwili yulpili djin nyinintyи djin bininy ngurrguma wanngigakinинг miri Adam, ga djin walkiri djamini galbi djina walguwalgur nyibi mala.

<sup>21-23</sup> Ga Inuk gunmal ga rarranydjarr gatjini galbi, girri walkiri marrngiliban Matjutjila (Methuselah). Ga nyani Inuk walkiri djamirrdjini walguwalgur, ga bininy ngurrguma nyinintyи wanngigakin Ning miri Adam.

<sup>24</sup> Ga nyani Inuk inga maltjili Gunydjirrgirki, ga bil giriny nyininty гиливим, girri Inuk manydjirri gima Gunydjirrar minyddi djamirrdjini.

<sup>25-28</sup> Manymak, Matjutjila walkiri marrngili Lamitj (Lamech), ga Lamitj walkiri marrngili, <sup>29</sup> ga yagirri nyani yirrpini Nuwa. Miri djining yagirri mayaligining miri 'Laydjigi' gima nyani bindjin nyannangangi "Mir Gunydjirrar litja mirgidjnyirdjili munatja, ban djini yidjipilir litjny gung-gatjigi il ngalwartjingilgi djamangir manbingir." <sup>30</sup> Rirringir ngunungir girri Nuwa bungtjili, nyani Lamitj ngalwartjingini kiriny galbi gunmal ga rarranydjarr, girri wirrdjinibан. Ga nyani bininy ngurrguma galbi yutjuwili djiny gatjini. <sup>31</sup> Ga Lamitjang walkiripm Nuwa nyani gatjini galbi galbi gunmal ga rarranydjarr (500 years), girri djiny walkiri djamirrdjini warrangguwilingim, Djim, Yam, ga Djapit, Nuwang walkiriwilingimi.

## 6

### *Bukmak yulpili djin nguy midjirrgindjili*

<sup>1</sup> Manymak. Ngunukiningi Nuwang bilidjirri, yulpilingir djani mala djin buny kiriny galbiwili, marrga yul mala djin nyinintyи kiriny galbi, wurpirri wurpirri gurrbuwi. Ga miyilkpili djani djal malimalingpili mirrppmi.

<sup>2</sup> Manymak. Godang djamaginpilingir wuglipilingir, djiny djin nyangini ngunugirri miyilkpili djal malimalingpili, ga djina djin djalngdjinibан. Marrga miri ngunungi djina djin djalgngny kiriny, djiny djin marriny kirinyban. <sup>3</sup> Girri God Yaway inyddi wanginban, "Ngirrar marrdji ingki djiny irr watjarrdi giri marngiri bintji giri ngurrguma yulpilinginyi. Miri ingki djiny irr namkatdjingil giri yulpilinginyi, gima miri djani yarim djin gaengipili. Ngarri djiny irr gung marri warrangguwili gunmal ga rarranydjarr (120 years) marrga inyddin birrindjingilgi miri gadjigarr djunupa djin gurrgipi."

<sup>4</sup> Manymak, ngnukiningi Nipilim bapurrrr mala djin birraldjini djili gurrbi munganmirri, miri mirrppm гиливипили yulpili. Miri rirringir ngunungir girri Godang djamaginingir wuglipilingir djiny djin djamirrdjini miyilkpili, marrga ngunungiri yidjipilpili djina djin bungtjny kiriny, ngnukiningban djani birraldjinibан ngnukuma Nipilim bapurrrr. Ga rirringir ngunungir girri djin walkiri djamini kiriny yarim yalkuy, ga miri ngunitjini mala djani yagirr wanapili mala bulalkitjpi mala, bilapilang.

<sup>5</sup> Manymak, nyani Gunydjirrar djiny nyangini yulpilinginyi miri djin ginginy girinyi mirkngpili, miri bininy kiriny ngurrguma miri gadjigarr mirkunu djin gurrpini girinyi. <sup>6</sup> Girri nyani djina nguy ginirgindjini gima djani djin gurrpini gadjigarr mirkngi, marrga mîrrpm nyani nguy wargugudjiniban. <sup>7</sup> Ga Yaway inydi wangini, "Gurrbi mungan irr garrkulukdjigi miri yulpili bukmaknginyi irr djingirgiban, mir yul, maypal, walinyakin, ga waykin, djiny irr djingirgi mala bukmak, gima djinarr nguy mirgidjini miri ngurrwakng djiny irr djamadjili." <sup>8</sup> Ban nganngangi ngunung yul Nuwa, nyani God Yaway inga marr bulanggitdjini.

<sup>9-10</sup> Djiningi Nuwang walkirwilingim yagirrpili djini, Djim, Yam, ga Djapit. Ngunukuma yul Nuwa nyani djuburr djunupa nyininy girinyi ngunukiñng nyanngang bilidjirri. Nyani yarti nyanyi girinyi Godnyi, miri djuburr garray girinyi. <sup>11</sup> Ban nyibiwili yulpili djani nguy midjirrginpili milmirri Godar. Miri djili gurrbi munatjamirri bukmak djin nyininy girinyi rumnyirringi butilnyirringi. <sup>12</sup> Ga nyani Gunydjirrar djiny nyanginaban miri nyaliki djin murkuny girinyi gadjigarr djina, gima bukmak yul mala gadjigarr ngurrum djina wildjili.

<sup>13</sup> Manymak, nyani God inga wangini Nuwagi, "Djinimirri irr gingini, bukmak mirgipili djiny irr djingirgiban, gima djanngapibingir djin mirgidjinaban bukmak mala. Marrga ngidjirrkngban djiny irr buwayaknyirdjigban bubalkinchinginyi, miri yulpili ga gurrbi mungan. <sup>14</sup> Nyuni ngurr yirrpigiban djamadjigban mitjyang wana bukulumbak, ga manymakdjigi djunggili manymakdjji. Ga nambidi nyuni mutjpinigi gulmung rarrmalipm, girri galanyindji nyuni ngamirrgi nambidi ga gar gurryili. <sup>15</sup> Miri djinimirri nyuni mutjpinigi ngunung mitjyang. Giliwiling nyuni djamadjigi miri 150 inydi bala ngurri, ga budjirri mal giri 25 inydi bala ngurri, ga namili djining djaka miri gurrtji wurpmi giliwiling. <sup>16</sup> Ga milak yirrpi kiri raymirrppmi ngidjirrkng nami, ga djabigi yirrpigi banim lurrrkinmirri, ga warrnguwili bilibiligili djarrpindjingilgi nambidi. Miri bilapilang nyuni djamadjigi ngunung.

<sup>17</sup> Ban ngirrangi, ngidjirrkngban gapi wana ngarri yani bapili gurbili munatjali, marrga irr buwayaknyirdjigi bubalkinchinginyi ngalwartjikanaking mala, bukmakban irr djingirgi djili gurrbi munganmirri. <sup>18</sup> Bil ngilidjarki ngarri lidjarr yirrpigiban murr randinirbi, marrga lidjny irr wanngidjnyirdjigi, mir warray lidji ragi mitjiyangili, nyunibi, ga nyungung nyanimngim, ga walkirwilingim inma djin ragi, ga walkirgiranguw nyanimwilingim djina djin ragi girri. <sup>19</sup> Ga guyumban wurpi wurpi mala maypal djiny gangban nyunguli ngunyili mitjiyangili, biling bingili biling bingili biliny gang maypal yul ga miyilk giliwilim. <sup>20</sup> Miri wurpi wurpi mala bubalkinching nyuni kurtjigi, waykin, nukining, ga walinyakin, bingili nyunguli bil ragi marrga wanngi bil nyinidji nguli. <sup>21</sup> Ga wali djina lidji kurtjigi rarrmalipm ga ngilidjang girrgima," bindjin God inga wangini Nuwagi. <sup>22</sup> Girri Nuwa butjirgindjinaban, nyani djamadjiliban yarim miri Goddji inga yan kungili.

## 7

### *Nyunan wana bi yulgungili*

<sup>1-3</sup> Manymak, girri Nuwadji djingiringiliban mitjyang miri galbi gunmal ga rarranydjarr djadjuditj (100 years). Ngunukiñngban Gunydjirr inga wangini, "Rawban ngunyili mitjiyangili, nyunibi ga nyungung gurrtigining mala, gima nyunibipm nyininy girinyi djuburr

djunupa. Maypal mala nyuni djiny yagirrgiban, yarang mala ga nunggatmiynyirbi mala maypal djiny yagirrgi, wurpm wurpm nyuni biliñ gangi nunggatmiynyirbi bili, ban bingilipili, miri gumbirr wurpingirpm ga biling bingili nyuni djiny birrugi yarangpili maypilpili, ga yili nyuni bintji ngurrguma waykinningirgi miri galbi nyuni birrugi.<sup>4</sup> Gumbirr wurpingirpm ga biling bingili yakirri bilidjirri ngarri minyndji irr yanibar gapi wana, ga nyani rikidji kiri miri 40dji maliri ga manngibirri bintji ngurrguma, marrga djiningiri munatjangiri bubalikininginyi djiny irr buwayaknyirdjigiban, miri warrpam irr ngamangamadjili ngurrguma.

<sup>5</sup> Girri Nuwa butjirgindjinaban miri God Yaway inga wangini. <sup>6</sup> Nuwa ngurrum gatjidjini gumbirr wurpingirpm ga yili wurpm gunmal ga raranydjarr mundan (600 years) ngunukining bilidjirri ngunung wunggutjulgunguli.

<sup>7-18</sup> Manymak, girri Nuwa ga nyanngang gurrtiginning mala djin ragiliban mitjiyangili nambidili. Girri yilimirri ngunugirri maypal djin rany kiriny mitjiyangili Nuwali. Djin rany kiriny, girri gumbirr wurpingirpm ga biling bingili yakirri djin guldjini ranyirngir, girri Goddji rarri djina minibili ga manbidjnyirdjiliban. Rirrngir ngunungir girri mayurrk wana rikini, ga yuwirdjing dyatjapili muy inyndji bipini galbi galbi, marrga gapi galgalmiyny kiriny ga buwalbuwaldjny kiriny. Miri 40dji yakirrdji rikiny kiriny, gapi buwalbuwaldjny kiriny marrga ngunung mitjiyang gilitjiliny kirinyban. <sup>19-20</sup> Ga nyunan buwalbuwaldjny kiriny marrga ngagirrdjini bukal bubalikiningi ga yili ngunyilatjuy buwalbuwaldjny kiriny. <sup>21-23</sup> Ga bubalikining wanngi mala djin baliniban, miri bukmak waykinning, nukining, walinyakinning, ga yulpili, miri bubalikining djin gukirriny girinyi mala djin buwayakdjinaban. <sup>24</sup> Yarim nyanibi Nuwa wanngi nyininyban, ga nyanngang gurrtiginpili mala nguli mitjiyangmirri. <sup>25</sup> Ga ngunung nyunan miri gumbirr wurpingirpm rangu dja'djarrinyi.

## 8

### Gapi wana munatjangiri wirrpildjini

<sup>1</sup> Manymak, ingkiban Goddji marrbinir Nuwany ga maypilpili nguli nambidi mitjiyangmirri. Wat̄i manbingi galmini djina yanali Goddji, marrga gapi baltjny kirinyban. <sup>2</sup> Ga ngunugirri dyatjapili muy inyndji minibili, ga guldjili mayurrk rikinyirngir. <sup>3-4</sup> Marri djayal gapi ba'paltjny kiriny, marrga wurpm rangu djadjuditj ngunukining mitjiyang inyndji mungan yirrpini bukilmirri yagirri Ararat gurrbuwi. <sup>5</sup> Miri bininy kiriny ngurrguma gapi baltjny kiriny yili warrnguwili rangu girri bukal gungi yulgungiliban.

<sup>6-7</sup> Manymak, Nuwa yili marrkangili rangu wurpm, girri rarri lapmiyngili ga wakwak yaniliban. Ga ngunung wakwak wirrkirrkny walinyi bil wirrpm manyanyir gurribi bandany. <sup>8</sup> Girri wurpi nyani marrngili mukumbul yanali, ga ngunung mukumbul wirrkirrkny walinyi marrga nyangini bilang gapi wirrpildjnyiri. <sup>9</sup> Bil ngunung mukumbul ingki manyanyir burrdjing munatja, marrga wininiban ngunyili mitjiyangili. Nuwa djarrtjirr ngurrrinyini, gatjidjini marrngili girri gangili nambidili. <sup>10</sup> Ga gumbirr wurpingirpm ga biling bingili yili yakirri marrkangili, girri bindjini ngurrguma yanali mukumbul ngunungir mitjiyangir. <sup>11</sup> Ga mukumbul wininiban mitjiyangili walirr bunyin inyndji yirrpini kiriny, rarrdji dirradjili bumalng mapal yuwirdjing. Marrga Nuwa marnggibban miri gapi wirrpildjny kirinyban. <sup>12</sup> Ga gumbirr wurpingirpm ga biling

bingili yakirri yili marrkangili, girri yili yanali mukumbul ga ingkiban yili ngunung bi wiininyir inga Nuwagi.

<sup>13</sup> Ngunukining gapi wirrpildjny kiriny munatjangir nyadji Nuwa ngurrum gatjidjini 601 gunmal ga rarranydjarr. Girri Nuwa gilingkal yilbirtjili namngiri, ga milingiliban bilang gar gurriyilili djin giri, bil nyani nyangini miri munatja bilbalngipm. <sup>14</sup> Ga djani marrkangiliban bingili yili rangu djin nyininy kiriny mitjiyangmirri, girri munatja burrdjidjinibar.

<sup>15</sup> Manymak, munatja manbijini, God inga wangini Nuwagi, <sup>16</sup> “Gar gurriyili minydji yulguban, nyuni ga nyungung gurrti mala. <sup>17</sup> Ga djiny birrugibar ngunuwili maypilpili gar gurriyilili, marrga djani inydjin barrkirrdjidjibar, mala djin bungi marrga djin galbidjidji djili gurrbi munganmirri.” <sup>18</sup> Girri djani djin yulgungiliban, Nuwa, ga nyanngang gurrtiginpili, <sup>19</sup> ga ngunukuma maypilpili, maladji ga maladji djin yulkuny kiriny bubalikining maypal ɻukin̄ingi ga waykiningi minydjin gi’kirinyban.

<sup>20</sup> Manymak, rirringir ngunungir girri Nuwadij gunkurtjnyirdjili rirrkiyan wana, girri yip yiirpinibar Gunydjirrgirki. Girri ngunuwilangan grangpibi yarangbi maypilbi ga waykiningi nyibiwili nyani rindilali, djiny bipini, rirrkiyimirri djiny gilibili, girri djiny burrtjidjinibar marrga bumir gurrbigi Gunydjirrgiriny. <sup>21</sup> Ga ngunungiri ngirimbiy burbdjny kirinyi, marrga Gunydjirrar nyumirrdjinibar ngunungi bunggan yabuludjnyirbi, ga nyani marr dapilidjilibar, marrga nyanibi inydjin wanginibar, “Ingki yili ngunupilang mirgi irr djamadjigi djinarri djanngar mirgidji yulpilngirang. Miri birral bupalikining yul ging girimpim mirkng mala, ngunukiningir yidjipili bilidjirringir ginginyirbi inga yarim mirgidjny girinyi munguyipm, bil ingki yili djiny irr buwayaknyirdjigi yul ga wurpi mala wanngi mala, miri djinimirri ngurrum djiny irr bindjini. <sup>22</sup> Miri bilang djining gurrbi ngirki dji’djarri nyini, lamudjnyirbi bilidjirri ga butnyirdjnyirbi bilidjirri, murmurtnyiring bilidjirri ga min bilidjirri, gunmal ga rarranydjarr, djarribir ga malir, ingki djin guldjigibar warray.”

## 9

### *Goddji murr rangirri Nuwany*

<sup>1</sup> Manymak, Goddji yabulu djina wangini Nuwagi ga walkirwilingirgin, ga djina bindjini, “Mala galbi lidji bungi, mala inydjin lidji galbidji kiri, marrga lidji barrkirrdjidji wurpili wurpili gurrbili. <sup>2</sup> Bupalikining maypal ga waykining djani lidja djin yawngidji giri, ga guyi girrgima, ga gumbirri lidja djiny irr galbuli. <sup>3</sup> Bupalikining maypal wanngi lidji dirradjigi, ngarri lidjny irr gungban bukmak miri ngunung mala lidjny irr gungili ngurrwagi walipili. <sup>4</sup> Bil miri djanggu budigining ingki lidji dirradjigi. <sup>5</sup> Miri bilang wili ngunupilang budilidjny maltjarrkang marrga lidji balidji, girri ngarri ngunugirinyi yarti irr dapilidjigi. Ga ngunubilang maypaldji bungi yulnginyi, irr yarti dapilidjigi girrgima, miri yuldji ngunukuma maypal bintji ngurrgima bungi. <sup>6</sup> Miri bilang wili ngunupilang yulnginyi bungi, wurpilitja yuldji bintji ngurrguma ngungiriny bungi, gima ngarri ngamangamadjili yul miri ngarribipm.” <sup>7</sup> Nyunibar mala bungi marrga yulpili djani mala inydjin ngurri djin galbidjidji. <sup>8-11</sup> Girri Gunydjirri djina wangini, “Djiningi murr randinirbi lidjny irr gungi lidjarr yirryirrpigi, ngilidjang ga djanngang ngunung yulpili djin bungtjigi djadjuditj, ngunyili yipi djirridjipm bintji ngurrguma, ga miri maypilgi, ɻukin̄ingirqi, ga waykiningirqi djiny irr gungi djiniginy murr randinirbi, gam’. Ingki yili

miri ngarri buwayaknyirdjigi maypal ga yul djili gurrbi munganmirri, ingki yili nyunān wurpi irr yani bapili miri lidjny irr djingirigi.

<sup>12-17</sup> Namba irr yirrpi giri nammirri ginimbirrimirri, irr djir'wakdji giri, ga ngunukuma namba nyani minyddji djirridji miri mayaligining ngilidjang, marrga limiliny gungi bilmiygi djining murr randinirbi, bilpilang. Nyadji ngunupilang mangurr bi giri, ga inyddji manymakdji giri djir'wakdji giri, ngarri ngunung irr nyangban, miri ngunung irrin yungigindjigi ngirrang murr randinirbi, marrga ingki yili irr yani nyunān wana miri lidjny bungi. Miri bilapilang irr yirrpigi ngunukuma namba nammirri marrga irr gingidjiban ngilidjangban."

### *Nuwa ga nyanggang walkirwilingim*

<sup>18</sup> Manymak, walkiriwilingim Nuwang djin yulgungili mitjiyangngir Djim, Yam, ga Djapit, ga Yamang walkiripm yagarri Kanan. <sup>19</sup> Djiniwilingir yulpili djin barrkirrdjini bukmak wulpili wurbili gurrbili.

<sup>20</sup> Manymak, nyani Nuwa munatja djamagini. Nyani ngurrdawalangudji miri lamudjili gambilk. <sup>21</sup> Djungapm nyani djamadjili nganatji, dirradjili, girri babakindjinib, miri gar gurriyili ngu'ngurrinyi wininmirri. <sup>22</sup> Ga Yam nyangini gunyddirripm gar gurriyili ngurrinyi, ga wuwuwilingim djiny butjirgindjili. <sup>23</sup> Girri biling Djim ga Djapit mirikal bil marrngili, burrdjipm bil gangili, mungandjipm bil wiñini, girri gari bil ngagirrdjini Nuwang. Ingkaban bil nyanyiri nyanggang gari.

<sup>24</sup> Guyumban Nuwa binyadjini, ripirrdji gubini, ga marnggidjini miri Yam nyangini nyaninyi gunyddirripm gar gurriyili ngu'ngurrinyi. <sup>25</sup> Ga nyani Nuwa yan mayaligining inga wangini Yamgi marrga gunyambi birraldjidi, nyani bindjin, "Djining birraldjidi gunyambi, nyungung walkiripmngirang, nyani ingki djirridji yagirr wana, bil yagirr wiñinidjidi, miri djamagini djina wuwuwilingirgim." <sup>26</sup> Ga yili Nuwa djina wangini walkirwilingirgim, "Lim djaltjibigi Yawaynginyi yagarri, God Miligidji Djimang. Kanan nyani djina djamagini nyibiwiliki. <sup>27</sup> Goddji gurrbi rirrbigi Djapitgi marrga nyani nyinidji giri nyangan Djimngiar wñinmirri, ga Kanan djamagini bilingga."

<sup>28</sup> Manymak, rirrnigiri nyunānngir Nuwa wanngi nyininyi 350 gunmal ga rarranydjarr, <sup>29</sup> miri bukmak gunmal ga rarranydjarr Nuwang 950 gatjidjini, girri nyani wirrdjinib.

## 10

### *Nuwang gurrtinginingirang mala mundan*

<sup>1</sup> Manymak, djining djanguny Nuwang gurrtinginingirang mala mundan. Djim, Djapit, ga Yam, djiniwilitji mala djin buni kirinyi rirringir nyunānngir, ga djining djanguny bultjigi djanngang gadjigarr.

<sup>2</sup> Djining Djapitang gurrtinginingirang mala gadjigarr (ga nyani Djimang gulmingimi). Guma, Maguk, Maday, Djaban, Tubal, Midjik, ga Tiratj, ngunuwili Djapitang walkirwilingim. <sup>3</sup> Ga Gumang walkirwilingim, Atjkinatj, Ripat, ga Tugama. <sup>4</sup> Ga Djabanang walkirwilingim, Yilitja, Tatjtit, Kitim, ga Rudanim. <sup>5</sup> Djinikirang yulpili mala djin barrkirrdjini wulpili wulpili gurrbili mala, ngidjirrkng gapi djalkngmirri djin gurrbidjili, djal dambimirri ga djabir burringi, wurpi wurpi mala yan djin wanginyi.

<sup>6</sup> Djining Yamang gurrtinginingirang mala gadjigarr. Kutj, Yidjipt, Put, ga Kanan. <sup>7</sup> Ga Kutjang walkirwilingim, Djiba, Abila, Djapta, Rama, ga Djaptika, ga Ramang walkirwilingim Djiba ga Didan.

<sup>8</sup> Manymak, wurpi walkiripm Kutjang yagirri Nimrut. Nyani yagirr wana yul, ngurrdawalangu djina wurpi wurpigi malagi. <sup>9</sup> Nyani djambatj mirrpm maypilgi milbimirri Godang Yawayang, marrga yulpili djin wanginy giriny nyangangai djin bininy giriny, "Miri Nimrut, mirrpm djambatj maypilgi milbimirri Godang Yawayang." <sup>10</sup> Warrngguwili gurribi wana nyani mutjpiningili, wurpm Babilun (Babylon), wurpi Yiritj, ga wurpi Yakat, djiniwili gurribi wana djarrinyi gurrbuwi yagirrmirri Djinar (ngunung Iraq djawal). <sup>11-12</sup> Ga ngunungir gurrbingir Djinarngrir yul girali yagirri Atjur. Ga nyani Nimrut mutjpiningili gurribi wanapili djiniwili, Niniba, Riyubutir, Kala, ga Ritjin.

<sup>13</sup> Manymak, Yidjipt nyani gungi bilagaping djina wurpi malagi, miri Ludim mala, Anamim mala, Liyabim mala, Naptuyim mala, <sup>14</sup> Patrutjim mala, Katjiluyim mala, ga Kapturim mala. Ga ngunukuma Kapturim yulpili djanngapibi wurpi mala birraldjili, miri Pilitjayin (Philistines) mala. <sup>15</sup> Ga Kanan walkir marrngili yidjipilpili galbi, yagirrpili Djaydun nyannang milimiti, girri Ngitj, ga wurpiwili. Ngunutjini, mala inydjin bipini miri, wurpi wurpi mala bapurru, yagirrpili <sup>16</sup> Djibutjayit (Jebusites mala), Amurayit (Amorites mala), Girkatjayit, <sup>17</sup> Yibayit (Hivites mala), Arkayit, Djinayit, <sup>18</sup> Arbadayit, Djimaratayit, ga Yamatayit. Ga guyumpiliban Kananang gurrtigining mala inydjin garrwurdjili, <sup>19</sup> marrga ngunungiri gurrbingir Djaydunngir ga djiningiri gurrbingir Gadjangiri rarri gapimirri djin gurrbidjili, ga rarri burringi djin gurrbidjili ngunung yagirrpili gurribipili Djudum, Gumurra, Adma, ga Djibuyim ngidjirrkng Latja gurribi. <sup>20</sup> Ngunitjini girri Yamang gurrtigining mala, miri wurpi wurpi yulpili, wurpi wurpi bapurru, wurpi wurpi yan djin wanginyi, ga wurpirri wurpirri gurrbuw djin nyininyi.

<sup>21-24</sup> Djiningi Djimang gurrtigining gadjigarr. Djimang walkirwilingim yagirrpili, Yilam, Atjur, Arpatjat, Lud, ga Aram. Aramang walkirwilingim yagirrpili, Yutj, Ngul, Gitir, ga Matj. Arpatjat walkir marrngili Djila ga Djila walkir marrngili Yibir. Bilapilang miri Djim nyani gungi bilagaping inga Yibirgi, ga Djim nyani Djapitang wuwngimi. <sup>25</sup> Manymak, Yibir walkir marrngili yutjuwili bingili Pilik ga Djuktan. Ga Pilik bilidjirri bukmak djin barrkirrdjiniiban. <sup>26</sup> Ga Djuktanang walkirwilingim yagirrpili, Almudat, Djilip, Yatjamabit, Djirar, <sup>27-29</sup> Yaduram, Yutjal, Dikla, Yubal, Abimayil, Djiba, Yupir, Yabila, ga Djabap. <sup>30</sup> Djanngang gurribi djabir burri bumir djimurruli. <sup>31</sup> Ngunitjini girri Djimang gurrtigining mala, miri wurpi wurpi yulpili, wurpi wurpi bapurru, wurpi wurpi yan djin wanginyi, ga wurpirri wurpirri gurrbuw djin nyininyi.

<sup>32</sup> Miri ngunung ngurrguma Nuwang gurrtigining mala, ga nyalinggirapibi djini w提醒papi w提醒papi gurribi. Miri djiningir ngurrdawalangungir yulpili djin barrkirrdjini w提醒pili w提醒pili gurribili rirringir ngunungir girri nyunañngiri, girrban.

## 11

### *Yan wurpi wurpi Godji djiny gungili yulpili*

<sup>1</sup> Manymak, ngurrwakng baman pirr bukmak djin wanginy girinyi wurpm yan ga wurpm djilang. <sup>2</sup> Manymak, nyibi yulpili bi djin girinyi djimurrungir, ga djin birraldjnyirdjili gurribi wayala mirrpm lambirring, girri miri nguliguma djin gurrbidjili gurribi yagirri Djinar. <sup>3</sup> Ga djina djin witjili, "Bi lidji giruwi bapili gurribi, ganamba lim marrgi, lim dutjigi, lim batjigi marrga manbijdjidi. Marrga lim mutjpinigi bala' galbi."

Djin djamadjilaban galbi batjinirbi manbipili, ga ngaditjalidji mulngdji munatjabir (bitumen) djin mapirrdjini, miri bilapilang djin mutjpiningili bala'. <sup>4</sup> Rirringir ngunungir girri djina djin witjili, "Bi lidji giruwban, lim mutjpiningi gurrbi wanaban, ga lim mutjpiningi wurpm bala' gungi giliwili djaydjaying ginimbirrimirri. Yagirri inyджi lim wanadjigiban bintji inyджi lim garrwurdjiji wurpili wurpili gurrbili."

<sup>5</sup> Manymak, God Yaway bi djundjini marrga nyangi ngunung gurrbi wana ga ngunung gungi giliwili miri windi djakululu. <sup>6</sup> Girri Gunydjirri Nampi wanginiban, "Ngunubilang inyджin bumir gurrkung marrga giliwiliim djin djamadjigi nyim ngunupilang djin djalngdjidji, miri bintji ngurrguma djin djamadjigi, gima miri wurpm mala djini ga wurpm yan djin wang girimi. <sup>7</sup> Ma', lim djundidjiban, marrga yan wurpi wurpi djinyi lim gungi, marrga inyджin bumir marrbigi yan." <sup>8</sup> Girri nyani God bi djundjini, ga djiny gungili wurpi wurpi yan, marrga inyдежin garrgarrpiniban yan. Ga nyani djiny garrwurdjili wurpili wurpili gurrbili djin giralibin, ga djani djin guldjilaban bala'ngiri mutjpiningir, miri ingkibin yili djin mutjpiningir bala'. <sup>9</sup> Ngunitjini yulpilingir ngunung gurrbi wana djin bultjini giriny Babil gima ngunung yagirri mayaligining miri 'butjir mal balpinyirbi'. Yarimban nguliguma djani inyдежin garrpini wanginy kirinyban, marrga djin butjir mal balpiny giriny, ga ngunungiri djin barrkirrdjini wurpili wurpili mala gurrbili djin giraли djili gurrbi munganmirri.

### *Djimang gurrтigining gadjigarr ngunyili Abramili*

<sup>10</sup> Manymak, djining Djimang gurrтigining mundan. Djim nyani ngurrum gatjidjini 100 gunmal ga rarranydjarr ngunukining nyani walkir marrngili Arpatjat, bingili gunmal rirringir ngunungir girri nyunangnirri. <sup>11</sup> Rirringir ngunungir girri Arpatjat bungtjili, nyani Djim yili gatjidjini 500 gunmal ga rarranydjarr, ga walgurwalgur gatjidjini galbi. <sup>12-23</sup> Arpatjat nyani walkir marrngili Djila, ga Djila walkir marrngili Yibir, ga Yibir walkir marrngili Pilik, ga Pilik walkir marrngili Riyu, ga Riyu walkir marrngili Djiruk, ga Djiruk walkir marrngili Nayur. Ngunitjini mala yulpilingir djin walkir djamini galbi yidjipilpili, ga miri djin nyininyi wanngi giliwilingakinngi. <sup>24-27</sup> Ga Nayur walkir marrngili Tira, ga ngunukining Tira gatjidjini 70 gunmal ga rarranydjarr nyani ngurrum walkir marrngili warrnguwili walkirwilingim, yagirrpili djina Abram, Nayur, ga Ngaran. Ga Ngaran walkir marrngili Lut. <sup>28</sup> Miri ngunukining bildjirri Tira nyininyi, nyani Ngaran baliniban nyanngarpm gurrbuwi mutjing inga, ngunung gurrbi wana yagirri Ngur nguli ngunung Kaldiyang malang djawal. <sup>29</sup> Abram ga Nayur biling bil marrngili miyilk mirrpili biliny bili nyanimwilingim. Abramang nyanimngim yagirri Saray (Sarai), ga Nayurang nyanimngim yagirri Milka. Milka nyani Ngaranang walkiripm, ga Milkang gadingim yagirri Yitjka. <sup>30</sup> Ga Saray, Abramang nyanimngimi, nyani budjirr yidjipilinyirring.

<sup>31</sup> Manymak, djani djin yilitjini wurpili gurrbili bilay bilayili, Tira, ga nyanngang walkiripm Yipram, ga nyanngang marratjamirringipm Lut, ga Saray Abramang nyanimngim. Djin gubini gurrbingir Ngurngir marrga djin giri bumir djunupa Kananili gurrbili. Bil banimi Yaran gurrbi nguli djin gurrbidjili, giliwiling djin nyininyi nguli. <sup>32</sup> Ga Tira nguliguma balini gurrbuwi Yaran, nyani ngurrum gatjidjini 205 gunmal ga rarranydjarr, girri nyani wirrdjiniban.

## 12

### *God inga bultjidjini Abramgi miri nyani gubidji nyanngang mutjing*

<sup>1</sup> Manymak, ngurrwakng nyani Abram yilitjini gurrbingir nyanngangir mutjingir, nyani God Yaway nyani inga wangini Abramgi, "Djining djawal nyungung gurribi mungan nyuni gubidjiban, ga minyadji giriwban djiningir, ga yilitjirrdji wurpiliban, ngunyili gurribili miri ngarri guyumban nyirr mil-lirrpigi. Ga ngunuwiliny nyungung gunydjirrgirang malany nyuni djiny gubidjiban." <sup>2</sup> Ga ngarri djinimirri inmarr djamadjigi inmarr manymakdjigi gam': nyungupibi ngarri ngamangamadjigi bapururr yuwardjing, ga nyungung mala-punyirbi djani minyadjin nyimidji yagirri-wana mala. Ga ngarri inmarr djakadjigi, ga nyuni yagirr-wanadjidji, marrga nyungupibi galbi yulpili djin marrkapdjidji giri. <sup>3</sup> Ga ngunubilang wirapili inma djin marr-bulanggitdjidji, ngarritjaban bilang djinarr marr-bulanggitdjidji. Ban ngunubilang wirapili inma djin rarri-wangidji, ngarritjaban djinarr rarri-wangidji. Ga gima nyungupibi, bukmakgi bapururrugi malagi djili gurribi-munganmirri nyi'nyini, rum djina djin manymakdjidji.

<sup>4</sup> Manymak, Abram giralibin miri Yaway inga bultjidjini, ga nyani Lut mang maltjili. Nyani Abram ngurrum gatjidjini 75 gunmal ga rarranydjarr ngunukining minyadji yilitjini gurrbingir Yaranngir marrga wurpili djawalili giri. <sup>5</sup> Ga nyani gangili nyanngang nyanimngimi Saray, nyanngang gulmigirang walkiringim Lut, ga bukmak djamaginpili nyani djiny marrngili ngungirapibi gurribibi Yaranbi, ga bukmak girripili nyani gurtjili nguli gurribiwi. Nyani marrngili bubalikining, girri larban djin warrwarrdjny kirinyban walanggarrali, ngunukima djawal Kanan bilay pirr, ga rirringir yakirri galbingir djin yulgungili Kanan. <sup>6</sup> Girri Kananmirrppmi djin gukirriny kirinyban, gima djin djawal-nyany kiriny. Guyumban djin yulgungili nguli gurribiwi Djikim, ngunukima gurribi nyaling gurrtji wana djarrinyi, ga nguliban djin gurrbidjili munganmirri ngunukima djunggimirri.

Manymak, ngunukining bildjirri ngunukima Kanan djawal ingki ganba, bil wurpi wurpi bapururrpili djin nyininy giriny mala Kananmirrppmi, miri Kananayit bapururr, ga wurpipili.

<sup>7</sup> Manymak, God Yaway inganydji mil-lirrpini Abramgi ga inga wanginibar, "Djining djawal djinarr gungi djanki miri nyungung bapururrugi, ngunung mala guyum inyadjin ngurri." Marrga Abramdjyi yip mutjipingilingi rirrkayandji, marrga nammirri inga burrtjirrdji maypal Yawaygi miri mundjarr inga, gima nyani ngulikima inganydji mil-lirrpini. <sup>8</sup> Rirringir ngunungir-kirri nyani yilitjini ngunyili bumirili gurribili, ngidjirrkng Bitil gurribiwi bil ngunyilatjuy bumiril-djimurruli, ga ngulikima nyani winin yirrpini; yarim biling gurrbimirrpili Bitil ga Ngay ray ray inga bil gatjini, ga banim nyani yirrpini winin burringi. Ga nguli nyani rirrkayanpili marrngili, girri yip yirrpini madjirri, girri bumirgindjiliban Gunydjirrgiriny yagirrmirrppm Yawaymirrppm. <sup>9</sup> Ga guyumi nyani yilitjini, ga yirrpili djin girali, ngunung wirrpili djawal bumir-djalatjangili, ngunukima gurribi djin bultjini giriny Nigip (Negeb). Djin ngurriny kiriny djutdjut, Nigip-li djin djundjini kiriny, gima waligi djin miliny kiriny.

### *Abram ga Saray bil nyininyi yalkuy nguli Yidjpt*

<sup>10</sup> Bilapilakinjing bildjirri bubalikining bapururr djin nyininy kiriny ngalbirkibar, gima wirrban mayurrik rikinyir, marrga marri ninini wali djurrginy giriny nambidi djawalmirri Kanan. Marrga nyani Abram yulgungiliban Kananngir, ga djin djundirrdjini djawalili Yidjipt-li, marrga

yalkuy djin nyinidji nguli, gima Kananmirri bukmak yul mala mirrpmban djin baliny giriny maypalgi ga waligi. <sup>11</sup> Ga ngidjirkng Yidjipt djini-guyum ngunyili djin ranyir, nguliban nyani Abram inga wangini nyanimngirgim Saraygi, "Ngarri marnggi miri nyuni mirrppmi djal-malimaling miyilk. <sup>12</sup> Marrga ngunukining ngunitjini Yidjiptmimigi mala nyin djin nyangi, miri djining ngurrgima djin bintji wangidji, 'Ngunung miyilk nyani djining nyanimngim inga!'. Ga ngirrinyban irrinjy djin rani marrga nyin djin djamigi. <sup>13</sup> Butaltja nyuni djina bultjigi miri nyuni ngirrang gadingimi, marrga gima nyungupibi ngarri nyinidji bulanggitj marinyirring, ga wanngipm irr nyinidji giri." <sup>14</sup> Manymak, girri ngunyili djin ragilaban Yidjipt-li. Ga ngunitjini Yidjiptmimigi mala djin nyanginiban miri Saray djal-malimaling mirrppmi. <sup>15</sup> Ga djanngang ngurrdawalangu ngunung yaku-wana yul djin bultjini giriny Paruw (Pharaoh). Manymak, Paruwang djamaginingir maladji djani djin nyangini, ga djanguny djin gangiliban Paruwli Sarayang, ga inga djin wukdjili Saraygi nyanggal Paruwli. Marrga nyani Paruwdjii djina yan-kungiliban miri djin bagiligi Saraynyi, marrga nyani Saray nyinidji giri nyanngar miri nyanimngim inga. Girri djani djin marrngili Saraynyi, ga ngunukima miyilk nyani nyininyban gurribiwi Paruwang, ngunukiningban nyi'nyininyban bala'mirri wanamirri nyanngang. <sup>16</sup> Ga gima nyanngapibi Saraybi, nyani Paruwdjii gumbirrgindjili Abramnyi, yarim galbi mundjarrpili inga gungili, marrga nyani Abramdji ma'marriny kiriny mala mala galbi, yarim nyani gatjini giriny galbi bimbi maypal mala, ga galbi buluki mala, ga galbi dungki mala, ga kamul mala, ga galbi djamaginpili yarim yulpili ga miyilkpili.

<sup>17</sup> Bil Yawaydji nyani mari djina djamadjilaban, miri Paruwgi ga nyanngang gurttiginingirgim, marrga djani burrkburrk wanaban djin marrngili gima nyanimngim inga Paruwdjii gaypili Abramnyi. <sup>18</sup> Girri Paruwdjii nyani yan yanli miri Abram bi balpargi. Ga ngunukining Abram yulgungili, nyani Paruw yan-manbi inga bindjinibar, "Nyawban nyaliki nyuni irra mari-djamadjili, yarim irr rirrkminygindjini gima nyungupibi! Nyimki nyuni ingki irra bultjinir miri Saray nyani nyanimngim inma? <sup>19</sup> Nyimki nyuni irra bindjin, 'Nyani djining ngirrang gadingimi,' marrga irr djamirrdjini ngunukima, bitma burali miyilk? Djinimkima nyungung nyanimngimi, marriwban ga bilayiliban minydji giriw!"

<sup>20</sup> Girri Paruw djina bultjidjini nyanngang djamaginpilingiriny miri djani djiny djin gundjirr-ditigi Abramnyi mala. Girri ngunukirri djamaginpilingir djiny djin badji-nyanginiban, marrga minydjin giraliban, miri Abram, nyanngang nyaningimi, ga nyanngang djamagining mala. Ga Abramdji gangili bukmak girtipili nyani gurtjili nguli Yidjipt gurribiwi.

## 13

### *Abram ga Lut inydi bil garrwurdjili*

<sup>1</sup> Manymak, djani djin yulgungili Yidjipt-ngir, miri Abram, nyanimngim inma Saray, ga bukmak Abramang girtipili, ga Lut. Ga djin wipinibar yirrpili djin walmini ngunyili Nigip-ili djawalili gididjirrim. <sup>2</sup> Yarim ngulikirri Yidjipt gurrbimirri nyani Abram rrupiyagindjini mirrppm, marrga ngunungir-kirri nyani djiny gatjini giriny galbi rrupiya ga nyim ngunupilang maypalpili miri buluki ga bimbi, galbi mala. <sup>3</sup> Ga djin warrwarrdjny kiriny yirrpimirrppm, djin ngurriny kiriny djutjdjutj, girri djin yulgungiliban gurribiwi ngunukima wanim gurribi ngidjirrkng Bitil nyibirri djin gurribidjili biligi, <sup>4</sup> yarim ngunung ngurrgima gurribi nyaling rirrikianpili nyani mutjpiningili ga yip djamadjili Garrawayi ngurrwakngi.

Manymak, rirringir yulgunyirngir nyani inga bumir-witjili Godgi madjirri yagirrimirrpom Yawaymirrpom. <sup>5</sup> Ga nyangangai Lutgi, nyani wurpi miri galbi winin ga djamaginpili ga maypalpili djiny gatjini giriny yarim miri Abramdji.

<sup>6</sup> Manymak, Abram ga Lut biling w提醒您pilpm bil nyinin girinyi, bil ingki galbi yurryarr djurrginyir nguli maypalgi dirradjnyirgi, gima bil gatjini maypal galbi. Marrga matitdjtu bilnga yarim w提醒您pilpm bil nyinin giriny w提醒您pirrim gurrbimirri, <sup>7</sup> gima bilngirang djamaginpili inydjin yimini giriny yurryarrgi, gima ngunukima malamirrpili biling bil djalngdjny giriny yurryarrgi bukmakgi, bil wirr gadjigarr bilingga gima w提醒您pilpili bapurrurrpili djin nyininyi nguli, miri Kananayit bapurrurr ga Piritjayit bapurrurr.

<sup>8</sup> Marrga nyani Abram inga wangini walkiringirgim Lutgi, "Ngili djining gurrutigining ili, ingkiban bilang inydjil yimigi. Manymakta djiny il gulmiygi yiminirngir ngunuwili djamaginpilngiriny ngiltjang. <sup>9</sup> Nyuniban djawal-nyangi, ga nyibiri gurrbigi nyuni djalngdjidji, nyuniban bilang inma rindiligi ngunukima gurrbi. Girri nyuni yilitjirrdji ngirrangir, marrga rarrmili-rarrmalipmban il nyinidji giri. Yarim ngunubilang nyuni yilitjirrdji wingungir, ngarritjaban bilang irr yilitjirrdji djunupangir, ban ngunubilang nyuni yilitjirrdji djunupangir, ngarritjaban bilang wingungir irr giri." <sup>10</sup> Girri nyani Lut milingiliban, ga gurrpulu nyangini miri ngunung djawal djarrinyi ngidjirrkng ngunukima mani djin bultjini giriny Djudun (Jordan). Ga ngunung gurrpulu miri butal mirrpom gima gapi galbi ngurriny giriny nguli, miri ngunung ngurrigma ngunukirri gatni Godangpibi ngurrwagipi, ga miri Yidjipt gurrbiwi. (Ngunupili wana gurrbimirrpili, Djudum ga Gumurra, djarrinyini ngulikima gurrpulumirri, gima ingkipm nyani Goddji bilngiriny malimdjnyir, bidakipm. Yarim bilapilakininy nyani Lut ngunyili yilitjini, butalban ngunung gurrpulu djarrinyipm.) <sup>11</sup> Marrga ngunukima gurrpulu nyani Lutdji inga rindilili nyangangapibi, ga ngunyili yilitjinaban bumir-djimurruli. Miri bilapilang biling Abram ga Lut inydi bil garrwurdjili.

<sup>12</sup> Manymak, rirringir ngunungir-kirri nyani Abram gurrpini giriny nyininy giriny nguli burringi Kanan djawalmirri, ban nyani Lut inydi yirryirrpini gurrpulumirri, yarim nyininy giriny wayalimirri ngidjirrkng ngunuwili wana gurbipili djin djarrinyi gurrpulumirri, ga ngidjirrkng Djudum gurrbiw nyani djiny yirrpini wininpili inga. <sup>13</sup> Bil ngunutjini Djudum-mimigi mala, gadjigarr djina mirikunu mirrpomi, ga Godang rum djin wubirdjny giriny munguy.

<sup>14</sup> Manymak, rirringir nyani Lut yilitjini Abramngir, nyani Yaway inga wanginaban Abramgi, "Nyuni milikiban miri ngunyili lunggurralma ga djalatjangili ga djimurruli ga walirr mungan inydi yirrpiniirl, <sup>15</sup> gima bupalikining gurrbi nyuni nyangi, ngarri djiniwiliny inmarr gungi gurbipili, miri nyungki ga djanki nyungung mala-punyirbi ngildjnyirr gungi djining djawal, ga djani minydi galiki ngunyili yipi. <sup>16</sup> Ga nyungung mala-punyirbi djani djin galbidjidji, bilapilang miri rirrpidi mala djin ngurrinyi munatjamirri; yarim ngunubilang wari ganydjirrgindjidji djiny butjurrudjigi djiniwiliny, nyani girri ganydjirrgindjidji djiny butjurrudjigi nyungung mala-punyirbi, bilapilang. <sup>17</sup> Djirridjiban, ga gukirridjiban djawalmirrpom djiningir ngunungir, gima nyungkiban ngarri inmarr gungiban djining djawal."

<sup>18</sup> Girri nyangang winin Abramdji yilbirtjili ga yilitjini djalatjangili. Ga ngidjirrkng Yibrun (Hebron) nyani inydi yirryirrpini mungan mirri gurtjimirri, ngunukima gurtjipili Mamri'ang ngunung gurrbi-

watangungirang wari nyininy giriny nguli gurbiwi Yibrun. Ga mad-jirri rirrkiyanpili nyani Abrayamdji gurtjili girri yip djuyugining inga mutjipingili Yawaygi.

## 14

### *Mulkurupilingir walanggarrabi djin djamirrdjini Lutnyi*

<sup>1-2</sup> Bilapilakinining bildjirri, yul gamununggumirrpili inyджи bil gurkungili, bil bumir-gamununggudjinibar. Wurpmi mala bi djin girali bilayngir djimurrungir, yarim Yamrapil ngurrdawalangu djina Djinarmimigi malagi, ga Yariyuk ngurrdawalangu djina Yilatjar-mimigi malagi, ga Djidurlayumir ngurrdawalangu djina Yilam-mimigi malagi, ga Tidal ngurrdawalangu djina Guyam-mimigi malagi, yarim bingili ga bingili ngurrdawalangupili ga gulinydjarr djina mala, wurpirrim inyджин ну-gurirkungili marrga djani djin djirridji wurpirrimban, yarim djani miri mulkurupili walanggarrabi. Ban ngunukima wurpitji mala djingirapibi djawalbi djani miri bilapilang gam': Bira ngurrdawalangu djina Djudum-mimigi malagi, ga Birtja ngurrdawalangu djina Gumurramimigi malagi, ga Djinap ngurrdawalangu djina Yatma-mimigi malagi, ga Djimibir ngurrdawalangu djina Djibuyim-mimigi malagi, ga wurpi ngurrdawalangu ngungirapibi gurbiwi Bila-bi ngunukirri gurbiwi Djuwar marri bilay, yarim gumbirr wurpingirpm ngurrdawalangu ga gayitgingin djina mala. <sup>3</sup> Djiniwili 5 ngurrdawalangupili ga djanngang gamununggupili inyджин mutpinginili nguli gurpuлumirri, ngidjirrkng gapimirri djalgimirri ngunun wana ngambul gapi ngurrinyi wayalimirri, ga ngunun wayali djin bultjini giriny Djidim.

<sup>4</sup> Bilapilang miri bilakinining 12 gunmal ga rarranydjarr djin bangiringili, ngunukima ngurrdawalangupilingir djin djamadjiny giriny inga ngungirkı bunggawagi Djidurlayumirgi, bil rirringir wurpingir gunmalngir djani rurruлdji inganydjin yirrpinibar bunggawagi, marrga inga djin butjirdjumilidjny girinyban. <sup>5</sup> Manymak, wurpi gunmal bangiringili, rirringir ngunungir-kirri ngunukirri <sup>4</sup> mulkurupili ngurrdawalangupili djani bi djin girali buniyirli, yarim Djidurlayumir ga wurpiwilitji ga djanngang gamununggu mala, ga djin ragili djawalili Kanan-li. Girri ngulikima djin buni kirinyban, ga galbi yulplingiriny djiny djin barrtjin, marrga wurpi wurpi bapururrpilngiriny djiny djin dimbitjnyirdjili. Yarim djiny djin badirdjili djiniwiliny malany, gam': Ripayim mala nguli gurbiwi Yatjirutjkarnayim, ga wurpiwili girri miri Djutjim mala nguli gurbiwi Yam, ga Yimim mala nguli gurbiwi Djabi-kiriyatjayim, <sup>6</sup> ga Yurayit mala nguli Djiyar gurbiwi ngunung bumiri gurbi ngidjirrkng Yil-paran gurbiwi galimy়mirri yirrpimirri djarriny. <sup>7</sup> Girri bapilakuwa djin wirrkwirrkjdjili ngunyili Yin-mitjpat gurrbili, ngunung gurbi nibi bultjin girimban Kaditj, girri nguli djiny djin djanadjanadjili bukmaknyi Amalikayit malany ga ngunuwiliny Amurayit malany djin nyininy giriny nguli gurbiwi Atjatjuntamar. Miri bilapilang, djin buni kirinyban.

<sup>8-9</sup> Marrga ngunukirri ngurrdawalangu mala Djudumbi, Gumurrahi, Yatmabi, Djibuyimbi, ga Bilabi, djiniwiliji djiny djin mutpinginili djanngang gamununggu malany, girri larban ngurri-wurpmi djin giriny nyininy buniyirli. Guyumi djina djin yulgungili, girri inyджин bumir-balparngilibar, bingili mala yarim <sup>4</sup> ngurrdawalangupili biribiri <sup>5</sup> ngurrdawalangupili mulkurupili.

<sup>10</sup> Miri bilapilang ngulikima Djidim wayalimirri, galbi ngambul ralal ngurriny giriny mire ralal galanyanginинг mulngi munatjabu, mirikunu mirrpmi. Ga ngunuwiltji gamununggupilingir Djudumbi ga Gumurrahi

djani djina djin barrtjidjini mulkurupilingirgi gamununggu malagi, bil inydjin yulili, marrga minydjin nunydjirraliban. Ga ngunupili bunggawamirrpili Djudumbi ga Gumurra-biling bil nunydjirrali ga rungili inyddi bil nguli ngunyili ralalili mirgili, ga wurpiwiltji djin butdili ga bumirili djin walmini irrrikianili. <sup>11</sup> Girri ngunitjini mulkurupilingir djani girripili biliny djin gaypili Djumum-mimigi malany ga Gumurra-mimigi malany, ga djin djamirrdjini bukmaknyi walipiliny ngungirapibi gurrbimirrpilibi, ga djiny djin djamirrdjini girri yulpilingirinyi, girri warrpam minydjny djin gangiliban. <sup>12</sup> Ga djin djamirrdjini Lutnyi Abramang gulmigirang walkiringimi, ga warrpamnyi miri nyanganng girripili ga yulpili girrgima djiny djin djamirrdjini, gima nyani Lut ngurriny giriny nguli nambidi Djudum gurrbimirri.

<sup>13</sup> Manymak, wurpilim butnyirakininingir bi inga gangili djanguny Abramgi ngungirkir Yibriw (Hebrew) yulgi, ga ngunukima yuldji manyangini Abramnyi nyininyi munganmirri gurrtjipilimirri, ngunuwili gurrtjipili Mamridji djiny gatjini giriny. Yarim djining yul Mamri nyani miri Amurayit yul, ga nyani miri gurrutiginining bilingga Yitjkulgi ga Anirgi, ga djiniwiltji gurribiwatangupili djani miri namka-djinginakinpili inga Abramgi. <sup>14</sup> Manymak, ngunukining Abramdji marrngini djanguny miri nyaliki djin djamirrdjini nyanganng gurrutiginining Lutnyi, nyani djina witjilinan gamununggu malagi nyanganngpibi, nyabiniwili miri 318 yul mala, yarim ngunuwiltji djin bungtjili ngurrwakng gurrbimirri nyanganng. Girri djani djin marrngili gayitpili, ga ngunukima wurpiwiltji bunggawapili miri Anir, Yitjkul, ga Mamri, djina djin maltjili, ga djanngang gamununggu mala girrgima, girri djiny djin gurrrpiniban. Djin giriny nyininya-a-a, nu djin gurrrpini kirinyban, djiny djin djugadjugamiyngili. Guyumban maliri, djiny djin manyanginaban ngidjirrkng Dan gurribi nyaling gandi inydjin galini kiriny. <sup>15</sup> Girri Abram ga nyanganng yulpili djin barrkirkirdjini, yunganban djin wirrkwirrkjdjili liyuw dap djin balbaldjili djin djudapdjili. Ngidjirringirgir djin yarraramiyngili djin barrtjinban. Ga ngunukirri mulkurupilingiriny nyibi djiny djin bipiniban bil nyibi minydjin nunydjirraliban, ga djani djiny djin gurrrpiniban gamununggudji Abramang giliwiling ngunyili Yubar-li gurrbili, ngunung gurribi bilay pirr djarrinyi ngidjirrkng Damaskus gurribiw bil ngunyilatjuy bumir-lunggurrrmali. <sup>16</sup> Ga nyani Abramdji bubalikininginyi biringirpm djiny gaypili miri bukmak girripili, yidjipilpili, miyilkpili, ga yulpili, ga nyani wanngirngili Lutnyi girrgima, ga warrpamnyi Lutang girripili ga yulpili. Girri bapili-kirri nyani djiny winidjinginiban bukmaknyi gurribilaban.

### *Miltjisidik ngurrdawalangu gurribi Salimbi inga yulgungili Abramgi*

<sup>17</sup> Ngunukining Abram bi winini bunyirngir, ngunung ngurrdawalangu Djudumbi inga bir-kirali Abramgi gurribingir Djudumngir, girri inyddi bil birmirrpilidjili nguli wayalimirri, ngunukima wayali djin bultjini giriny Djabiyy (miri djining yagirri mayali miri 'Bunggawang Wayali'), ga nyani inga bir-bulanggitdjini Abramgi nguli. <sup>18</sup> Ga wurpi ngurrdawalangu Miltjisidik inga bir-kirali Abramgi, ga gurribi inga Salim. Yarim nyani rum-kanyirakinining yul Godang ngunukima Wana Miligidjingirang. Manymak, wali ga nganitji nyani Miltjisidikdji inga birrungili Abramgi miri mundjarrpili inga, girri djiny gungili inga. <sup>19</sup> Girri nyani manymak inga wangini Abramgi, inga bindjin, "Marrkapdjidjiban Abram, God inma djamadjigi inma manymakdjigi, ngunung God miri Ngamangamadjnyirakinining Miligidji gurribigi ga ginimbirrigi. <sup>20</sup> Ga God Wana inga lim wukdjigi nyanki, ngunukima Miligidji wili djiny galwupini ngunuwiliny

mulkurupilngirinyi gumbirrili nyunguli.” Ga Abramdji girripili marrngili, girri 10-bi gandibi nyani butbutnyirdjilaban nyanngang girripili, girri inga gungiliiban Miltjisidikgi wurpmi *gandibi*, bil ngunuwili wurpili 9 gandibi mala nyani djiny galini miri nyanngangpibi.

<sup>21</sup> Girri ngunkima ngurrdawalangu Djudumbi inga wangini Abramgi, “Yarim nyuni irriny gungi ngunuwiliny yulpilngiriny nyuni djiny wann-girngili, bil djinim girripili nyuni galikibin miri nyungungban warrpam-nyi nyuni bi djiny winidjingini.” <sup>22</sup> Bil Abram inga bumir-wubirdjilaban, “Ngarri ngurrwakng ingarr gungili murr-randinirbi Yawaygi, ngunkima Miligidji Wana Ngamangamadjnyirakinng gurrbigi ga ginimbirrigi, <sup>23</sup> miri wirrpm irr gaypigi nyuninyi girripili nyungung, ingkpm wurpmi mundan u djapatjunggi irr marrgi nyungungir, bintji nyuni wangid-jiban, ‘Ngarribipm irr rrupiyagindjili Abramny.’” <sup>24</sup> Yarim wirrban ngirrki. Bil nyim malany ngirrang yulpilingir djin djingiringili bunyir-bimirri, yuwirdjingpili djanki nyuni djina galbungi gumbirrimirri djan-ngar. Ban djanngangi, miri ngunkima yulmirrpili wirapilingir irriny djin namkatdjingini, ngunuwiltji yulmirrpili Anir, Yitkul, ga Mamri, gandi-girripili nyuni djiny gupirr-gungban, inydji ildji rarri-gaypigiban djinim girri mala.”

## 15

### *Goddji inga gungili murr-randinirbi Abramgi marrga guyumi ngunkima murr-randinirbi inydi birraldjnyirdjigi*

<sup>1</sup> Djammingi wurpilim malirdji nyani Abram ngurrinyi nambidi wininjimirri. Ga nyani mabugidjini. Ga Yaway inga wanginban Abramgi ngungirapi mabugibi, nyani inga bindjin, “Abram, yawnginyirring nyuni! Ngarribipm rirrang inmanydjirr galbungi miri nyungung gulurru; ga bayarra inma wanadjidji mirrppmi.” <sup>2</sup> Bil Abramdji bumir-wubirdjili, “Garay Yaway, nyimpi ngirrki nyungung mundjarr mala? Yarim ngarri yidjipilinyirring irr nyini girimiipmban. Bilang irr wirrdjidi, ngunkima yul Yiliyitja ngirrang dapmiynyirbi djamagining ngungirapibi gurbibi Damaskusbi nyaniiban djiny galiki warrpam irra miri girripili ga djam-aginpili. <sup>3</sup> Miri bilapilang gima wirrpm walkiripm nyuni irriny guw giriw, marrga ngunkima dapmiynyirbi yul ngarri marrngili djamadjnyirgi nyani gatj nyinidji bubalikining mala ngirrangi, miri nginbilang rum inbila bultjinmi.” <sup>4</sup> Girri nyani Yaway yan inga bumir-gaypili, “Ingki ngunung yul marrgi bubalikining mala nyungungni; bil birralkima nyungungpibi walkiripm nyanngarki gatj nyinidji bubalikining mala bulanggitj nyungungni.” <sup>5</sup> Ga Goddji nyaniny walmirdjinginban *wininngir*, ga inga bindjin, “Gurrknyaw namili, ga manyaw butjurrujdijibin gata mala. Miri bilapilang mala-punyirbi nyungupibi djani djin galbidjidji miri ngunung ngurrgima mala nammirri.” <sup>6</sup> Girri Abram marr-yirrimkindjiniiban ga inganydji marr-yirrpinaban Yawayli. Marrga gima ngungirapibi marr-yirrimkindjnyirbi nyani Yawaydji nguy inga garrkułukdjili Abramnyi marrga nyani djuburr djunupa yul milbimirri Godar.

<sup>7</sup> Ga madjirri God inga wangini inga bindjin, “Ngarri djining God Yaway, ga ngarri nyirr walmirdjingini ngunungir gurrbingir Wurngir, ngunung Kaldiyang malang djawal, marrga djingiriny djawal Kanan nyirr gungi, ga nyuni galikibin bintji giri ngurrgima.” <sup>8</sup> Bil Abramdji butjalmini, “Garay Yaway, nyaliki ngarri marrnggidjidi miri djinimkima djawal irr gatjigi?” <sup>9</sup> Ga nyani inga bindjin Abramgi, “Ngarri djinipan rum inma yirrpigi marrga guyumban djining murr-randinirbi inmanydji birraldjnyirdjigi

nyungki. Nyuni bidjny gangban ngirrali djingiriny malany gam': wurpm buluki miylk, wurpm nanikut, ga wurpm bimbi yul; djiniwiliny nyuni djiny marrgi yarim warrnguwili gunmalginining maypalpili. Ga madjirri bi biliny gangi waykiningmirrpiliny, miri wurpmi mukumbul ga wurpmi mukandi yuwirdjing." Girri ngunukima mabugi inydji malimdjili, ga nyani Abram binygadjiniban.

<sup>10</sup> Manymak, ngunuwiliny maypalpilngiriny Abramdji djiny marrngiliban, girri djiny djarnigli banimi, miri wirrbi wurpmi ga wirrbi wurpmi. Girri ngunupili wirrbimirrpili nyani biliny galwupini biribiri munatjamirri, miri bingilidji mundandji Abramdji biliny marrngili. Bil ingki nyani biliny djarinyir ngunukima waykiningmirrpili, yarim biribiri biliny galwupini munatjamirri. <sup>11</sup> Girri nyani marrkany kiriny, ga ngunubilang galminyir waykining biliny dirradjnyiri miri gurrtjtjir u damili u bilapilang, Abramdji djiny badji-nyanginaban djiniwiliny maypalngir.

<sup>12</sup> Djampan djini-guyum walirr mungan inydji yirrpini kiriny, nyani Goddji gungili Abramnyi mabugi, girri nyani Abram yawngini ga wurrwurrdjny kiriny. <sup>13</sup> Ga God inga wangini mabugibi, "Ngarri nyirr butjirgindjigiban nyim inydji birraldjnyirdjigi djamingi. Nyungung mala-punyirbi djani djawalili wurpili djin giri mulkurupilingirang, ga nguli ngunuwilji mulkurupilingir djiny djin dapmiyi nyungung malany, ga djiny djin dimbitjnyirdjigi marrga djama matit djina djin gungban. Bilapilang miri wanadjii maridji djiny bargi bilakingin 400 gunmal ga rarranydjarr djina bangirigi. <sup>14</sup> Bil rirringir ngunungir-kirri, ngarri djiny irr yati-wubirdjigi ngungiriny mari-djamacining malany, ngunuwili yulpili wirapiligi nyungung mala-punyirbi djina djin djamadjigi, gunyambipili djinarr gilibigi. Ga rirringir ngunungir-kirri nyungung mala-punyirbi djin yulgungban ngunungir djawalngir, ga girripili galbi minyedjin minibon djanngar, yarim rruipyia galbingakining mala miri, ga djin winidji bapilipm. <sup>15-16</sup> Ngiy, gunmalpili ga rarranydjarrpili miri bingili ga bingili mundan djin bangirigi, ga rirringir ngunungir-kirri djani bapili bi djin winidjibon nyungung mala-punyirbi, gima bilapilakinin bildjirri djinim Amurayit bapurrrurr djin mirgidjidji mirrpmban, marrga ngunukiningban ngarri djiny irr malimdjigi djiniwiliny Amurayit yulpilingiriny marrga djani nyungung mala-punyirbili bilamirri djina djin djamigi ngungirk Amurayit malagi. Bil nyungungi, nyuni mirrrpmi bir-gaypingdjidi magayagining ga marrkapgining, girri nyuni wirrjdjidi ga nyungung gurrutiginpilingir nyin djin djalirgiban." Bilapilang Yaway inga bindjin wangin Abramgi mabugabi.

<sup>17</sup> Manymak, walirr mungan inydji yirrpiniiban, girri gar-malirdjiniban, ga Abram gurrpini kiriny bulkiny kiriny. Girri Abramdji yakirrnyanginiban, miri djunggi ngirimbiyaining ga ngirrtjnyakinining burrtjirrinyi biling bil birraldjiniban, girri bil yilitjinaban banimmirrpum mundanmirrpum ngunupili maypal wirrbi mundanmirrpili. <sup>18</sup> Miri bilapilang Goddji rum inga yirrpini Abramgi, marrga djining murr-randinirbi nyanggapibi Yawaybi nyani inydji birraldjnyirdjigi guyumpiligi. Ga djining ngunukima murr-randinirbi: nyani Yaway inga wangini Abramgi, "Nyunguli mala-punyirbili ngarri djiny irr gungi djingiriny djawal, ngungir maningir Yidjpt-ang ngunyili manili wanali, ngunukima mani djin bultjin girim Yupratis. <sup>19-21</sup> Miri nyungung mala-punyirbi bilamirri djina djin djamigi djiniwiliki bapurrrugi, gam': Kinayit, Kinitjayit, Kadmunayit, Yitayit, Piritjayit, Ripayit, Amurayit, Kananayit, Girkatjayit, ga Djibutjayit,

ga bilapilang; djiniwilang malang gurribipili ngarri djinarr gungi mala-punyirbigi nyungungirgi.

## 16

### *Yagar ga Yitjmayil*

<sup>1-3</sup> Rirringir Abram nyininy giriny ngulikima Kana djawalmirri 10 gunmal ga rarranydjarr, nyananggang nyanimngim Saraydji nyani wirrpk inga miniginyir yidjipili Abramang, bidakipm. Bil nyani Saraydji gatjini wurpmi dapmiynyirbi djamagining miyilk yagirri Yagar, yarim ngunukima miyilk miri ngungirapibi gurribibi Yidjipt-bi. Marrga Saray inga wangini Abramgi, "Miri nyani Yawaydjji yidjipiliny mirrbilali ngirrangir. Ngunukima miyilk bilang nyuni marrgibar, yarim ngirrang djamagining miyilknyi, girri waymirri nyanngar nyuni ngurridjiban. Ga djinimirri bilangi, ngarriban yidjipiliny inmarr birraldjnyirdjigi nyanngamirrpni." Ga Abram yitjdjiniban. Bilapilang nyani Saraydji inga gungili Abrayamgi nyananggang dapmiynyirbi djamagining miyilk, bitma nyanimngim inga bil djamaginingipm.

<sup>4</sup> Girri maliri biling Abram ga Yagar bil ngurrinyini wurpilipm, ga nyani yidjipilakindjiniban. Bil ngunukining nyani djakiy inydi marrngini miri murrbindjini gima yidjipiliny miniginy kiriny, nyani mil-dintjnyi Saraynyi, yarim milbimirri nyanngar ngunukima Saray ngaminydjiniban. <sup>5</sup> Girri nyani Saray mirrpni inga madakarritdjini ga inga bindjin Abramgi, "Djining mil-dintjnyirbi irriny barngili gima nyungupibi! Ngarribipm inmarr galwupim ngunukima miyilk nyungur waymirri, bel ngunukining nyani djiringimmi miri nyani yidjipilakindjirri, ngunungir yipi nyani irriny burrdji ngurrgum girim, ga nyani irriny ging girim bitma ngarri ngaminyi miyilk! Nyani Yaway miri ngiltjang rum-yirrpina ning marrga nyani iltjny gingidji ngunubilang ngarri mirkng u ngunubilang nyunikima! <sup>6</sup> Girri Abram inga bumir-wubirdjili, inga bindjin, "Ngunukima djamagining miyilk nyani gumbirrimirri nyungur, nyuni yati-wubirdjigibar nyaninyi nyalikidjidi nyuni djalngdjidji." Girri nyani Saraydji galngi-bilwirtjili ga marr-mirgidjnyirdjili Yagarnyi, marrga nyani minydji nunydjirralibar.

<sup>7</sup> Manymak, nyani Yagar manydjini, girri Yawaydjji munatjali yanili wurpm wugili djangunygining, marrga nyani birraldjnyirdjigi Yagarnyi. Ga ngungiriny miyilk nyani birraldjnyirdjili yirrpimirri, ngidjirrkng ngambul gapi munganmirri gadjigirring, ngunung gadjigarr ngunyili nunydjirrim girim gurribili Djur-li. <sup>8</sup> Girri nyani butjalmini, "Way Yagar djamagining Sarayang, nyalingir nyuni girali ga nyanydjili nyuni girimban?" Ga Yagar bumir-wubirdjili, "Ngarri nyanngangir nunydjirrali Sarayngir ngirrang bunggawangir." <sup>9</sup> Bil ngunukima wugili Yawayang inga bindjin, "Ingki, bi winiyban nyunguli bunggawali, ga ngunubilang maridji nyin bargi, nyuni bumirpm inydi galbungi ga nyuni gungidjumilidjidi gunyambigi, <sup>10</sup> gima mala-punyirbi nyani Yawaydjji nyin gungi galbi mirrpni, ga ingki wili ngunupilang djiny butjurrudjigi gima galbikima." <sup>11</sup> Ga madjirri inga bindjin ngunukima wugili, "Nyuni yidjipilakindjirri, ga guyumban nyani milimitti bungtjigi, ga nyuni yagirri yirrpigi ngunukima Yitjmayil." (Miri djining yagirri mayali miri 'Goddji marrngini'.) Ga nyani gurrpini wangin inga, "Yarim djining yagirri Yitjmayil nyuni yirrpigi, gima nyani Yawaydjji nyin marrngini bimbi nyungupibi wargugudjnyirbi. <sup>12</sup> Bil ngunukima yul Yitjmayil\* nyani nyinidji

\* **16:12** Djini'djining Yitjmayilang mala lim bultjigi Arabs

giri miri budjirr-wayirrigining miri nganaparra. Yarim bupalikiningirgi nyani mari djina djamadjiri giri, marrga djanitja mari inga djamadjigi giri. Ga nyani rarrmalipm nyinidji giri, ga nyangangipm malagi nyani djina nguy-margindjidji." Inga bindjin ngunung wugili Yagargi.

<sup>13</sup> Miri bilapilang ngunitjini wugilir bi gangli djanguny nyangapibi Yawaybi. Ga ngunukima miyilk Yagar nyani bultjidjini Yawaynyi djining yagirri miri 'Nyuni djining God wili irriny nyangini'<sup>†</sup>, gima nyani inydi wangini, "Ngarribi birralkima Godnyi irr nyangini, ngunukima Miligidji wili irriny nyangini!" <sup>14</sup> Marrga ngunukima ngambul gapi djin bultjini giriny 'Ngambul gapi nyangang Wanngidjnyirakinjingirang wili irriny nyangini'<sup>‡</sup>. Ga ngunung ngambul gapi dja'djarripmban, ngidjirrkng djinipili gurrbimirrpili Kaditj ga Bird bil banimi.

<sup>15</sup> Bilapilang miri nyani Yagardji minali yidjipili Abramang, ga ngunukining nyani bungtjili, Abramdji ngunung yagirri yirrpini Yitjmayil.

<sup>16</sup> Ga Abramdji ngurrum gatjidjini 86 gunmal ga rarranydjarr ngunukining Yitjmayil bungtjili nyangapibi Yagarbi ngunung dapmiynyirbi miyilk Sarayang.

## 17

### *Goddji rum inga yirrpini Abramgi miri gurrulknyi gurmildjigi*

<sup>1</sup> Ngunukining Abramdji gatjidjini 99 gunmal ga rarranydjarr, Yaway inganydji mil-lirrpinanin Abramgi, ga inga bindjin, "Ngarri djining God Ganydjirrgining Mirrppi. Ngirrang rum nyuni yati-nyangi, ga rum-mirginyirring djiirriyi. <sup>2</sup> Ngarri inmarr gungi murr-randinirbi nyungki ngidawa, ga galbi mirrppm nyuni mala-pungi gima ngirrapibi."

<sup>3</sup> Girri Abram inydi nguli munatjali girri ngurri munatjapm ngur-rinyban bilakining God inga wanginy kiriny. <sup>4</sup> Girri God bindjin wangin inga, "Djiniwili ngarri nyirr murr-raniban, gam': nyuni djina djirridji miri gungi-biligaping djina galbigi bapururrsgi. <sup>5</sup> Ga yuwardjing yagirri ngarri nyirr gungban, marrga ingki madjirri nyin djin bultjigi Abram, bil djiningir yipi nyin djin bultjigi Abrayam, gima djining yagirri mayali miri 'Gunydjirri djina galbigi bapururrsgi'. <sup>6</sup> Ga ngarri inmarr gungi galbi walgurwalgur, ga galbi yuwardjing bapururrpili djiny irr ngamangamadjigi nyungupibi, ga wanapili ngurrdawalangupili djanin inydjin ngurri nyungupibi. <sup>7</sup> Ga djining murr-randinirbi djirridji inydi mungbinigi, miri nyungki ga djanki nyungung mala-punyirbi wirapili djin birraldjidji djadjuditj. Djining murr-randinirbi ildja djirridji bintji giri ngurrgima, miri ngarri djining God Miligidji, nyungung ga djanngang nyungung mala-punyirbingirang. <sup>8</sup> Yarim miri bilapilang nyuni nyini kirim djili gurrbimirri Kanan miri mulkuru nyuni, bil ngarri djining nyirr gungi gurrbi Kanan nyungungi marrga nyuni mala-pungi, miri djining djawal nyibirri nyuni nyininy giriny gurrbinyirring, ga nyungung mala-punyirbidji djin galiki djingiriny djawal bintji giri ngurrgima. Ga djanngangi, ngarri djining God Miligidji djinarri." Bilapilang nyani Goddji murr-rangirri Abrayamnyi.

<sup>9</sup> Girri God inga wangini, "Bil nyungungi, djinipan nyungung djama: nyuni rum-katjigi ngirrang, miri nyuni ga nyungung walgurwalgurdji wirapili djin birraldjidji djamingi, bintji giri ngurrgima ngildji rum irraldji gatji giri ngunyili yipi. <sup>10</sup> Ga djinipan ngunukima rum inmarr yirrpigi: bukmaknyi yulpilngiriny nyuni gurmildjigi. Bilapilang ngarri

<sup>†</sup> 16:13 El-roi    <sup>‡</sup> 16:14 Beer-Lahai-Roi

inmarr gungi djingiriny rum, ga djining rum nyuni gatjigiban. <sup>11</sup> Yarim nyuni bupididjigi, miri bilapilang nyuni yirrpigi gurmildjnyirbi djan-gunygining galngili, marrga nguni gurmildjnyirbi irriny gungigindjigi ngirrang murr-randinirbi, bilapilang ngunukima gurmildjnyirbi murr-randinirbingirang dji'djirridji nyungki ga ngirrki. <sup>12-13</sup> Yarim rirringir gurrulk yul bungtjigi yuwirdjing, nyuni marrkang bilakining 8 yakirripili djin bangirigi, girri ngunukima gurrulk nyuni bupididjigiban. Miri djining rum djina djirridji inydji mungbinigi gurrutiginingirgi nyungungungirgi. Yarim warrpamnyi yulpilngiriny nyuni djiny gurmildjigi, miri nyungung mala-punyirbi, ga bubalkinining dapmiynyirbi djamaginiing wirapili djin bungtjili gurrbimirri nyungur, ga bubalkinining dapmiynyirbi yul nyuni djiny bayimdjili mulkurupilingir, bukmaknyi nyuni djiny gurmildjigi. Miri bilapilang ngirrang rum yulg, gurrulkgi ga wanagi, ga ngunukima rum ngarri inmarr yirrpigiban ga ngildji ildji gatji giri ildji bintji giri ngurrgima. <sup>14</sup> Bil ngunubilang wari ngunupilang yul djunggaldjidji, marrga ingki gurmildjnyiri, girri ngunukima yul nyuni butnyirdjigi gurrutiginingirgi girri bungban, gima ngirrang rum nyani wubirdjili." Bilapilang God inga wangini Abrayamgi.

<sup>15</sup> Girri God madjirri inga wangini Abrayamgi, inga bindjin, "Nyan-gangi Saraygi, ingki madjirri nyuni yagirr bultjigi inga miri Saray, gima ngarri yagirr inga yirrpigiban miri Sara.\* <sup>16</sup> Ga ngarri nyanin irr djakad-jigi Sarany, ga nyirr gungi walkiringimi nyanngamirrpni, ga ngunukima yidjipili irr djakadjigi girri. Ngiy, budjirribi Sarabi ngurrdawalangupili ga bapurrrupili inydjin ngurri."

<sup>17</sup> Ga madjirri Abrayam inydji nguli munatjali girri ngurri-munatjapm ngurrginyi, girri djal-gitgitdjili bilakining bindjin gingin, "Ingang! Nyaliki yidjipili irra bungtjigi? Ngarri ngurrum 100 gunmal! Ga nyani Sara ngurrum gatjidjini 90 gunmal, nyaliki marrga nyani irra mini yidjipili?"

<sup>18</sup> Girri Abrayam inga wangini Godgi, "Ngunubilang nyuni djalngdjirri, ngirrang yidjipili Yitjmayil nyuni yitjidjidi marrga nyanngamirrpni nyuni mala-pungi." <sup>19</sup> Bil God bumir-wubirdjili, "Ingki. Bil yirrimi nyungung nyanngamirrpni Saradj nyani inma mini yidjipili, ga nyuni yagirri yirrpigi ngunukima Yisak. Ga ngarri yan irr gatjigi nyanki girri, yarim ngirrang murr-randinirbi djirridji nyanki ga nyanngang mala-punyirbigi, bintji giri ngurrgima. <sup>20</sup> Ga djining wurpi: ngarri nyirr marrngini ngunukining nyuni irriny butjalmini nyanki Yitjmayilgi, marrga nyanin irr gumbirrgindjigi girri. Nyani girri mala-pungi galbi, ga nyanngapibi galngibi 12 ngurrdawalangupili djin birraldjidji, ga nyanngapibi irr ngamangamadjigi bapurrrr wana. <sup>21</sup> Bil nyankigima Yisakgi ngarri ingarr gungli ngirrang murr-randinirbi ga nyanki ngirrang yan ingarr gatjigi munguy, ga ngunukima yidjipili Yisak nyani bungtjigi bilapilakinng bildjirri rirringir wurpi gunmal ga rarranydjarr bangirgi." <sup>22</sup> Girri rirringir nyani God guldjili wanginyirngi inga, nyani manydjinaban.

<sup>23</sup> Girri Abrayam dji marrngiliban walkiringim Yitjmayil, girri gurmildjiliban ngunung ngurrgima manngibirri. Ga nyani djiny marrngili bukmaknyi dapminyirbipili yulpili mala nyanngangi, ngunuwiliny miri djin bungtjili nyanngar gurrbimirri ga ngunuwiliny miri nyani djiny bayimdjili, girri djiniwiltj girri nyani djiny gurmildjiliban, yarim miri God inga bultjidjini.

<sup>24</sup> Yarim Abrayam miri nyani gatjidjini 99 gunmal ngunukining nyani gurmildjini, <sup>25</sup> ga nyani Yitjmayil gatjidjini 13 gunmal ngunukining

\* <sup>17:15</sup> Ngurrdawalangu miyilk

bildjirri. <sup>26-27</sup> Miri bilapilang, mañngi wurpmi djani warrpam djin gurrmildjini, miri Abrayam, nyanngang walkiringimi Yitjmayil, ga buba-likingin dapmiynyirbi yulpili mala, wurpilipmban djin gurrmildjiniban.

## 18

### *Abrayam ga warrnguwili mulkurumirrpili*

<sup>1</sup> Guyumban nyani Yaway inganydji mil-lirrpini Abrayamgi madjiridji. Yarimban Abrayamang winin dja'djarriny ngidjirrkng gurrtjimirri, ngunukima yulang gurrtjipili Mamri'ang. Ga malir-gunyirri nyani Abrayam nyi'nyininy rarrimirri winiñmirri, yarim mañngibirri murmur-djy kirinyban, girri Yaway inganydji mil-lirrpinaban. <sup>2</sup> Ga nyani Abrayam namili milingili, girri djiny nyanginibar yulmirrpili mulkurumirrpili inga djin djarriny ngidjirrkngi, warrnguwilipm. Ga ngunukining djiny nyangini ngunukima mulkurumirrpili, Abrayam inydi waykungili, girri ngunyili djina bir-kirali. Nyani djina yulgungili, girri gupildjini munatjali, <sup>3</sup> ga djina wanginiban bunggawagi inga bindjin, "Bunggawa, djinipan ngarri nyirr butjalmidji: ingkipmban irriny bumir-bangirigi, ngarri djiningi djakagining inma, inmarr bir-bulanggitdjidji. <sup>4</sup> Nyiniyi yalkuy, ga ngarri gapi irr marrgiban ñinini, girri nu inydi ildji rurrtjirrmigi, ga gandi inydi ildji galiki djili bumalngmirri. <sup>5</sup> Ga wurpi irr marrgi, dampa marri ñinini, marrga ildji dirradjigî girri ildji laydjigîban, ga ngunungirkirri manymakban minydji ildji giriban djutdjutj. Ngarri marrkapdjili miri ngildji irriny ildji balparngili gima ngarri djamagining ngildjang irri," bindjin Abrayam. Ga djani djin bumir-wubirdjili, "Ngiy butal, miri nyalikidjini nyuni inbila wangin, nyuni nginbilikiban djakadjigi."

<sup>6</sup> Manymak, nyani Abrayam nunydjirrali wininili, ga inga witjili Saragi, "Gidagidapm nunydjirriw, dampa marriw warrnguwili garrung, yarim mirrpum manymak dampa. Girri dutjigi ga batjigi dampa mala."

<sup>7</sup> Ngunungirkirri nyani gurriyilili nunydjirrali ngunyilipm bulukili malali, girri rindilaliban wurpmi yuwardjing latju dirradjnyirbi. Nyani gumbirrdji gatjidjini, gangili, girri gungilinan yawirrinnyi ngunung djamagining inga. Ga ngunukima yawirrinhydi bipini, djaringili ganydjirrdjipm, girri maypal batjidjinaban. <sup>8</sup> Girri madjirri nyani Abrayam nunydjirrali, ga ngaman marrngilinan nanikutbi. Manymak, nyani gurtjili buba-likingin, girri djina gangilinan mulkurupilingirgi djiningi, miri dampa, buluki djanggu, ga ngaman. Nyani birrungili, galwupini munatjali birbimirri mulkurupilingirgi. Ga djani djin dirradj nyininya-a-a, ga nyani dja'djarrinyi ngidjirrkngi munganmirri djunggimirri.

<sup>9</sup> Djin dirradjili, girri djin butjalminiban, "Nyaling Sara, nyungung nyanimigi?" Ga Abrayam bindjin, "Nambidipm winiñmirri nyi'nyini."

<sup>10</sup> Girri wurpmi mulku bindjini, "Nyani Sara gapalmirrpilidjidi, ga guyumi ngunukining ngarri inmarr winidji bapilipm, nyani Sara djilidjigîban yidjipili yul nyangangpibi," bindjini. Ga ngunukima miyilk butjirmarnggiban gima nyi'nyininy ngulikirri rarrimirri winiñmirri, yarim burrimirri Abrayamar ngidjirrkngipm. <sup>11</sup> Bilapilang miri biling Abrayam ga Sara bil wurrungdjinaban, miri galbi gunmal ga rarranydjarr bil gatjidjini, marrga nyani Sara yirrmirringdjini, miri wirrban yidjipiligi mini, gima ngurrum wulgaman, bilapilang. <sup>12</sup> Marrga Sara nguy inydi gitgitdjili, gima nyani gingini miri, "Nyaliiki yidjipili irr marrgi, gima ngarri yirrmirringban, ga ngirrang nginipingim yirrmirring girri; nyalikibana irr nitjanydjidi yidjipiligi?" <sup>13</sup> Bil nyani Yaway inga wanginban Abrayamgi, "Nyimki Sara gitgitdjili, ga djining wangini miri, 'Bina djining birralkima

djanguny, miri ngarri yidjipilikindjidji? Yarim wulgamanban irri.' <sup>14</sup> Bina djining djama matitipm Yawayg? Birralkima, guyum irr winidji ga nyimila yulgungi, ngunukiningban nyanngang milimiti bungtjigi Sarang!' bindjin Yaway. <sup>15</sup> Bil nyani Sara ingki-pultjiniban, nyani bindjin, "Ingki irr gitgitdjnyir," gima nyani mirrpum inga yawngini. Bil nyani Yaway bumir-wubirdjili, "Ingki, birralkima nyuni gitgitdjilaban."

### *Abrayamdu butjalmini Godnyi ngungirkir gurrbigi Djedumgi*

<sup>16</sup> Manymak, ngunukima mulkurumirrpili inydjin waykungili, inydjin birrindjingini bumiri Djedumili gurrbili, girri larrban. Ga nyani Abrayam yalkuy djina maltjili gima mayaligining nyani. <sup>17</sup> Giliwilim djin giriny nyininya-a-a, girri nyani Yawaydji ginginy kiriny Abrayamnyi, miri bindjin ginginy, "Bina djanguny ingarr gulgirrgi Abrayamgi, bil marri ingarr bultjigi miri nyaliki mari irr djamadjigi djini-guyum?" <sup>18</sup> Ngidjirrkngban nyani mala-pungi, ga nyanngang gurrutigining mala mirrpumi djin galbidjidji, yarim yagirri wana bapurrru minydjin djirridji, ga bukmak bapurrru mala djili gurrbi-munganmirri djani inydjin bulanggitjnyirdjigi nyanngamirrpumi Abrayam-mirrpumi. <sup>19</sup> Ngiy, nyanyi irr butjirigindjigiban gima djinikima yul irr rindiligid marrga nyani djiny marnnggidjigi yidjipilpili nyanngang, marrga ngirrang rum djin gatj nyinidji, miri djunapapm djin giri nyinidji ga djuburr garray djin gurrgipi birraldjipm. Marrga ngarri Yaway ingari birraldjnyirdjigi Abrayamgi ngunukima murr-randinirbi mala ingarr bultjinmi bilimi." Bilaplang miri Yawaydji gungili ginginyi Abrayamnyi. <sup>20</sup> Ngunungir-kirri Yaway inga wanginiban Abrayamgi, nyani bindjin, "Bilngirang miri ngunupili gurrbimirrpili Djedumgi ga Gumurragi, mirikunudji djangunydi irr marrngirrin yirrigi munguypmi, yarim galbi mala djin nguy-murmurdjilaban, gima ngunukima yulpili Djedum ga Gumururramimigi djani mirrpumi djin mirgidjiniban. <sup>21</sup> Marrga ngarri djirrdjirrdjigiban ngunyilipm ga birrkadjigi, marrga irr nyangban ngunubilang birralkima ngunung mirikunu djangunypili irr marrngirrin yirrigi. Marri ingki birral, marri birral, miri djani ngaminypili yul mala; ngarribipm birrkadjigiban marrga irr marnnggidjidi birralgi," bindjin Yaway.

<sup>22</sup> Manymak, ngunupili Yawayang djamaginingmirrpili biling bil ngurglidjini ngunyilipm Djedumili, ban nyani Yaway guldjili ga djarrinyini birbimirri Abrayamar. <sup>23</sup> Girri nyani Abrayam ngidjirrgili girali ga inga bindjiniban, "Bina nyuni bilngiriny malimdjigi ga buwayaknyirdjigi ngunung bingili mala gididjirrim, miri djuburr manymak mala ga djuburr mirkngi mala? <sup>24</sup> Bilang ngulikima miri 50 mirginyirring yulpili nyi'nyini nambidi ngunung gurrbimirri, bina nyuni malimdjigipmban ngunung gurrbi? Miri ngunubilang 50 murgunyirbi-nyirring yulpili nyi'nyini nguli, nyuni gubidjiban djanki, ngangi? <sup>25</sup> Butaltja ngunung mayali nyuni marrbigibinan, gubidjiban bintji manymakpili ga mirgipili biling gididjirrim bil balidji. Djining mirikunu miri nyuni bilngiriny bungi mirkng mala ga manymak mala wurpilipmi. Nyuni inydjin rum-ngurrgiwbani. Miri nyuni djining nginbilang rum-yirrpina kinching bubalikiningirgi bapurrrurgi djili gurrbi-munganmirri nyi'nyini, marrga nyuni yirrimban rum djunupa djina gatjigi djanki, ngangi?" bindjin wangin inga Abrayam. <sup>26</sup> Ga nyani Yaway bumir-wubirdjili, inga bindjin, "Ngunubilang ngarri birraldjnyirdjigi yarim 50 mirginyirring yulpili ngulikima Djedum gurrbiwi, bilang ingkipm wurpum irr bungi ngulikima, bukmak yul mala djiny irr wanngirgi balinyirbingir gima ngungirrapibi djuburr manymakpilingirbi." <sup>27</sup> Girri madjirri nyani Abrayam inga wangin, bindjini, "Djining ngarri

inmarr djarri miri mayalinyirring yul, yarim ngaminyi irri miri midjirri ga girroribili; bil madjirriban nyirr butjalmidji, Garray.<sup>28</sup> Nyabini bilang 45 djuburr manymak yulpili nyi'nyini ngulikima, bina nyuni gurppigi malimdjigi ngunung wana gurribi Djedum, gima ingki galbipm manymak yulpili nyi'nyini girw nguli?" bindjin Abrayam. Ga nyani Garray bumir-wubirdjili, "Ngunubilang 45 manymak yulpili irr birraldjnyirdjigi nguli, ingkiban bilang irr burtjildjigi ngunung gurrbi."<sup>29</sup> Bil nyani Abrayamdi bumir-duwat butjalmini, miri inga bindjinban, "Nyabini bilang 40 manymakpili nyuni birraldjnyirdjigi nguli?" Ga nyani Garray inga bumir-wubirdjili, "Bilang 40-kima, ngarri ingkipm bungban Djedum-mimigi."<sup>30</sup> Ga nyani Abrayam inga bindjin, "Bidak Garray, nyuni marr inydi galbungi ga ngarri giri djutdjut. Nyabini bilang yarim 30 manymakpili nyuni birraldjnyirdjigi nguli?" Bil nyani bumir-wubirdjili Abrayamgi, "Ingkiban ngarri gurribi malimdjigi ngunubilang nguli irr manyangi yarimpim 30 manymakpili."<sup>31</sup> Bil nyani Abrayam bumir-duwat bu'butjalminyi, ga inga bindjini, "Miri mayali mirkng yul irri, yarim madjirripm nyirr butjalmidji, Garray. Nyabini bilang yarim 20 nyuni birraldjnyirdjigi?" Bil nyani inga wanginban, "Bilang ingkiban irr midjirrdjigi."<sup>32</sup> Ga madjirripm nyani Abrayam gurppini, bindjin inga wangini, "Ingkiban nyuni irra madakarritjdjidji bilang bumir-wurpmi madjirri inmarr wangidji ga girriban. Nyabini bilang galbigima wirrapi, bil yarimpim 10 manymakpili?" Bil nyani Garray bumir-wubirdjili, "Ngungirk 10-gi ingkipman irr birruji burtjildjnyirbi ngunyilipm."

<sup>33</sup> Manymak, ngunukining nyani Yaway djingiringili wanginyirngir Abrayamgi, nyaniban minydji giralibar, bil nyani Abrayam bi wiñiniban gurrbili nyanggali.

## 19

### Lut yulgungili gurrbingir Djedumngir

<sup>1</sup> Manymak, ngunukima wugilimirrpili Godang biling bil yulgungili Djedum, ngunung ngurrgima maliri. Ga nyani Lut nyi'nyininyi rarrimirri Djedum gurrbiwi. Nyanngali bil giral, ga Lut biliny nyanginiban inga bil yulgungi; marrga nyani inydi waykungili ga bilingga bir-bulanggitdjini, ga gupildjini munatjali. <sup>2</sup> Girri bilingga bindjin, "Guwa, bunggawamirrpila, nyumi nyim djaypirgi ngunyilipm miri ngirrali bala'li, ga ngulikima nyim ngurridji djini'djining maliri. Ga nu inyddim rurrtjirrmigi, girri yakirriban nyim ngurridji. Ga malir-gunyirri inyddim waykung, girri larrban nyim mukurdjigiban." Bil biling inga bil wangin, "Ingki. Djilipm gar-gurriyili liny ngurridji ngalwirrgimirri."<sup>3</sup> <sup>3</sup> Bil nyani Lut bumir-duwat ga bumir-duwarratj bilngiriny bu'butjalminy kiriny, marrga bil yitijidjiniban ga bil ragilinan bala'li Lutar. Bil nyinini, ga nyani bilingga galngarradjadny kiriny, yarim wali bilingga batjidjini dampa, girri bil dirradjilinan.

<sup>4</sup> Bil ngurrwakngi bil ngurrinyir, yul mala ngungirapibi gurrbibi djani inyddin gurrkungili ngulikima Djedum-mimigi, miri bubalikining yul, miri djalkining, yawirriny ga wanapili, gulukngi wana liyuw dap inga djin gurppini ngunukima bala' Lutang, girri djin djudapdjili. <sup>5</sup> Girri djin waywaydjili Lutnyi, "Way Lut! Nyaling ngunupili yulmirrpili, ngunung bingili nyin bil balparingili djuli? Bapiliban bi biliny birruwi nginbiliki, marrga waymirri nibi ngurridji bilngirar, ga bilnyi nibi lultjigi yulmirrpiliny."<sup>6</sup> Bil nyani Lut rarri lapmiyngili, yulgungili, girri minibili rarri, ga nguli gar-gurriyili inyddin bir-mirrpilidjili, ngidjirrkng rarrimirri

djarrinyi. <sup>7</sup> Nyani djina bindjinban, "Way miyginpila; ingkiban ildji bintjiban djuburr mirkng ildji gatjigi djinimirri! <sup>8</sup> Butjir inydjildji guwi: ngirrang walkiripm, bingili mungimirrpili, ingki yulmirri waymirri bil ngurrinyir ngurrwakng yulpilingirar. Nyabini bilang djinipili bilny ildji gangban, ga nyaliki ildji djal ildji bintji ngurrgima bilngiriny. Bil ingkiban ildji gatjigi ngunupili yulmirrpili bilny irr djakadjimi, gima irra bil gungi-baltjimban miri bilny irr djakadjigi djili," bindjin Lut.

<sup>9</sup> Bil djani inga djin bindjinban, "Burridjipm yilitjirriy!" Ga djanibi inydjin bininy wanginyiban, "Djining yul Lut ingki djingirapibi gurbibisi miri, yarim mulku djinikima, ga biligi ngilimi lim yitjidjini miri nyani nginmilan nyinidji giri; bil djini'djining nyani ging kirimi miri nginmilan raypirridjigi bitma bunggawadjii nginmilang!" Bilapilang miri inga djin gudjirr-mirgidjiniiban Lutgi, ga inga bindjin, "Marri ninini gunyambi nabi djamadjigi bilinggirkil yulmirrpili, bil gunyambi wana nyungki!" Ngunungir-kirri djin bumir-balpariringili Lutnyi ga djin galngi-ngurrginy kirinyban, ga ngidjirrgili djin girali marrga djin wubirdjigi bala' djabiri. <sup>10</sup> Bil ngunukirri yulmirrpilim bil lapmiyngili djabiri, girri gumbirrdji bil gatjidjini Lutnyi ga nambidiiban bil djitingili, girri djabiri bil matidjili. <sup>11</sup> Rirringir ngunungir-kirri djiny bil bipiniban badayaladji wanadji, ngunuwiliny yul malany gar-gurriyili djin djarrinyi; marrga mil-djumilingban djin gu'gukirriny kirinyban, yarimban djin gar-gatjingini giriny djabirigi, bil ingkiban ngunung djin manyaw giriw.

<sup>12</sup> Manymak, ngunungir-kirri biling wugilimirrpilim bil butjalmiinanban Lutnyi, "Wirapili wurpipili nyungupibi malabi djani nyi'nyiniban djlilikima?" Miri gapirri, walkiri, nyim ngunupilang gurruti nyuni djiny butjirgindjigi marrga djin yilitjirridji djiningir gurrbingir; <sup>13</sup> gima ngilinyi djining wana gurrbi djini-guyumban liny burtjildjigi. Miri galbkima gudjirr-mirgidjnyakinan mala inga djin witjny giriny Godgi miri nyani yati-wubirdjigi yul mala djingirapibi gurbibisi, gima rum djina mirikunu mirrpni Djudum-mimigirang. Marrga ngilinyi miri bapili yanginyirbi Yawaybi linyi, marrga djining liny malimdjigaban gurrbi," inga bil bindjin Lutgi. <sup>14</sup> Manymak, ngunung ngurrgima maliri nyani Lut yulgungili bala'ngir ga nunydjirraliban bilngali ngunukima gapirriwilingim wili djamming biliny bil marrgi Lutang walkiriwilingim. Nyani bilingga yulgungili, girri biliny butjir-karrdjiniiban. Nyani bilingga bindjin, "Binygadiyi, nyim djirriyi! Nyim nunydjirriwban djiningir gurrbingir, nyim gubidjiban gidagidapm, gima nyani Yawaydjii djini-guyumban malimdjigi djining gurrbi wana!" Bil biling gapirriwilingim yarim bil nyanyi ngurrinyban ray-yakirringir, bitma nyani bilingga wakal marrngili bil gninginy kiriny, marrga rarri inga bil balini. Marrga gumbalaban nyani bi wiñini gurrbili.

<sup>15</sup> Manymak, milwartjini, ngunukirri wugilimirrpili bil bumir-duwarratjny kiriny djina bil bultjini kiriny, "Nunydjirriw nunydjirriw, bilayiliban nyuni minydjny yilitjiwi nyungung nyaniimngim ga walkiriwilingim, bintji nguni yati-wubirdjnyirbi ildny wingalamiygi marrga ngildji wurpi ildji balidjiban!" <sup>16</sup> Bil nyani Lut bidakipm marrkany kirinyban. Marrga biling wugulimirrpilim gumbirrdji djiny bil gatjidjiniiban, girri djiny bil gundjirr-djitingilaban ngunyilipm gurrpululi; gima nyani Yaway inga mil-yilgidjini Lutgi. <sup>17</sup> Ga rirringir djin yulgungili gurrbingir, ngunukima wugilimirrpili inga bil bindjinban Lutgi, "Nunydjirriwban ganydjirrdjipm bintji ngildji balidji! Bapi inydji ildji nyanyirringi, ga ingkiban ildji guldgigi bupalikinimirri nambidi gurrpulumiiri; burrilaban bumirili ildji nunydjirriw bintji djining yati-

wubirdjnyirbi ildjny bangirigi ga ildjny bargi.” <sup>18</sup> Bil nyani Lut yan bumir-gaypili, “Ingki, bungawa! <sup>19</sup> Ngurrumi nyuni irriny gunggatjili ga irriny wanngirngili. Bina madjirriban nyuni irra mil-bilbaldjidji? Miri ngarri ingki ganydjarrgingin miri irr gatjigi ngunung bumiri mala gima bilay, yarim gunyambi irriny bargi malngiri marrga irr balidjiban. <sup>20</sup> Djinim gurrbi ninini dja'djarri ngunumi marri bilay, manymaktja irr nunydjirriban ngunyilipm gima ngidjirrkngi. Ngunung gurrbi ingki wana bil nininikima. Bina butal ngunyilipm irr nunydjirriban marrga nambidi minydjirr nyinidji wanngipmban nguli?” <sup>21</sup> Ga ngunukima wugili inga bumir-wubirdjili Lutgi, “Ngiy, djingirki mayaligi ngarri yitjidjnyirbi nyirr gungban; ingkibon marrga irr burtjildjigi ngunukima ninini gurrbiwi nyuni irra bultjidjini. <sup>22</sup> Bil nunydjirriwban ganydjirrdjipmban ngunyilipmi, gima wirrpom irr djirrilbigi bala'pili yarimipm nyuni ngulikima yulgungi.” Bilapilang miri djinimirri ngunung ninini gurrbi djampam djin bultjini giriny Djuwar, yarim ngunung yagirri mayali miri ‘Ninini’.

<sup>23</sup> Manymak, walirr djapi yulgunny kiriny ngunukining nyani Lut rany kiriny ngunyili Djuwarli gurrbili, ga yilimirri djanin djin gurrpin kiriny nyanimngim inga ga midipili-mirripili. <sup>24</sup> Ga bilapilakinngi djunggi burrtjirrinngi ga bunggan balinyirakinngi ga'galminy kirinyban namngiri yanginyirbi Yawaybi, ga baringiliban Djudum ga Gumurra. <sup>25</sup> Miri bilapilang Yawaydji djirrilbili ngunupili gurrbimirrpili, ga nyani malimdjili bubalikining: miri gurrbimimigi, ga warrpam wali djurriginy kiriny gurrpulumirri; bukmakban djin wirrdjini ngulikima wayalimirri, djin manydjinaban. <sup>26</sup> Bil ngunukirri miyilk, Lutang nyanimngim yilimirri gurrpini kiriny Lutnyi, nyani murgungiliban; yarim nyani bapi inydi nyangini. Girri namngiri inga galmini rirrkiyanpili miri djalkng rirrkiyan mala djin baringili ngunukima miyilknyi, marrga nyani inydi birrindjinginaban, yarim djalkngdjinaban rirrkiyanndjini inydi mungbiningiliban.

<sup>27</sup> Manymak, ngunung ngurrgima manngibirri, maliri-gunyirri, bapili-guwa nyani Abrayam bi qunydjirrali wiininban ngunyilipm ngunukima bumiri gurrbi nyibirri nyani dja'djarri nyanngar Yawayngirar gadjiri balingili. <sup>28</sup> Nyani yulgungili bukilmirri, girri mildji inydi garrkarrpini gurrbimirrpiligi, bil wirrpom nyanyiri. Ga nyani milingili gurrpulumirrpom, bil wirrpom nya'nyanyiri gurrbii; yarimban ngirimbiy wana burburdjny giriny gima bupalikinmirri ngunung wayali bungbuldjny girinyban, miri ngirimbiy duwarrngir wanangir. <sup>29</sup> Miri bilapilang, nyani Goddji djirrilbili ngunupili gurrbimirrpili nyibirri Lut nyininy giriny. Bil nyani gingini Lutnyi marrga nyaniny yiltjili ngunungir gunyambingir, bintji Abrayam marr-mirgidjidji Lutgi; bilapilang God inga mil-ylgidjini Abrayamgi.

### *Lutang midipilimirrpili bil murgungili*

<sup>30</sup> Manymak, rirringir ngunungir-kirri nyani Lut mirrpmban yawnginy giriny ngulikima gurrbimirri Djuwar nyi'nyininy, marrga ngunungir djin gubini, Lut, ga walkiriwilingim ngunupili mungimirrpili, ga djin walminiban bumirili gurrbili; ga nguli inydi yirryirrpini bumirimirri, yarim namngiri miringmirri djin ngurriny giriny ngidawa bilaypilay yulpilingir. <sup>31</sup> Manymak, ngunung ngurrwagiping mungi inga wangini gaditingirgim, inga bindjin, “Ngiltjang gunydjirri nyani wurrungdjirr kirimban; ga wirrpmban wurpi yul nyi'nyininy giriw djilikima nginmilar, marrga ingki wari ngunupilang yul waymirri iltja ngurridji ngiltjar; yarim ngunukima miri rum bamanpi miyilkigi ga yulgi, bil ngiltjiki wirrban. <sup>32</sup> Ma', gunydjirrgiriny il gu'kung kiri nganitji galbi, marrga nyani

babakindjidji. Ngunungir-kirri maliri, waymirri il ngurridji nyanngar miri minitjingimi, marrga il yidjipilikindjidji nyanngapibi gunydjirrgirapibi ngiltjang, marrga djampiligi ngiltjang mala wanngipm minydjin nyinidji bintji ngurrigma."

<sup>33</sup> Manymak, maliri irriringir galbikima bil gungili nganitji, ngunukima ngurrwagiping midipili ragilaban nyanggali gunydjirrgiralipm, girri bil ngurrinyban. Bil nyani Lut wawu ngurrinyi gima ingki ginginyir nganitjiri, yarim ingkiban djiringinir ngunukining ngunung mungi djundjini ga inydi waykungili djamingi. <sup>34</sup> Milwartjini, ngunung ngurrwagiping midipili inga wanginiban gaditingirgim, "Gu, gadjiri maliri ngarribpm ngurriban gunydjirrgirar; ban djinidjining maliri madjirri girri nganitji il gu'kung kiri, girri nyunitaban ragi ga ngurridjipm nyanggar, marrga il mala-pungi bintji ngiltjang gurrutigining gadjigarr guldjigi."

<sup>35</sup> Marrga djamingi, irriringir nyanyi bil gungili nganitji galbi, ngunukima djuditjing padingimi ragilaban, girri bil ngurrinyban; ga madjirri nyani Lut ingki djiringinir miri ngunukima midipili ngu'ngurriny kiriny nyanggar, yarimban Lut wawu ngurriny kiriny.

<sup>36</sup> Marrga gima ngungirapibi biling wawayka, Lutang walkiriwilingim midipilimirrpili bil yidjipilikindjiniban, gunydjirrgirangipm bilngirang.

<sup>37</sup> Ga ngunung galitjirringirangpibi yidjipili yul bungtjili, ga ngunukima nyani yagirri yirrpini Muwap (Moab); ga djamingi ngunukima yul nyani ngurrdawalangu djina Mawabayit malagi. <sup>38</sup> Ga nguni mirrdjingir miyilkdji marrngili yidjipili yul girri, ga nyani yagirri yirrpini Bin-Amiy; ga ngunukima yul nyani ngurrdawalangu djina Amunayit malagi.

## 20

### *Abrayam, Sara, ga Pilitjayin malang ngurrdawalangu*

<sup>1</sup> Rerringir Goddji malimdjili ngunukima gurrbimirrpili Djudum ga Gumurra, nyani Abrayam minydjii giraliban ngunungir gurribingir, ga ngunyilipm girali Nigipili djawalili bumir-djalatjangili. Ga djani inydjin yirryirrpini ngidjirrkng gurrbimirrpili Kaditj ga Djur, miri Abrayam, Sara, Abrayamang yidjipili Yitjmayil, ga bilngirang djamaginpili, ga maypal mala, bilapilang. Ga guyumi djin yilitjini wurpili gurrbili, ngunukima gurribiwi Girar nyibirri Pilitjayin bapururr nyi'nyininy giriny. Ngulikima giliwiling djin nyininy girinyban. <sup>2</sup> Manymak, ngunukining Abrayam nyininy kiriny nguli, nguni Girarbi yulpilingiri djin nyangini Sara. Bil nyani Abrayam djinanydjii bultjini giriny Sarang, "Djinimkima miyilk nyani djining ngirrang gadingimi." Ga ngunuwiltji Pilitjayin mala djin gangili ngunukima djanguny nyanngali bunggawali, ngunung Pilitjayin ngurrdawalangu nyi'nyininy giriny nguli Girar gurribiwi, yagirri Abimilik. Marrga djamaginpili nyani Abimilikdji djiny yaniliban ngunyili Abrayamang gurrbili, marrga inga djin bagiligi Sarany. Djin yulgungili, girri Sarany djin djimirrdjini, girri bapilipm inga djin birrungiliban Abimilikgi. <sup>3</sup> Bil wurpm maliri, ngunukining Abimilik ngurriny kiriny, nyani yakirr-nyanginiban miri nyani God inga yulgungili ga inga bindjin wanginban, "Djini-guyum nyuni balidjiban, gima ngunukima miyilk nyuni djaminmi miri nyani wurpang yulang nyanimgim!" <sup>4</sup> Bil ngurrwakng, nyani Abimilik ingki waymirri ngurrinyir nyanngar Sarar, yarim ingkipm ngidjirrgili inga girinyir Sarali gima murtjili. Marrga nyani butjalminibar Garaynyi, "Wirr, Garay! Bina butal miri nyuni bungi rummanyamgining yul? Yarim ngarribi miri djuburr djunupa yul; <sup>5</sup> gima ngunukima yul Abrayam miri nyanibpm irra wangi, Djinim miyilk

nyani djiningi ngirrang gadingimi', ga ngunukima miyilk nyanibipm irra bultjinmi, 'Djinim yul nyani djining ngirrang wuwngimi'. Ga ngarri bilinggarr marr-yirrimkindjirri, marrga ngunukima miyilk irr marrimban. Ingkiban gumbirrdji irr murguwi!" <sup>6</sup> Girri God yan inga bumir-gaypili ngungirapibi mabugibi, "Ngiy, ngarri marnngi miri nyuni ingkiban djiringirri miri nyuni murgum kirim. Marrga ngarribipm nyirr way-mirrbilgim marrga nyuni ingki ngurridji nyangan, bintji nyanyini nyuni gatjigi gumbirrdji ga rum wubirdjigaban ngirrang. <sup>7</sup> Bil djunupaban ngunukima miyilk nyuni winidjingilgi nyangan, gima ngunukima yul Abrayam nyani ngunung Godang djabarrkgining, yarim nyani miri bultjinakinin djangunypili Godbi; ga nyani irriny butjalmidji nyungki, ga nyin wanngirgi balinyirbingir. Bil djiningkima nyuni marnggiban, ngunubilang nyuni ingki winidjingilgi Sarany, ngildji yirrimban ildji balidji, miri nyunibi, ga bukmak nyungung mala," inga bindjini God Abimilikgi mabugimirrpni.

<sup>8</sup> Manymak, djadaw, nyani Abimilik inydji waykungili girri guwakuwatjili warppam, nyanganng gurrutiginpili ga nyanganng djamaginpili, girri djiny butjirgindjiliban bubalikining God inga bultjinmi mabugibi. Ga ngunuwiltji djin guway-nirrdjili, ga mirrpmban djin yawnginiban. <sup>9</sup> Marrga Abrayamnyi nyani Abimilik guwadjili, ga inga bindjini, "Nyawan, mari wanaban inbiliny barngilinan gima nyungupibi. Nyim gunyambi inmarr djamadjimi marrga djinimirri nyunibin irra mardi-jamadjimi ngirrki? Gima nyungupibi nyani God inbila madakarritjdjiniban, ngirrki ga ngirrang malagi. Nyuni inbila gar-yulgimi, yarim nyungung djuburr miri mirgidjnyakining ngirrki; gungi inma mirikunu! <sup>10</sup> Nyimpi bilang nyuni bindjirr ngurrgima?" bilapilang, nyani Abimilik yan manbi inga wangini Abrayamgi.

<sup>11</sup> Ga nyani Abrayam yan bumir-gaypili, "Ngarri ginginyi miri, birralkima djiniwili Girarmimigi yulpili ingki djin marnngi Godgi, ga ingki djin marr-bulanggitdjidji rumgi Godang, marrga irriny djin bungi ga ngirrang miyilk djin djamigaban. <sup>12</sup> Bil djining djanguny birralkima miri nyani Sara miri ngirrang gadingimi; gima nyani miri walkiripm inga gunydgirrgirki ngirrang, bil ingki nyani ngirrang ngambirrgirang rambirri, bil wurpang ngambirrgirang. Marrga inydji liny marrngili, ga nyani ngirrang nyanimngimban. <sup>13</sup> Ga gima ngungirapibi, miri biligi, nyadjii Goddji minydji yanili ngirrinyi marrga irr gukirri girim gurrutinyirringi, ngunukiningban ngarri ingarr wanginiban Saragi, "Ngarri djal miri djinimirri nyuni irra marr-bulanggitdjidji: yarim nyibirri nyibirri gurrbiwi il yulgungi, ngulikima nyuni inydji bultjigaban ngirrang, 'Djinimkima yul nyani ngirrang wuwngimi', bilapilang ngurrgima nyuni djina wangiidi." Bilapilang Abrayam inga bindjinban ngungirki yulgi Abimilikgi.

<sup>14</sup> Manymak, nyani Abimilik marrngiliban galbi miri maypal bimbi, bulukipili, ga djamaginpili - yul ga miyilk; girri Abrayamgi djiny gupirrgungiliban. Ga Sarany nyani winidjinginiban girrigima. <sup>15</sup> Girri inga bindjin Abrayamgi, "Djinimpan, ngirrang djawal lapdiliban nyungki: rawban ga nyibirri nyuni djal nguliliban nyuni inydji yirryirrpigi." <sup>16</sup> Girri Saragi inga bindjinban, "Galbi rrupiya ngarri gungban wuwgiriny nyungung, miri 1,000 didipili, miri bilapilang milmaban ngarri djinyirr mil-lirrpigiban warppamnyi miri nyuni rum-manymakgining miyilk." <sup>17</sup> Rirringir ngunungir-kirri nyani Abrayam butjalmi Godnyi, ga nyani Goddji burri-wanngidjnyiirdjiliban ngunukima yul Abimilik, marrga nyani galng-manymakdjinaban. Ga wurpi mala Goddji burri-wanngidjnyiirdjili girri, miri Abimilikang nyanimngim ga djamaginiing miyilkpili; marrga

djamungi djani ganydjarrgindjidji miri budjirrimirri djin mini giri yidjipilpili. <sup>18</sup> Gima ngurrwakngi, ngunukining nyani Abimilikdji djaminmi Sarany, nyani Goddji minipmban yarrpili djina miyilkpilngirang, marrga ingkiban djin gapalmirrpilidjidji; gima nyani Abimilikdji djaminmi Sarany Abrayamang nyanimgim.

## 21

### *Yisak bungtjili*

<sup>1</sup> Ga nyaninyi nyani Yawaydji djakadjili Sarany, miri nyanngapibi Godbi yuwirdjing yidjipili birraldjili, ngunung Goddji murr-rangirri, <sup>2</sup> girri nyani yidjipilikindjinaban ngunukima miyilk Sara, ga guyumi nyanngapibi ngunung yidjipili yul bungtjili, Abrayamang walkiringim ngunukima murrandinbirbi Godbi. Ga bilakining nyani Abrayam wurrungdjini, bil yarim ngunukima yidjipili bungtjili ngunukiningban miri ngunung ngurrgima walirrdji miri God inga bultjidjini biligi. <sup>3</sup> Ga Abrayam yagirri yirrpini ngunung yidjipili Yisak (Isaac). (Ngunung yagirri mayali miri 'Gitgit.') <sup>4</sup> Ga ngunukining miri 8 yakirri bangiringili Yisakgi, nyani Abrayamdujji marrngili birrang, girri nyaninyi gurmildjilaban, miri ngunung ngurrgima rum Goddji yirrpini ngurrwakngi. <sup>5</sup> Ga Abrayam miri nyani bir-gaying yul bilakinjing, nyani ngurrum gatjidjini 100 gunmal ga rarrandydjarr ngunukining Yisak bungtjili.

<sup>6</sup> Ga nyani Sara inydi bultjidjini bindjin, "Nyanngapibi ngarri gitgitjimi Godbi, ga bukmak miri ngunuwili djining djanguny djin marrngirrdji mala irra djin maltjigiban djin nitjanydjidjiban girri." <sup>7</sup> Ga nyani gurrkungili wanginban, "Wari ngirrinyi inga bultjinir Abrayamgi, miri nyadji ngunupilang guyumi irr mini yidjipili, ga ngaman gungi inga yidjipiligi! Wirrgima! Bil marriban, yarim Abrayam wurrungban, bil djinipankima ngarri minigimi walkiripm inga."

### *Bilngiriny Yagar ga Yitjmayil minydji yanili Abrayamdujji*

<sup>8</sup> Manymak, ngunukirri yidjipili djurrginyi, ga ngunukining nyani marri wana, nyani Sara dadawdjinaban gunyirngir ngamanngiri. Ga ngunupan, yarim ngunung ngurrgima manngibirri, nyani Abrayamdujji djanguny yanilaban marrga bubalikining inydjin gurrkungi bunggulgi wanagi, marrga maypal ga wali djin dirradj nyinidjiban ngunung gulukngwlidji; yarimban inydjin ralkungi Abrayamgi ngungirkir yidjipiligi. <sup>9</sup> Manymak, gulukng wana dirradj nyinintyi, ga biling yidjipilimirrpili Yitjmayil ga Yisak inydi bil walngirriny kirinyban. Yarim ngunung yidjipili Yitjmayil nyani budjirribi Yagarbi, ngunukima Sarang djamaginiing miyilk. Ga nyani Sara bilny nyany kiriny bil walngirriny kiriny, ga ngunung ngurrgiping yidjipili Yitjmayil nyani mil-dinytjilaban gulmigipm inga, ga inga gitgitny kirinyban Yisakgi. Ga nyani Sara mil-marnngibban, <sup>10</sup> marrga inydi birrindjinginaban Abrayamli ga bindjin wangin, "Nyuni bilngiriny badji-nyawban, minydji ngurrgiwi ngunukima djamaginiing miyilk ga nyanngang gapirri! Guyumi nyuni wirrdjidji, ga ngirrang gapirri Yisak nyanibipm marrgibban nyim mala bulanggitj nyungupibi, miri nyanibipm ngidawa; bil ngungirkir ngunukima miyilkang gapirringirgim wirrban inga!" bindjin Sara yan-manbi wanginyi inga. <sup>11</sup> Bil nyani Abrayam mirrpmban marr-mirridjinaban, gima ngunung yawirriny Yitjmayil nyani girrgima nyanngapibi Abrayambi walkiripm. <sup>12</sup> Bil nyani God bindjin wangin inga Abrayamgi, "Ingki marr-mirridjiji nyanki Yitjmayilgi, ingki inga wargugudjiyi miyilkigi ngunung dapmiynirbi djamaginiing inma.

Manymaktja nyuni bintji ngurrgima miri nyalikidjini nyani Sara inma bultjidjini, gima Yisakmirrpni nyuni mala-pungi marrga nyanngamirrpni nyungung gurrutiginingirang mundan minyджi djirridj i inyджi mung-binigi.<sup>13</sup> Ban djingirki, ngunung djamaginiнirang gapirri, ngarri mala-pungi wana nyanngamirrpni girrigima, gima nyani wurpi miri nyungung yidjipili."

<sup>14</sup> Manymak, milwartjini maliri-gunyirri, nyani Abrayamdu wali marrngiliban, ga gapi nambidi gilingkalmirri maypalang marrngili rarrtjal, girri burrili glibili Yagarli. Girri nyani marrngili nyanngang yidjipili Yitjmayil, girri minyджi bilny yaniliban murrurrtli. Biling bil gubini, ga bubaliban bil gukirriny kiriny wirrpil-mirrpni, ngidjirrkngi ngunung gurrbi Biya-Djiba (Beer-Sheba). <sup>15</sup> Miri yakirri galbi bil gukirriny kiriny, girri gapibar bil malimdjili. Marrga nyani Yagardji galwupini yidjipili gurrnjimirri munganmirri, <sup>16</sup> girri marri bilayili minyджi girali ga nyininibar; gima nyani inyджi wangini, "Ngarri ingki djalngdjiyi miri irr nyangan ngirrang yidjipili balidji." Ga bilapilakingin ngunung miyilk ngurr-yirrpiniбан ngadjinibar marrpmban nguli marri bilayngiri yidjipilingir nyanngangi.

<sup>17</sup> Bil nyani God marrnginibar ngunukima yidjipilang bimbi ngadjnyi kiriny. Ga wurpmi Godang wugili djamaginiнing inga witjiliban Yagargi namngiri, nyani bindjin, "Nyimkibar nyuni marr-mirgidjirr kirimban Yagar? Yawnginyirringi, gima Goddji inga marrngini bimbi ngadjnyirakinngi nyanganapibi maribi yidjipilangirangpibi. <sup>18</sup> Guwu, marriwban ga djaltjibigi yidjipili, ga djalng-gungban inga; gima nyani Goddji djingiriny gungi mala-punyirbi galbi marrpni, marrga nyanngang bapurrr minyджin djirridj miri yagirri-wana mala," bindjin ngunukima wugili Godbi. <sup>19</sup> Girri Goddji mil-lapmiyngili inga marrga nyani djiringinibar miri ngunumkima gapi bungbungdjili ralalngiri. Nyani nyangini gapi, girri marrngiliban ngunung gumbala gilingkal, djirrdjirrdjili girri gangiliban gapi, ga inga minali yidjipiligi ga nyani dirradjiliban. <sup>20</sup> Manymak, ngunukima yidjipili Yitjmayil galng-wanadjini, ga nyaininy Goddji djakad-jnyi giriny. Ga ngulikima ngunung yul Yitjmayil nyininy girinyi yirrpimirri, ngunukima gurrbi djin bultjidjini Paran, ga nyani djambatj marrpni bow-gi maypalgi. <sup>21</sup> Ga guyumi nyanngang ngambirri marrngili miyilk nyanki Yitjmayilgi ngungirapibi gurrbibi Yidjipt-bi.

### *Abrayam ga Abimilik nguli gurrbiwi Biya-Djiba*

<sup>22</sup> Bilakingi Abimilik ga Pikul Abimilikang ngurrdawalangu gamununggu malagi, biling bil balparingili Abrayamnyi. Ga nyani Abimilik bindjin wangin inga, "Miri nyim ngunupilang djama nyuni gatjinmi, yarim nyani Goddji nyin gunggatjimi. <sup>23</sup> Marrga yagirrimirri Godangmirri nyuni irriny murr-ranibar, miri bilapilang gam': ingki nyuni irriny gar-yuli ga ingki nyuni djina mirgi-djamadjigi ngirrang gurrutiginingirgi; bil ngunyili yipi irra mil-bilbalqidjidi giri, ga djakadjigi djining gurrbi nyibirri gurrbimirri nyuni nyini girimban; yarim miri ngunung ngurrgima ngarri nyirr djakadjim girim nyuninyi." <sup>24</sup> Ga nyani Abrayam inga bindjin, "Ngiy, ngarri murr-rangirriban."

<sup>25</sup> Girri nyani yan manbi inga wanginibar Abimilikgi bil miri yilimbirring, nyani bindjin gima Abimilikang djamaginiпilingir djin gatjinmi ngunung ralal Abrayamdu gaminmi bili. <sup>26</sup> Bil nyani Abimilik yan bumir-gaypili, "Ngarri djunga miri wili gatjinmi ngunukima ralal nyuni gamirrdjini. Nyuni wirrgima irra bultjirri, ga ngarri wirr irr marrngirriy djining djanguny yarimipm djinipankima."

<sup>27</sup> Girri nyani Abrayam marrngili maypal bimbi mala ga buluki mala, girri gupirr-gungiliban Abimiliknyi. Bilapilakinjing inydji bil murrangirriban, yarim nu bilingga bil yirrpiniiban, miri bilapilang gam': rum magayagining inydji bil gurrpigi ga bilingganydji bil mil-bilbaljidji. <sup>28</sup> Ga nyani Abrayam butnyirdjili 7 bimbi maypalpili miyilkpili, ga bapili gangili gurrbili ga djani bimbipili nguli dja'djarriny kiriny milmaban Abimilikar. <sup>29</sup> Marrga nyani Abimilik butjalmini Abrayamnyi, "Nyimgima djining mayali miri ngunumkima bimbipili nyuni rindilali, ngunuwili rarrmalipm dja'djarri, miri nyimki?" <sup>30</sup> Ga nyani bumir-wubirdjili, "Djining mayali miri; bilang nyuni marrgi djinwiliny, nyuniban mil-lirrpigi bubalikininginyi miri ngarri birral irr gaminmi djinim ralal gapigi." <sup>31</sup> Manymak, gima ngungirapibi djangunybi djin bultjini giriny ngunukima gurri Biya-Djiba, gima ngunung yagirri mayali miri 'Biling murr-rangirri', gima biling inydji bil murr-rangirri ngulikima, bilapilang. <sup>32</sup> Rirringir ngunungir-kirri bilingi Abimilik ga Pikul, ngunung bunggawa miri gulinydjarr malagi, bil gubiniban ga bil winini djawalili bilngalipm, ngunung Pilitjayin djawal.

<sup>33</sup> Ga nyanganngi Abrayamgi, nguli Biya-Djiba nyani lamudjili djamban gurrtji, ga ngulikima nyani bumir-witjny giriny Yawaygi ngunukima God Wanngi-giliwilingakinjing. <sup>34</sup> Ga giliwiling bildjirri nyani nyininy giriny nguli nambidi ngunung Pilitjayinar gurrbimirri, yarim galbi gunmal ga rarranydjarr.

## 22

### *Goddji manyangini Abrayamnyi*

<sup>1</sup> Rirringir bamannigir nyani Goddji manyangini Abrayamnyi miri nyimkinjing djakiy. Nyani inga witjili, "Abrayam guwa!" "Nyimay? Ngarri butjir inydjirr gum kirrimban," nyani bindjini Abrayam. <sup>2</sup> Girri nyani Goddji inga bindjini, "Guwu, marriwban nyungung walkiripm Yisak, ngunukima yidjipili marr-bulanggitnjirbi nyungupibi, ga nyum nyim giribin gurrbili Murayali. Ga ngunukining nyim yulgungi, ngarri nyirr mil-lirrpigi bumiri gurri, ga ngulikima nyuni bungban Yisaknyi gurrbimirri gungimirri ngunung wurpmi nyirr mil-lirrpigi, yarim nyuni rani ga batjigibin miri mundjarr burrtjirrinyirbi gunyirbi ngirrali," God inga bindjin.

<sup>3</sup> Manymak, milwartjini nyani Abrayam inydji waykungiliban. Nyani marrngili nyininyirbi ga gilibili burrili dungki-li bitma yarraman. Girri nyani marrngili djunggi biral, barrbilpilingdjili djunggi ngunung djaming rarrtjilkungi. Girri marrngili yawirrinymirrpili nyanganng djamaginingmirrpili, ga Yisak nyanganng walkiringimi, girri larrban djin walminiban bumir-lunggurrmali, ngunyilipm ngunung bumiri gurri God inga bultjini. <sup>4</sup> Djin giriny nyininya-a-a yakirr bingili. Milwartjini larrban; ga malngiri nyani Abrayamdjii bumir-nyanginiban gurrbili bilaypmi. <sup>5</sup> Girri nyani bilingga wangini djamaginingmirrpiligidim, "Nyumi dijiligima nyim djirridji, nyumi ga djining dungki nyim marrkang djili, bil ngilinyi ngunyilatjuy liny giriban; liny bumir-kirrbigi Godnyi ngunumi, girri bapilaban liny winidji nyumilali."

<sup>6</sup> Girri djunggi mala nyani gilibili burrili Yisakang Abrayamdjii, bil nyanibipm gumbirridji minali birrang ga balinyirring ngirrtjnyakinjing marrga rarrtjilkungi djunggi. Girri biling gididjirrim bil giralibin. <sup>7</sup> Bil giriny nyininya-a-a, malngiri Yisakdji yanyangini gunydjirrgiriny, nyani bindjin, "Malu?" "Nyim walkira?" bindjin Abrayam. "Djining irr minigim

kim djunggipili, ga nyunibi minigim kim ngirrtjnyakinjing djunggi, bil nyalipan ngunung maypal bimbi il bungi ga batjigi miri mundjarr Godgi gunyirbi ngiltjapibi?" bindjin Yisak.<sup>8</sup> Ga nyani Abrayam inga bumir-wubirdjiliban, "Ngunkima maypal bimbi Goddji nyangngarki iltja gungi, walkira." Ga biribiri biling mungu bil giraliban ngunyilipm.

<sup>9</sup> Bur bil yulgungili nguli ngunung gurribi God inga bultjinmi Abrayamgi. Girri nyani yip mutjpiningiliban rirrkuyandji, girri namiliban gilibili djunggipili ga djarrpindjinginaban, girri walkiripm inga garppinibar mundandji, djaltjibili, girri gilibilinan namiliban djunggimirri.<sup>10</sup> Birrangban bat, way djaltjibili djini-guyumban bungban walkiripm inga,<sup>11</sup> bil bilapilakinbingan namngiri bimbi inga witjilinan wugilibi, "Abrayam! Abrayam!" inga witjili Yawayang wugili djamagining. Ga nyani Abrayam bindjin, "Nyimay? Ngarri djinipan!"<sup>12</sup> Ga nyani bindjin, "Guldjiwban! Ingkiban rarri! Ingkiban nyuni galng inga mirgidjiwi nyaninyi! Ngiy, djinimirriban ngarri inmarr marnggidjini nguygi, miri nyimkinning djaki inma. Miri bilapilang nyuni bintji ngurrigma butjirgindjidji yan gunyirbi ngirrapibi, gima nyuni ingki irra mrrbilginyiri ngirri nyungung walkiripm nyungung marr-bulanggitnyirbi yidjipili."

<sup>13</sup> Rirringir nyani mukdjili, namiliban nyani Abrayam milingili, girri maypal bimbi mildji bipininan ngulikirri, miri wana bimbi yul; yarim ngunung bimbi gungi-gattjili butjiridji gurrtjimirri waymirri. Marrga Abrayamduki marrngiliban ngunukima, bipini, yipmirri rirrkuyanmirri galwupini, girri batjidjininan miri mundjarrban Godgi gungili; ga nguni maypaldji bilamirri djamirrdjininan ngungirk i yidjipili. Bilapilang, Abrayamduki yidjipili rirrang inganyidji galwupini ngunukima maypal bimbi.<sup>14</sup> Ga nyani Abrayam yagirri yirrpini ngunukima gurribiwi "Yaway Gunyirakinjing"; marrga gima ngungirrapibi yulpili djin wang girimpipm mungu djini'djining, djin bindjirri, "Ngul bumirimirri gurrbimirri Yawayang, nyani inmila gungi".

<sup>15</sup> Ga nyani madjirri inga witjili Abrayamgi ngunung wugili ngunungir namngiri, inga bindjin,<sup>16</sup> "Abrayam, nyani God djining djanguny inma yanliban nyungki gam': Ngarri djining inmarr gungban matit murrandinirbi, ga ingki yan irr wubirdjigi bintji ngarribipm yagirri inydjirr mirgidjigi. Gima nyuni yan butjirgindjini ngirrang, ga ingki irra mrrbilginyiri nyungung walkiringim ngunung nyuni marr-bulanggitdjirri,<sup>17</sup> ngarriban inmarr mil-bilbalidjidi ga bulanggit mala nyirr gungban, miri bilapilang gam': nyungung mala-punyirbi inydjirr ngurri ga djin galbidjidi, yarim wana gulukng miri ngunuwili gata mala nammirri djidjarri ginimbirrimirri, ga miri munata riirrpidi mala munganmirri gapi djalkngmirri ngu'ngurri, miri bilapilang nyungung gurrutigining mala djin galbidjidi. Ga ngunubilang wurlipi bapururrardji mari djina djin djamadjigi gurrutiginingirgi inma, djanji nyungung mala-punyirbili djiny djin wingalamiygi ga gurribi djina djin djamigibin.<sup>18</sup> Ga nyungupibi mala-punyirbili bukmak bapururr mala djili gurribi-munganmirri djanji inydjirr marrkapdjigi, yarim ngunukima birraldjidji gima yan nyuni butjirgindjini ngirrang," bilapilang ngunung wugili inga bindjin djining djanguny gunyirbi Yawaybi.

<sup>19</sup> Manymak, biling Abrayam ga Yisak bil wininiban bilinggali ngunukirri yulmirrpili bil marrkany kiriny ngulikirri, girri warrpamduki djin gubini Murayangir gurrbingir ga ngunyilipm Biya-Djibaliban djin wininiban. Ga rirringir ngunungir-kirri nyani Abrayam giliwiling nyininyi ngulikima gurribiwi Biya-Djiba.

### *Nayurang gurrutiginingirang mundan*

<sup>20</sup> Manymak, marri guyumi wili inga birrungili djanguny Abrayamgi gurrutiginingibi walanggarrangir djawalngir. Ga ngunukima djanguny inga bultjidjini gam': "Milka, nyanimngim Nayurgi, nyani girri miri yidjipilpili minigim girim nyanngapibi Nayurbi nyungung gulmingimi. <sup>21</sup> Miri Yutj, nyannanggang milimiti, girri Butj, girri Kimuwil (ngunung djampang miri gunydjirri Aramgi); <sup>22</sup> girri djining yulpili mala yagirripili: Tjisit, Yatju, Pildatj, Djitlap, ga Bituwil." <sup>23</sup> Miri ngunukima yul Bituwil, nyani miri gunydjirri miyilkigi yagirri Ribika ngunukima miri guyumi nyanimngim Yisakgi. Djiniwiliny 8 yidjipilpilngirinyi nyani Milka minigimi budjirrimirri Nayurbi, Abrayamang gulmingim. <sup>24</sup> Ga wurpi miyilk Nayurang yagirri Riyuma, ngunung bitma nyanimngim bil djamaginiing inga, nyani minigimi yidjipilpilngirinyi Nayurbi girri; djining yulpili mala yagirripili gam': Tiba, Gayam, Tayatj, ga Maka.

## 23

### *Abrayamdji bayimdjili miring mulugining*

<sup>1</sup> Manymak, nyani Sara gatjidjini 127 gunmal ga rarranydjarr, <sup>2</sup> girri nguli wirrdjini gurribiw Kiriyatj-Arba, nambidi ngunung wana gurribi Kanan. Ga ngunung gurribi Kiriyatj-Arba djamingi djin bultjidjini Yibrun. Manymak, Sara wirrdjini, girri nyani Abrayam ngurr-yirrpiniiban inga ngadjininan Saragi. Nyani munganmirri nyinin yirrin nyanngar ngunukima balinyirbi Sara, inga ngadjny kirinaya-a-a, girriban.

<sup>3</sup> Nyani mukdjili ngadjnyirring Saragi, inydji waykungili, girri gurribi-watanguny malany djiny balparngili, ngunuwili yulpili mala bapururrabi Yitayitbi. Nyani nyinini djanggar, girri inydjin bultjidjiniban. <sup>4</sup> Nyani Abrayam djina bindjini, "Yarim ngarri yul gurrbinyirring djili ngildjar waymirri irr nyini girim gima mulkuru irri, bil marriban, ngarri irr djal miri ngildji irrny ildji djilimdjigi wurpmi ninini gurribi marrga nguli mulumirri irr djalirgi ngirrang balinyirbi gurrutigining mala."

<sup>5</sup> Ga djani inga djin bumir-wubirdjili Abrayamgi, "Bidak, butjir-inydji guw bunggawa! <sup>6</sup> Nyuni miri yagirri wana yul, ngunukima yirryirpinirri Godbi, ga djili nginbirri nyi'nyini. Manymak, nyuni rindiligi wurpmi ngunupilang butal mulugining gurribi nginbilang, girri ngulibun nyuni djalirgi nyungung balinyirbi gurrutigining mala. Ingki wili inma mirrbili nyungki mulugining gurribi nginbilang marrga nyuni djalirgi nyungung gurrutigining mala." <sup>7</sup> Girri nyani Abrayam gupildjini, miri bilapilang nyani djina bumir-kirrbili. <sup>8</sup> Girri madjirri Abrayamdji djiny butjalminiban, djina bindjin, "Ngunubilang ngildji birral djalngdjirri miri ngirrang balinyirbi mala djiny irr yilitjigi ga djiny irr djalirgi, ngildji yitjidjidjiban miri ildji butjalmidji ngunukima yul yagirri Yiprun walkiringim Djuwargi, <sup>9</sup> marrga nyani irrny djilimdjigi ngunung miring ngu'ngurri gurribi nyanngar. Ngungirkil ildji marnngi, ngunung miring ildji bultjin girim Makpila, ngunumi dja'djarri galimyirri gurrbimirri nyanngar. Ngunubilang ngunukima nyani irrny djilimdjigiban milma, ga ildji mil-marnnggidjidi, ngunung irr bayimdjigiban miri nyabiniwili rrupiya nyani irra bultjigi, ga irr galikiban ngunung, miri ngirrangpibi mulugining gurribi."

<sup>10</sup> Ga nyani Yiprun ngulikirri nyinin yirrin, ga nyani butjir-marnnggidjini Abrayamgi. Ga ngunukima yul Yiprun nyani girri miri ngungirapibi Yitayit bapururrabi. Miri ngunutjini yul mala nyininy nguli gurrbimirri rarrimirri munganmirri gadjigirring, djani

miri ngurrdawalangupili wanapilimirring ngungirapibi gurrbibi, ga rum djin djakadjny giriny ngungirki gurrbigi.<sup>11</sup> Manymak, nyani Yiprun marrngini Abrayamnyi, girri yan inga bumir-gaypili Abrayamgi, "In-gki, bunggawa; bidak, ngarri wangidjiban. Ngarri gupirri-gungban nyungki ngunukima miring ga ngunung gurrbi nyibirri ngunukima miring ngu'ngurri budjirrminy. Djining miri mundjarr inma, ga milmaban ngarri nyirr gungban, marrga ngirrang gurrutiginpili djili djin nyi'nyini mala djin mil-marnggidjidjiban. Manymak, guwu ga nyungung balinyirbi nyuni djalirgiban nguli."<sup>12</sup> Ga madjirri nyani Abrayam djina gupildjiniban ngungirki gurrbiwatangugi malagi;<sup>13</sup> girri nyani inga wangini Yiprun-gi milma djanngar, "Bilang manymak nyunguri miri nyuni yitjidjidji, ngarriban nyirr gungi rrupiya ngungirki gurrbigi. Yarim irr bayimdjigi rrupiyadji, ga ngulibinan djiny irr djalirgi ngirrang balinyirbi gurrutigiming mala."<sup>14</sup> Ga nyani Yiprun inga bumir-wubirdjili Abrayamgi, inga bindjin,<sup>15</sup> "Manymak, butjir-inydji guw bunggawa! Manymak ngunukima gurrbi nyuni bayimdjigiban nyabiniwili marri, yarim 400 didipili; bil djining rrupiya miri marr-malngiri ngiltjiki, il marrbigi rrupiya ga ngunukima gurrbi ngarri nyirr gungi nyirr mungbinigi. Girri nguli nyuni djalirgi nyungung balinyirbi mala."<sup>16</sup> Girri gidagidapm nyani Abrayam yitjidjini miri bayimdjigi Yiprunngir, marriban rrupiya wana bil nyani marrngilipmban. Nyani djarrdjingini rrupiya girri milmaban butjurrudjili 400 didipili, ga ngunuwiltji gurrbiwatangupili djani inga djin mil-marnggidjini. Nyani Abrayamdjii galwupini djunupa rrupiya bilapilang miri rrupiya-djamaginiq rum djina bultjdjini ngunuban bildjirri.

<sup>17</sup> Bilapilang, Yiprunang gurrbi, miri ngidjirrkng Mamri'ang gurrbi ngu'ngurri, nyani Abrayamdjii bayimdjili; miri ngunung miring ga war-pam ngunung gurrbi inydji garrpiniirbi ga warrpam gurrtpipili nambidi ngunung gurbimirri; djining mala Abrayamdjii galini girinyban.<sup>18</sup> Ga bukmak ngunuwiltji gurrbiwatanglu mala inga djin mil-marnggidjini miri Abrayamdjii galiki giri ngunung gurrbi miringgining ngunyili yipi.

<sup>19</sup> Rirringir ngunungir-kirri, Abrayamdjii djalirngili Sarany nguli mulumirri miringmirri, ngunukima gurrbi djin bultjini giriny Makpila budjirrminy Kananmirri gurbimirri.<sup>20</sup> Miri bilapilang Abrayamdjii marrngili ngunung mulugining gurrbi djanngangir gurrbiwatangungir ngungirapibi gurrbibi, ngunungir Yitayit bapururrngir.

## 24

### *Yisak ga Ribika*

<sup>1</sup> Manymak, rirringir galbi gunmal ga rarranydjarr inydji bangiringili, nyani Abrayam wulmandjiniban mirrpbani; ga ngurrwagipi nyani Goddji inga gungili galbi manymak mala ga djagadjili nyaninyi.

<sup>2</sup> Manymak, nyani Abrayam djiringini miri nyanganngal balinyirbi bild-jirri ngidjirrgidjini inga. Marrga nyani inga witjili nyanganngal bunggawagi djamaginiqirgi, ngunukima yuldu djakadjny giriny bukmak girripili Abrayamang. Nyani yulgungili, ga Abrayam inga bindjin, "Nyuni gumbirri(rawban bapili nambidili gandili ngirrali,<sup>3</sup> marrga milmaban nyanganngal Yawayngirar nyuni irriny murr-raniban miri ingki djingirapibi gurrbibi nyuni marrgi nyanimngimi Yisakgi; yarim miri djili lim nyini girrim djanngar djinikima Kananayitar malar, bil ingki nyuni djamigi miyilknyi djiningir bapururrngir, bilapilang nyuni murr-raniban milbimirri Godar ngunukima Miligidji gurrbigi ga ginimbirrigi.<sup>4</sup> Ga nyuni irriny gungi murr-randinirbi miri nyuni wiqidji ngunyili djawalkitjili ngirrali,

marrga ngunungir nyuni inga marrgi miyilknyi walkiringirgim irra Yisakgi djanngapibi ngirrang gurrutiginpilngirapibi.”<sup>5</sup> Ga ngunung djamagining inga bindjin Abrayamgi, “Ngunubilang ngunung miyilk irriny ingki-pultjigi marrga nyani ingki irriny gurrgipi bapili gurrbili, nyalikiban ngarri ingarr marrgi miyilk Yisakgi? Bina manymak miri nyungung walkiripm irr gangban ngunyilipm?”<sup>6</sup> Bil nyani Abrayam inga bultjidjini, “Ingki ingki! Ingki nyuni winidjingilgi ngirrang walkiripm ngunyilipm!”<sup>7</sup> Yaway, ngunung Miligidji nammirri nyi'nyini, nyani irriny djamirrdjini ngirrangir gunydjirrgirang gurrbingir, ga ngunungir gurrbingir nyibirri irr bungtjili, ga nyani irriny murr-rangirri djinimirri gam’: ‘Ngarri djinarr gungi djining djawal mala-punyirbigi nyungungkima’. Marrga nyanihi imma yani nyanganng djamagining wugli miri imma gunggatjigi marrga ngunungir gurrbingir nyuni bi birruji miyilk inga bapili Yisakgi ngirrang walkiringirgim.<sup>8</sup> Ga bilang nguni miyilkdji nyin ingki-pultjigi ga ingki nyin gurrgipi, nyuni yarangdjidjiban djiningir murr-randinirbingir; bil ingki nyuni winidjingilgi ngirrang walkiripm ngunyilikima, wirrpk!’ inga bindjin Abrayam djamaginingirgi.<sup>9</sup> Ga ngunukirri yul gumbirri-ragiliban nambidili gandili Abrayamli, girri inga murr-rangirriban bunggawagi.

<sup>10</sup> Manymak, nguni djamaginingir marrngili 10 kamulpili Abrayamang, ga galbi wurpi wurpi mundjarr mala djiny gurtjili nyanganngapibi bunggawabi, girri djingiriny malany djiny birrprrungili ga djiny gilibili burrili kamul-li, girri larrban nyani ga nyibi wurpilili djamaginpili Abrayamang. Djin giriny nyininya-a-a, yakirri galbi, ga djawalmirri Mitjuputamiya (Mesopotamia) djin yulgungili bilay pirr nyibirri djani Nayurang malapunyirbi djin nyininy.<sup>11</sup> Manymak, nguli gar-gurriyili gurrbimirri biligi djani yulpili djin gamirrdjini ralal wana marrga gapi djin marrgi; ga giliwiling mala bitma djapidi ngurrinyi nguli munatjamirri marrga ngunyili gapi djin djululupmiyngili marrga maypalpilingiri djin dirradjigi. Ga ngunukining Abrayamang djamagining yulgungili ralalmirri, ngulikima nyani guldjilaban, ga nyanganng kamulpili inydjin bundirrdji rangirri ga gandi inydjin galdirrdjini. Ga walirr ngidjirrkngban mungan inydiyi yirrpini kiriny. Yarim ngunung bildjirri bilakinng miyilkpili bi djin giri ralalnili gapi djin marrgi.<sup>12</sup> Ga Abrayamang djamagining inydiyi galwupini kamulngir, girri bumirgindjilaban Yawaygi, nyani inga bindjin, “Yaway, Miligidji ngirrang bunggawagi Abrayamgi marrngirriyban: bina djini'djining manngibirri nyuni irra mil-lirrpigi nyim ngunupilang djangunyginng, marrga irr marnggidjidi wiriny miyilknyi nyuni inga manyangini Yisakgi. Miri bilapilang nyuni inga mil-bulanggitdjidjidi Abrayamgi ga inga gunggatjigi ngirrang bunggawagi.<sup>13</sup> Ngarri djili irr djirridjidi ralalmirri irr bumiri-bargi bilakinng bildjirri midipilipili djingirapibi gurrbibi bi djin giri marrga gapi djin marrgi.<sup>14</sup> Ga ngunukining wurpm yulgung, ngarri ingarr bir-kiri ga butjalmidji miri bilapilang gam’: ‘Bina manymak nyuni irra djirridjirrdjigi nyungung dandanga marrga gapiban irr dirradjigi?’ Ga ngunubilang ngunukima midipili irra bintjiban, “Ngiy manymak, dirradjiw, ga gapi irr marrgi ga djinarr gungban kamulgi malagi nyungung girrigima,<sup>15</sup> irr djiringilgiban bilang miri ngunukima midipili nyani miri yirryirrpiniybi miyilk nyungupibi, marrga nyungung djamagining yul Yisak nyani marrgi ngunukima miyilk miri nyanimgim inga. Bilapilang irr marnggidjidiyban miri nyuni inga mil-bulanggitdjidjini Abrayamgi ngirrang bunggawagi.”

<sup>15</sup> Nyani mukdjili, girri gidigidapmban nyani Ribika yulgungiliban gurrbingir miniginy kiriny dandanga bapimirri nyanganng. Ga ngunung midipili Ribika nyani miri walkiringim Bituwilang, ngunung yul bud-

jirribi Milkabi - ngunung nyanimngim Nayurang, ga Nayur nyani miri Abrayamang gulmingim.<sup>16</sup> Yarim ngunukima midipili nyani miri mirrmi djal-malimaling, bil wirr inga minitjingim miri, yarim nyani djuburr bulanggitj nyimininy giriny. Manymak, nyani djundirrdjini gapili, butirrdjini dandangany, girri walminiban.<sup>17</sup> Ga ngunukima djamagining yul inga nunyedjirrali ga inga bindjin, "Bina butal miri ninini gapi irr dirradjigibar nyungur dandangadji?"<sup>18</sup> "Ngiy, dirradjiw!" nyani bumir-wubirdjili, girri gidagidapm inga djirrdjirrdjili dandangany, girri gumbirridji gatjini kiriny bilakining nyani dirradjny kiriny.<sup>19</sup> Rirringir nyani dulpidjini, ngunukima midipili inga bindjinban, "Kamulgi malagi nyungung djimarr marrgibar gapi marrga djin dirradjigi ga djin dulpidjidji girri."<sup>20</sup> Girri nyani djululupmiyngili dandangany ngunyili djapidili maypalang, girri winini gapili, butirrdjini, girri bapili minali ga madjirri djululupmiyngili djuluk nambidili djapidili; girri bi'bininy ngurrgima mi'miniginy kiriny gapi yarimipm kamulpili djin dulpidjini.<sup>21</sup> Ban Abrayamang djamagining dja'djarrinyi nyi'nyanyi ngunukima miyilknyi, nyani mukny djarriny yungan yarimipm nyani marnnggidjini ngunubilang nyani Yawaydji inga djamadjili manymakdjili, u ngunubilang ingki.

<sup>22</sup> Rirringir ngunuwili kamulpili djin guldjili dirradjnyirngir, ngunukirri yuldujji djarrdjinginaban wurpim gold ring, girri ngurr-rangirri; girri marrngili bingili gold mala bitma nganybak, girri gundjarrmirri biliny galwupini nyangan, miri mundjarr mala nyanki Ribikagi.<sup>23</sup> Girri nyani inga bindjin, "Nyuni irra bultjigibar, wirang walkiringim nyuni? Bina butal ngildjar bala'mirri nibi ngurridji djini'djining maliri, nambidi nyungung gunyedjirrgirar bala'mirri?"<sup>24</sup> Nyani bumir-wubirdjili, "Ngarri miri Bituwilang walkiringimi, ga nyani Bituwil miri gapirringim Milkagi Nayurang nyanimngim.<sup>25</sup> Ga ngiy, nibi marrkapdijigi miri ngildjny nibi djakadjigi djini'djining maliri. Ngurrumi galbi yurryarr maypalpiligi ngu'ngurriban bala'mirri nginbilar, marrga nyuni djiny birrugi nyungung kamulpili ga djiny nibi djakadjigi girrigima nguli bala'mirri nginbilar."

<sup>26</sup> Marrga ngunukima yul guldjiniбан ga bumir-kirrbili nyannagli Yaway-li, ga inga wukdjiliban,<sup>27</sup> inga bindjin, "Yaway nyuni wuknyirbi ngirrapibi, God Miligidji Abrayamgi ngirrang bungawagi, nyuni ingki inga mirrbilginyir girinyir gunggatjnyirbi bungawagi ngirrangirgi, djini'djining ga ngurrwakng. Irr marrkapdjlilan Garay, irr birraldjnyirdjili djining bala' Abrayamang gulmingirangipm, ga bapili djunupa nyuni irriny mil-lirrpini gadjigarr!"

<sup>28</sup> Rirringir ngunungir-kirri Ribika nunyedjirralibar wininiban gurrbili ngambirrgirali marrga djanguny garrwurdjigibar gurrutiginingili malali.<sup>29-30</sup> Manymak, Ribikang wuwngim yagirri Laban. Ngunukining Ribika yulgungili bala'mirri, nyani Laban nyanginiban ngunukima mundjarr mala gunyirbi Ribikali, ngunung gold ring ngurrimirri wirardjingga, ga ngunung bingili gold nganybakmirrpili gundjarrmirri, ga nyani marrngini djanguny nyanganapibi Ribikabi bultjinirbi. Marrga nyani nunyedjirralibar gar-gurriyilili ngunyilipm djetjali nyibirri Abrayamang djamagining marrkany kiriny, djarrnyipm mungangmirri kamular ngui ralalmirri.<sup>31</sup> Ga Laban inga bindjini, "Guwa, nyuni marrkapgining yul Yawayang! Nyimki nyuni marrkam kirim djilipm? Ngarri ngurrum biri inmanydjirr bulanggitdjiliban, bila inmarr riirrbili nyungki, ga djanki girrigima nyungung kamulgi malagi."<sup>32</sup> Marrga ngunukima yul ragilinan. Djani djin djirrdjirrdjili girri mala ga Abrayamang mundjarrpili kamulngir burringir, girri djina djin birrungili yurryarr kamulpiligi.

Girri gapi djin birrungili marrga djani nu inydjin rurrtjirrmimi bukmak Abrayamang djamagining mala.<sup>33</sup> Girri djani wali djina djin birrungili. Bil ngunukining djin galwupini wali bimbimirri nyanngar, ngunukima djamagining Abrayamang, nyani djina bindjinban, "Wirrban irr dirradjigi wali yarimipm ngirrang djanguny ildjanydjirr bultjigi." "Ma!" inga djin bindjinban.

<sup>34</sup> Nyani ngurr-yirrpini djina wangini, "Ngarri Abrayamang djamagining.<sup>35</sup> Mirrpm galbi manymak mala nyani Yawaydji inga gupirrgungili Abrayamgi ngirrang bunggawagi, marrga nyani rrupiya galbingakin ing yul: ga nyanggali Goddji gungili maypal mala - miri galbi bimbi, buluki, kamul, dungki, ga dapmiynyirbi djamaginpili mala miri miylkpili ga yulpili.<sup>36</sup> Ga ngirrang bunggawangirang nyanimgim Sara nyani inga minali yidjipili yul Abrayamgi, rirringir nyani wulgamandjini, ga ngungirki yidjipiligi nyani Abrayamdji inga gungili warrpamban galinirbi mala Abrayamang.<sup>37</sup> Girri ngirrang bunggawadji irriny yan-kungili miri ngarri ingarr mur-rangirri bilapilang gam': 'Ingki djingirapibi bapururrbi djili ngu'ngurri nyuni inga marrgi nyanimgim Yisakgi, ingki djingirapibi miylkpilibi, djiniwili Kayanayit malang miylkpili wirapilar lim nyini girimban.<sup>38</sup> Bil nyuni winidjiban ngunyili ngirrali gurrutiginingirang gurrbili, ga djinanydji garrkarppigi ngirrang gunydjirrgirang malagi, girri djanngapibi nyuni inga marrgiban nyanimgimi Yisakgi, ngirrang walkiringirgim.'<sup>39</sup> Girri ngarri ingarr wangini bunggawagi, ingarr bindjin, Nyaliki irr marrgi miylk inga ngunubilang ngunung miylk irra ingkidjigi ga nyani ngirrinyi ingki irriny gurppigi bapili?'<sup>40</sup> Nyani irra bumir-wubirdjili, 'Nguni Yawaydji nyin gunggatjigi; nyanngamirrpm gadjigarrmirrpm ngarri ingarr rum-gurrrpin giriny, marrga nyani bi yani nyanngang djamagining wugili ga ngunukima wugili inma ngurrgilidjidjiban marrga inma djamadjigi manymakdjigi, marrga ngirrangir gurrutiginingir nyuni bi inga gangi nyanimgimi nyanki ngirrangirgi walkiringirgim, miri ngunukima nyuni marrgi djanngapibi ngirrang gunydjirrgirangpibi malabi.<sup>41</sup> Bil ngunubilang djani nyin djin bir-yirrpigi, marriban bilang, nyuni yarangdjidjiban nyungungir murr-randinirbingir.'

<sup>42</sup> "Ga djili irr yulgungili djatjamirri, ngunukiningban ingarr bindjin wangin Yawaygi, 'Way, Miligidji Abrayamang ngirrang bunggawangirang, ngunubilang nyuni birral irriny gunggatjigibin, djining ngirrang ginginyirbi:<sup>43</sup> Djinimirri irr marnggidjidji nyim miylk yirryirrpini rbi nyungupibi. Djili djatjamirri munganmirri irr djirridji bilakining midipilipili bi djin giri gapigi. Ga djiny irr butjalmidji, 'Way, bi irriny guw gapi ninini nyungur dandangadji.'<sup>44</sup> Ga wili ngunupilang wurpilim miylkdji irra bumir-wubirdjigi miri bilapilang gam': 'Ngiy, dirradjiw, ga ingki nyuni ngidawa bil nyungung kamulpilingir garrisima, djankibani ngarri djinarr marrgi gapi,' ngunitjini miylkdji ngarri irr djiringiligibin miri ngunukima nyuni yirryirrpini inga walkiringirgim ngirrang bunggawangirang.'

<sup>45</sup> "Rirringir irr mukdjili wanginyirngir gungimirri, gidagidapmban Ribika yulgungiliban, dandanga miniginy kiriny bapimirri. Nyani butirrdjini dandanga ga wininiban, girri ngarri ingarr bindjin, 'Way, bina nyuni bi irriny gung gapi?'<sup>46</sup> Ganydirrdji nyani djirrdjirrdjili dandangany, girri irra bindjin, 'Ngiy, dirradjiw, ga ngarri gapi djinarr marrgi kamulgi malagi nyungungirgi.' Ngarri irr dirradjiliban, ga nyani girri djina gungili gapi kamulpiligi.<sup>47</sup> Ngarri irr butjalminiban, 'Wirang walkiringim nyuni?' Ga nyani irriny bumir-wubirdjili, 'Ngarri Bituwilang walkiringim, ga

ngunukima Bituwil nyani djining Nayurang walkiringimi, ga Nayurang nyanimngimi djining Milka.' Girri ngarri marrngili ngunukima gold ring, girri irr ngurr-ranggirriban, ga irr yirrpini ngunupili nganybakmirrpili gundjarrimirri nyangan gar miniginy. <sup>48</sup> Girri ingarr gupildjini Yawaygi ingarr marrkapgindjinibar, ga irr bumir-kirrbili Yawaynyi, ngunukima Miligidji Abrayamang ngirrang bunggawangirang, gima nu-pidipidig nyani irriny gundjirr-katjidjini bapilipm, marrga djinim miyilk irr marrgiban, ngirrang bunggawangirang gurrutiginingirang yidjipili, ga ngunyili djinim irr gangi inga Abrayamang walkiringirgim. <sup>49</sup> Manymak, ngunubilang ngildji birral ingildji marr-bulanggitdjirri ngirrang bunggawagi Abrayamgi, ga ingildji mil-yilgidjirriban marrga ildji yitjidjidji, djinipan irriny ildji butjirigindjiwi, bil ngunubilang ingki ildji yitjidjidji, djinipan irriny ildji butjirigindjiwi, marrga irr marnggidjidjiban nyalimirri irr giriban."

<sup>50</sup> Girri nyani Laban inga bumir-wubirdjili Abrayamang djamingingirgi, "Yawaydji nyani bipm ngurrum yirryirrpini Ribikany, ingki nibi ingkidjigi, ga ingki nibi yitjidjidji; nyangarki ngurrum rindilali marrga nibi wirr-pultjigaban. <sup>51</sup> Nyungur gumbirrimirri nyani Ribika nyini girimban, balpiri nyuni gangban, marrga nyani ga nyungung bunggawangirang walkiringimi inydji bil marrgi, miri nyani Yaway inmila bultjdjinibar."

<sup>52</sup> Ngunkuning Abrayamang djamagining yul djina marrngini djangang gungi, nyani bumir-galmimi munatjali birbimirri Yawayar. <sup>53</sup> Girri nyani inga djarrdinginibar galbi mundjarr mala, miri gold, silba (silver), ga wurpi wurpi mirikal mala, girri inga gungiliban Ribikali. Ga nyani biliny gungili mundjarrpili Ribikang wuwnngimi ga ngambirripm bilingga girri. <sup>54</sup> Girri djani djin dirradjiliban wali ga maypal, ngunukima djamagining yul Abrayamang ga nyanggang gunggatjnyakinpili; ga nguli bala'mirri djin yakirr-ngurrinyinibar.

Manymak, maliri-gunyirri inydjin waykungili, girri Abrayamang djamagining djiny butjalmini, djina bindjin, "Bina ildji yitjidjidji miri nibi winidjiban nyanggali ngirrang bunggawali?" <sup>55</sup> Ga Ribikang ngambirri ga wuwi biling inga bil bumir-wubirdjili, "Bidak, marri giliwiling nyani nyinidji djilikima nginbilar, marri 10 yakirripili u bilapilang, rirringir ngunungir-kirri minydjii ildji giriban." <sup>56</sup> Bil nyani djina bindjin, "Ingki irriny ildji watjarrdjigi, ngarri miri irr giri gima Yawaydji irra djamadjili manymakdjili. Bina ildji yitjidjidji miri nibi winidjiban nyanggali ngirrang bunggawali?" <sup>57</sup> Girri djin bumir-wubirdjili, "Inga lim witjigaban ngungirkki midipiligi bapili, girri nyanyi lim butjalmidji nyim gungimirri ngurriban nyanganng." <sup>58</sup> Marrga inga djin witjiliban Ribikagi, girri inga djin bindjin, "Bina nyuni djiny yati-nyangban marrga djini'djining ngildji minydjii ildji giri?" "Ngiy," nyani djina bindjin. <sup>59</sup> Marrga djani djina djin bubudjili Ribikagi ga nyanggang djakadnjyakinngirgi miyilkigi, ga Abrayamang djamaginpiligi. <sup>60</sup> Girri djanguny mayaligining manymakgining inga djin wanginban Ribikagi, inga djin bindjin, "Nyuni mala-pungban yidjipilpili galbi mirrpmban. Ga nyungung mala-punyirbi djin djamigi gurribipili djina nguy-marginpilngirang malang." <sup>61</sup> Rirringir ngunungir-kirri, Ribika ga nyanggang djamagining miyilkpili djani djin baltjili ngunyili kamulpilili burrili, girri minydjii giralibar, Abrayamang djamagining ngurrwakng, ga djani yilimirri gurrpini kiriny. Miri bilapilang ngunukima djamagining yul marrngili Ribikany, girri wininiban.

<sup>62</sup> Manymak, bilakinng bildjirri djani bilaypm djin gupidjny kiriny, nyani Yisak yilitjini wurpili gurrbili. Nyani wininngi ngunungir gurribingir

Biya-Laray-Ruyngir, ga inydji yirryirrpini gurrbimirri Nigip, girri ngulibar djina marrkany giriny.<sup>63</sup> Ga wurpm balnggili, miri yabulu bildjirri, nyani Yisak gukirrinyi mururrutmrrpmi. Nyani milingili, girri djiny bumirinya yangini ngunuwiltji kamulpili bi girim nyini.<sup>64</sup> Ga ngunukining nyani Ribika mildji bipini Yisaknyi, nyani inydji nguli burringir kamulngir,<sup>65</sup> girri butjalmini nyaniny Abrayamang djamagini, "Bilang ngunumi, wari ngunung yul bi inmila girim nyini yurryarrmirrpmi?" "Ngunukima yul ngunung ngirrang ngurrdawalangu," inga bindjin Abrayamang djamagini. Marrga nyani Ribika ngagirrdjini ngurri ga rarri nyaanggar mirikaldji, gima ngunung miri rum mayaligining miyilkigi bilapilakin ning bildjirri.

<sup>66</sup> Manymak, Yisak ga Abrayamang djamagini biling inydji bil birmirrpilidjili, girri ngunukima yul inga bultjidjini djanguny miri nya-lkidjini nyani birraldjnyirdjili Ribikany, ga nyim birraldjini, ga bilapilang.<sup>67</sup> Rirringir ngunungir-kirri nyani Yisakdji gangilinan Ribikany nyaanggali wininli. Ga biling bil djabir-kurrkungiliban, ga ngunungir yipi nyani Yisak mirrpm inga marr-bulanggitdjini Ribikagi. Ga ngungirapibi marrbulanggitjnyirbibi nyani Yisak laydjlilinan wargugungir, gima ngurrawkng nyaanggang ngambirringim Sara nyani wirrdjini.

## 25

### *Kiturang gapirriwilingim*

<sup>1</sup> Biligi, rirringir Yisak bungtjili, nyani Abrayam marrngili wurpi miyilk, bitma nyanimgimi bil miri djamagini inga, ga nyaanggang yagirri Kitura. <sup>2</sup> Ga djiniwili Abrayamang yidjipilpili miri yulpili mala nyaanggapibi Kiturabi budjirrbi, gam': Djimran, Djuktjan, Midan, Midian, Yitjbak, ga Djuwa. <sup>3</sup> Ga ngunukima Djuktjan nyani walkiri-marrngili Djiba ga Didan. Ga Didan mala-bipini warrngguwi bapururrpili gam': Atjurim mala, Litutjim mala, ga Liyumin mala. <sup>4</sup> Ga djiniwili Midianang walkiriwilingim yul mala, gam': Yipa, Yipir, Yanuk, Abida, ga Yilda. Bokmak djiniwili yulpili djani ngunung Kiturang mala-punyirbi.

<sup>5</sup> Ga nyani Abrayam djiny djakadjili bukmaknyi nyaanggang yidjipilpili. Nyani yan yirrpini marrga rirringir nyani wirrdjidi nyaanggang yidjipili Yisak nyani marrgibana warrpam girrpili gunydjirrgirang. <sup>6</sup> Bil djanki, ngunuwiliny wurpiliny yidjipilpiliny djiny djin minali djamaginpilingir miyilkpilingir, nyani Abrayamdjji djina gungili mundjarr mala gandi-girrpili nyaanggang, bilakining nyani wanngipm nyininy kiriny, girri nyani minyndjny yanalan wurpili gurrbili djimurruli, marrga nguli minyndjin nyinidji giriban rarrmalipm bilayngiri Yisakngir.

### *Abrayam wirrdjini*

<sup>7-8</sup> Manymak, nyani Abrayam gatjidjini 175 gunmal ga rarranydjarr, girri nyani wirrdjinibana. Ngunukining nyani wirrdjini, nyani ngunung mirrpm bir-gayping yul, ga marrkapgining, ga gunmal galbingakin.

<sup>9</sup> Ga nyaanggang walikiriwilingim Yisak ga Yitjmayil biling bil djalirngili Abrayamnyi mulumirri miringmirri, ngunung miring nyani Abrayamdjji bayimdjili biligi ngunungir Yiprunngir, ngunung yul djanngang Yitayit malang, <sup>10</sup> yarim Abrayamdjji bayimdjili ngunukima gurribi djanngangir Yitayit bapururrngir. Ga nguli miringmirri nyaninyi bil djalirngili ngurrinyi mungangmirri Sara nyaanggang nyanimgim, yarim biribiri Abrayam ga Sara bil ngurrinyi wurpilipm. <sup>11</sup> Ga rirringir Abrayam

wirrdjini, nyani Goddji djakadjili Yisaknyi nyanngang walkiringimi. Ga nyani Yisak inydi yirryirrpini ngidjirrkng gurrbimirri Biya-Laray-Ruy.

### *Yitjmayilang gurrutigining gadjigarr*

<sup>12</sup> Djining ngunung gurrutigining gadjigarr Yitjmayilang, nyani miri Abrayamang walkiringim, ga ngambirringim inga Yagar, ngunukima Sarang dapmiynyrirbi djamaginiing miyilk wirinyi Abrayamdi marrngili djawalmirri Yidjipt. <sup>13</sup> Ga djiningi ngunung Yitjmayilang walkiriwilingim yagirrpili mundandji, gam': Nibayut nyanngang milimiti, girri Kidar, Adbil, Mibsam, Mitjma, Duma, Masa, <sup>14</sup> Yarad, Tima, Djitur, Napitj, girri Kidma nyanngang djirrakay. <sup>15</sup> Ga djiniwili 12 walkiriwilingim Yitjmayilang djani djin ngurrdawalangudjini bundurrgi 12-gi, ga djiniwili yagirrpili djani miri yagirripili bundurrgi, ga yagirripili gurrbige nyibirri ngunuwlilikima ngurrdawalangupili inydiyin yirryirrpini wurpirri wurpirri gurrbiwi. <sup>16</sup> Ga nyani Yitjmayil wurrungdjini, ga nyani gatjidjini 137 gunmal ga rarranydjarr, girri wirrdjiniban. <sup>18</sup> Bil nyanngang walkiriwilingim djani djin barrkirrdjini wurpili wurpili gurrbili, miri ngunungir gurrbingir Yabilangir ngunung gurrbiwi ngidjirrkng Yidjipt djawal, ga ngunyili Atjiriya (Assyria) gurrbili, ga banim galbi gurrbipili. Bil ngunuwili walkiriwilingim inydiyin nguy-margindjini djanibinydjin, marrga gamununggupilingir djiny djin bumir-balpiny giriny wurpili djanngangpibi gurrutigining djuwinapili, djiny djin bininy giriny ngurrima.

### *Yisakang yidjipilimirrpili biling bungtjili*

<sup>19</sup> Djinipan Yisakang djanguny, walkiringim Abrayamgi. A djiniwili nyanngang gurrutiginpili: miri Abrayam nyani gunydjirrngim inga Yisakgi, <sup>20</sup> a ngunukining nyani Yisak gatjidjini 40 gunmal a rarranydjarr, nyani mungan-miyilkgindjiniban. A nyanngang nyanimngim yagirri Ribika, galitjirringi ngungirki yulgi Bituwil ngungirrapibi Aramiyan ba-purrurribi, a Yisakdji marrngili ngunukima miyilk ngunungir gurrbingir Padan-aram. A Ribikang wuwngim yagirri Laban ngunung Aramiyanbi ba-purrurribi yul.

<sup>21</sup> Manymak. Nyani Ribika giliwiling nyininy giriny yidjipilinyirring, gima budjirr-djumilidjini. Girri Yisakdji nyani inga butjalminiban Gar-raynyi nyanimngirgim, yarim yidjipilngirny nyani marrgi. A nyani Garay inga marrngini, a yitjidjinaban. Marrga ngunungiri nyanimngim inga gapalmirrpilidjiniban. <sup>22</sup> Bil nyanngar yarrmirri ngunupili yidjipilimirrpili biling galng inydi bil ngurrginy kiriny, miri inydi bil birrirrpirrirrdjny kiriny budjirrmirri nyanngar. Girri bilngirang ngambirrngim bindjin wanginban, "Ngunubilang miri bindjirr ngurrgima irr djalgidjirri kirim, nyimkiban bilang irr wanngi nyinidjipmban?" Marrga ngunyili nyani girali djuyuli gurrbili, girri nguli Ribikadjji butjalminiban Gar-raynyi nyimkidi djining gunyambi nyanngar budjirrmirri. <sup>23</sup> Girri nyani Garay inga bultjidjini djinikima djanguny, "Nyungur yarrmirri bingili yidjipilimirrpili bil ngurri kirim. A biling inydi bil bum kirimbani, yarim bilapilang miri bingili bapururrmirrpili inydi bil ngurrrparim kirim nyungur budjirrmirri. A bilingapibi yidjipilibi bingili bapururr inydi bil ngurri. Bil wurpilim bapururrndji nyani bangirigi ngunukima wurpi, miri nyungung milimitang mala djani djina djin djamagiñdjidi nyungung djirrakayi malagi, bilapilang."

<sup>24</sup> Guyumi nyanngang walirr yulgungili yidjipiligi, a bingili yidjipilimirrpili yulmirrpili biling bil bungtjiliban. <sup>25</sup> Ngunung ngurrwagiping yidjipili bungtjili, a galngi inga marri budibudigili, a gilingkal inga guyilibini

galkngu miri nanikut, marrga gunydjirrngirim yagirr-yirrpini ngunukima Yisuw (Esau), gima ngunung yagirri mayali miri 'mapalbini'. <sup>26</sup> Rirringir ngunungir-kirri ngunung yilaping yidjipili bungtjili, a nyani gumbirrdji gatjini kiriny wuwnigim nu-punyaŋ. Marrga ngungirinyi nyani Yisakdji yagirr-yirrpini nyaniny Djakup, gima djining yagirri a ngunung yan 'nu-punyaŋ' bimbi bilingga wurpilpmili. A bilngang gunydjirrngirim Yisakdji ngurrum gatjidjini 60 guŋmal ngunukining biling yidjipilimirrpili bil djawal-gingini.

### *Yisuwđji ngaminyi-bultjidjini ngunung manymak rum milimitang*

<sup>27</sup> Manymak, biling yidjipilimirrpili bil djurralli, a bil yulđjini. Ban Yisuw nyani djambatj yul maypilgi, bininy giriny ngurrđima maypilgi galnggalngdjny girinyi, a gar-gurryili murrurrtmirri gukirriny giriny, bilapilang nyanngang rum. Ban Djakup, nyani buginingi a mundurrpi yul, yarim bininy giriny ngurrđima bi nyininy giriny gurrbiwi ḥambidi wiňiňmirri. <sup>28</sup> Ban Yisak nyani mirrpom marr-bulanggitdjini Yisuwgi, gima nyani galng-bulanggitdjini nyadjì ngunupilang maypilpilngiriny dirradjim kirim ngunuwil Yisuwđji bipini; bil nyani Ribika inga marrbulanggitdjini Djakupki.

<sup>29</sup> Wurpil walirrdji, bilakinjing Djakupdji minitjigining gidjirri batjini kiriny, nyani Yisuw wiňiniban gumbala maypilngiri, ngal-butđjiliban mirrpi. Nyani ragilaban wininili nyibirri gulmingim nyininy, <sup>30</sup> girri inga bindjin, "Irr bali kirim waligi, bi irriny kuw nyibi djinimkima budibudigili gidjirri nyuni batjin kirimban." (Bilapilangdji wurpi yagirri Idum (Edom) djin yirrpini nyaninyi, gima ngungirang bimbi miri 'budibudigili' djanngamirrppmi yanmirrppmi.) <sup>31</sup> Nyani butjalmini waligi, bil nyani Djakupdji bumir-wubirdjili, "Bidak, milimiti nyini gunydjirrgirang, a ngunukining nyani balidji ngili il rarri-gaypigibān nyim ngunupilang mala nyani gatjigi djilikima. Miri nyuni marrgi galbi gima milimiti inga, bil ngarri yarim marri warrnguwili irr marrgi nyannangang, bilapilang nginmilang rum inmila bultjinmi. Marrga ngurrwakng ngarri nyirr gunji djinimkima wali, nyuni miri yitjidjidi miri ngirrarki irr galiki bukmak girripili mala nyuni guyum ngunupilang marrgi gunydjirrngir rirringir nyani wirrdjidji. Bilapilang il bumir-tjamigi." <sup>32</sup> Girri Yisuw inga bindjin, "Ngiy manymak, ngarri djini-kuyimban irr balidji, bil djining milimitang rum ingkibān irriny gunggatjigibān djini'djiningkima! Irr yitjidjini miri nyuni galiki bukmak ngunukima girri mala." <sup>33</sup> Girri Djakup inga bindjin wanginban, "Bidak, ngurrwakng nyuni irriny murr-raniban, miri matit murr-randinirbi irriny kuw marrga bukmak ngunukima mala irr galiki yirrimban." Girri nyani Yisuw murr-rangirriban, a bilapilangdji nyani djil-imdjili Djakupali warrpam nyanngang butal mala guyumpiligi. <sup>34</sup> Rirringir ngunungir Djakupdji nyaniny gungiliban nyibi wali a nyibi gidjirri. Girri Yisuwđji dirradjiliban, inydji waykungili, girri gubiniban wiňinngiri. Bilapilang Yisuwđji ngaminyi-bultjidjiniban ngunukima manymak rum milimitang.

## 26

### *Yisak yalkuy gurrbidjili wurpirri djawalmirri bilakinjing walinyirring bilidjirri*

<sup>1</sup> Djinipan wurpi djanguny Yisakbi, ngunukining djawalmirri Kananmirri bukmak yulpili djin nguy-walinyirringdjini gima mayurrknyirringi giliwilingi djin nyininy. A djining wurpi djiningkima walinyirring bilidjirri, ingki ngunung ngurrđima walinyirring bilidjirri miri biligi

bilapilakinjing Abrayamar bilidjirri, biling rarrmalipm. A djining djanguny birraldjini rirringir Abrayam ngurrum balini, a ngunukining Yisak ngurrum mungan-miyilkgingdjini, bil nyanimngim inga nyani bidak gapalmirrpilidjnyiri.

Yisak a nyanggang mala ngalbirki djin nyininy giriny, marrga nyanggali minydgjin girali Abimilikili ngunung ngurrdawalangu yul Pilitjayingi bapururrurgi nguli Girar gurbimirri nyininyi gurrlpulumirri ngidjirrkng gapi djalkng.

<sup>2</sup> Miri Goddji Yawaydji ngurrum inganydji mil-lirrpini Yisakgi a bindjin inga wanginban, "Ingki ngunyili nyuni giri Yidjiptili djawalili; bil ngidjirrkng nyuni gurrbidjigi nyibirri ngunupilangmirri ngarri gurrbii inmarr bultjigi. <sup>3</sup> Yarim nyuni bar-kalikiban ngulikima ngunung ngurrigma gurrbimirri, a ngarri inmarr djamadjigi a nyirr gunggatjigaban. A djiniwili gurrbipili nyuni djiny nyami ngarri djinikiwiliny nyirr gungi, miri nyunguli a nyungung mala-punyirbili. Bilapilang ngirrang djanguny ngarri inmarr birraldjnyirdjigi, ngunung yan ingarr murrr-rangirri ngurrwakng nyungung gunydjirrgirki Abrayamgi. <sup>4</sup> A nyungung mala-punyirbige ngarri djinyirr galbidjnyirdjigi miri gulukng wana bilabilang miri ngunuwili gatapili ginimbirrimirri dji'tjarri mala, a nyungung mala-punyirbi djin marrgi bukmak djinikiwiliny djawal mala ngirrangir gumbirrnngir. A bilapilangibi nyungung mala-punyirbibi, bukmak bapururr mala djili munatjamirri djani djin marrkapdjidji. <sup>5</sup> A warppam djiniwiltji manymak mala ngarri inmarr bultjidjini, djani yirrimkima djin birraldjidji, gima nyani Abrayam butjirgindjini ngunukining irr witjili nyanyiny, a ngirrang yan nyani gatjidjinaban, miri ngirrang yan-kunyirbi mala, ngirrang rum mala, a ngirrang raypirri mala." Bilapilang God inga bindjinban Yisakgi.

<sup>6</sup> Marrga nyani Yisakdji yalkuy gurrbidjili nguli Girar gurribiwi.

<sup>7</sup> Bilapilakinjini ngunitjini Girarmimigi yulpilingir maladji djin nyangini nyanimngim inga, girri nyanyinyi djin butjalminiban miyilkibi, inga djin bindjin, "Djinim wari?" A nyani djina bindjin wangin, "Nyani gadingim irra," gima nyani yawngini djina bintji wangidji, "Djinim ngirrang nyanimgimi." Miri nyani gingini, "Mayalimirrpom ngarri djinarr wangidji, bintji yulpili mala djingirapibi gurrbibi djani irrnyi djin bungban, marrga Ribikany djin djamigi, gima djal-malimaling mirrpni nyani."

<sup>8</sup> Manymak, rirringir Yisak ngurrum nyi'nyininy nguli marri giliwilingi, nyani Abimilik nyininy kiriny nambidi nyanganngar bala'mirri, a milakngir nyani miniminirngili, girri Yisaknyi nyanganban dutjny kiriny nyanggang miyilk Ribikany. <sup>9</sup> Marrga rirringir ngunungir-kirri nyani Abimilik inga witjili Yisakgi, a ngunukining nyani inga yulgungili, girri Abimilik inga bindjin, "Ngunung miyilk yirrimkima nyungung nyanimngim marri! Nyimki bindjini nyuni irra wangini, 'Nyani djining ngirrang gadingim'?" Girri Yisakdji nyanyiny bumir-wubirdjili, "Ngarri bindjin inmarr wanginban gima irr gingini miri inydjirr marrbigi wanngingir marri, bilang wari ngunupilang inga budjirr-djalngdjidji." <sup>10</sup> Girri nyani Abimilik inga wanginban, "Bina nyuni djiringini nyabinakinjing mari nyuni bapili gangi nginbilangi? Bilang wurpilim yuldi djingirapibi nyani waymirri ngurrinyir nyungur miyilkdjii, wana maribam inbiliny barinyirban, miri nyungungpibi murkunyirbibi!" <sup>11</sup> Marrga Abimilik djiny yan-kungiliban bukmaknyi yulpilngiriny nyanggangi, nyani djina bindjin, "Bilngiriny lim gubidji djingiriny yul a nyanggang nyanimngim. Marrga wili ngunupilang gumbirrdji bilngiriny mal-djatdjigi, yirrimban nyanyiny minydgji lim raniban, a nyani balidjiban." Girri Abimilkdji mil-pultjidjini Yisaknyi, girri nyani Yisak gurribilaban wiñiniban.

<sup>12</sup> Rirringir ngunungir-kirri nguli Yisakdji minitji lamudjili munatjamirri wurpirri-wurpirri ngidjirrkng nyanngar gurrbimirri, a djampan rirringir ngunung wali djurrall nyani djarngili a gurtjili mirrppmi galbi wali ngunung ngurrgima gunmal, gima Yawaydji manymakdjili djamadjili inga. <sup>13</sup> Miri Yisakdji ma'marriny kiriny girri mala a maypal mala bininy kiriny ngurrgima, yarimipm nyani rrupiya-galbingakindjinibar. <sup>14</sup> Miri mirrppmi galbi mala nyani gatjidjini galkngu maypal bimbipili, bulukipili, a djamaginpili mala. A bilapilangirgi ngunitjini Pilitjayin mala djani ngurryrrpiniban nyaninyi djin mil-dinytjiliban. <sup>15</sup> Marrga gunyambiban djin ngamangamadjili Yisakgi.

Miri ngurrwakng bilakinning Abrayam bilidjirri, Abrayamang djamaginpilingir djani djin gamirrdjini gapigi wurpirri-wurpirri gurrbipilimirri nambidi ngunung ngurrgima djawalmirri, a girkiling djin manyangini nguymirri munatjamirri, girri ngunungir walirrngir ngunuwili ngambul mala minydjin dji'tjarrinyipm, miri mani-girrirrkginpili djani.

Manymak, Yisakgi djani mari djin djamadjili djinimirri; yarim bubalikining mani-girrirrkgining ralal nyanngang gunydjirrgirang djamaginpilingir djin gamirrdjini mala, ngunkuwiliny djani ngunitjini Pilitjayin yulpilingir djiny djin ngurri-barngilinan djaaltjiri, bilapilangdji djin minibili ngunuwili ngambul ralal mala, a djiny djin mirgidjnyirdjiliban Yisakgi.

<sup>16</sup> Girri nyani Abimilikdji bulu-nguliban Yisaknyi, nyani inga bindjin, "Nyuni miri minydj iylitjirrdji nginbilangir, gima nyunung mala ngurrum djin galbidjini miri gididjirringi, ildji bir-mati<sup>t</sup>djinibar nginbilangi."

<sup>17</sup> Marrga nyani Yisak wurlipi gurbili yilitjinibar marri bilay Abimilikngir, girri gurrbidjili budjirrminty gapinyirring manimirri, yarim wirr gapi wirrwirrdjnyir kirinyir gima wirrpili gurribi ngunung, a mayurrk wirrban. A marri galbi rarranydjarr nyani nyininyipm nguli mani bandanymirri ngidjirrkng Girar gurribi. <sup>18</sup> A bilakinning ngulipm, nyanngang djamaginpili nyani djiny yaniliban gapigi, marrga madjirri djin lapmiyi ngunkima gayping ngambulpili Abrayamang djamaginpilingir djin gamirrdjini baman pirr, ngunung ngurrgima ralalpili ngunitjini Pilitjayin maladji djiny djin ngurri-barngilin rirringir Abrayam wirrdjini. A nyani djiny yagirr-yirrpini ngunuwilli mani-girrirrkginpili bilapilang ngurrgima miri Abrayamdjii djiny yagirr-yirrpini ngunkuwiliny bili.

<sup>19</sup> Wurpilim walirrdji, Yisakang djamaginpilingir djin gamini kiriny gapigi nguymirri ngunung mani bandanymirri, a ngunung ralal wurtjiliban, girri gapi girkiling buwalbuwaldjilibar. <sup>20</sup> Bil ngunkuning ngunitjini maypal-djakadjnyakinpilingir ngungirapibi Girarbi gurrbibi djin marrngini ngunung, djiny djin yimirrdjinibar Yisakang maypal-djakadjnyakinng malany, a djina djin wanginibar, "Djinim gapi nginbilangipm!" Marrga Yisakdji yagirr-yirrpini ngunung djatja Itjik (Esek), gima djanngamirrppm yanmirrppm nguni mayali gatjimni miri 'Winytjnyirbi'. <sup>21</sup> Rirringir ngunungir-kirri djin gamirrdjini wurpi ralal gapigi, bil madjirri ngunitjini Girarbi maypal-djakadjnyakinpilingir djiny djin yimirrdjinibar, marrga Yisakdji yagirr-yirrpini ngunung ngambul Djitna (Sitnah), a ngunung mayali bilapilang miri 'Ngandarrkmiynyrbi'.

<sup>22</sup> Girri nyani yilitjini ngunungir gurribingir, a wurpi gurribi marrngili. A nyanngang djamaginpilingir madjirri djin gamirrdjini ralal gapigi, a djatja djin bipini. Ban djini'djining ngunitjini wurlipi maladji ingkiban djin yiminirban. Marrga ngunkima Yisakdji yagirr-yirrpini ban Riyubut (Rehoboth), gima ngunung gatjidjini mayali bilapilang miri djining djanguny

djin wangini, "Djini'djining walirr Yawaydji gadjigarr inmiliny gungiliban lim ngalwartjingilgi djili, a lim galbidjidji djawalmirri djilikima."

<sup>23</sup> Guyumi ngunungir gurrbingir nyani yilitjini, a walmini ngunyili bukilili, a yulgungili Biya-Djiba gurrbiwi. <sup>24</sup> A rirringir nyani yulgungili, ngunung ngurrgima maliri nyani Yaway inga birraldjinibar, a bindjin inga, "Ngarri djining Miligidji nyungung gunydjirrgirki Abrayamgi. Ingkibar yawngiyi gima ngarri nyirr djakadjim girim. Ngarri nyirr gunggatjigi, a nyungung mala-punyirbi djiny irr galbidjnyirdjigi. Bilapilang irr djamadjigi nyungungi, gima ingarr marr-bulanggitdjini Abrayamgi ngirrang djamaginingirgi." <sup>25</sup> Girri nguli ngurrgima gurrbimirri nyani Yisakdji yip mutjpiningiliban rirrkiyanpili, marrga bumir-kirrbigi Garrayni, a ngulikima nyani inga bumirgindjini Godki nyanganmirrpum yagirrmirrpum Yawaymirrpum. A nguli nyani winin yirrpini, bilaklinjing nyanganngang djamaginpilingir djin ngurr-yirrpini djin gamirrdjini gapigi.

<sup>26</sup> Ngunukining bilidjirri, Girarngr gurrbingir nyani Abimilik bi giriny nyininy Yisakili, a nyanganngar nyani gangili Ayudjat (Ahuzzath) nyanganngang balpirginning a gunggatjnyakinning, a ngunukirri yul Pikul ngunung ngurrdawalangu yulpilngirgi gamununggupilngirgi Abimilikang. <sup>27</sup> Inga djin yulgungili, girri nyani Yisak djiny butjalminibar, "Nyimkiban ngildji irrin ildji balparngili? Yarim ngurrum irrin ildji bir-yirrpini, girri irrin ildji badji-nyanganinban ngildjangir." <sup>28</sup> A djin bumir-wubirdjilinan nyanyiny, "Nginibi yirrimban nibi djiringini nyani Yawaydji bindjirri kirim ngurrgima nyin gunggatjim girim, marrga nginbilang ginginyirbi bilapilang gam'. Miri nyungung galii, a nginbilang galii, inydi lim murr-ranibar, lim djamadjigi matit nu-yirrpini miri ingki inydi lim mari-djamadjigi inydi limi. Nyuni murr-rani a ngarri, rum magaya il yirrpigiban nginmilang, miri il matitdjigiban. <sup>29</sup> Miri nyunitja ingki inbila nguy-murmurdji giri yarim bilapilang miri nginibitja ingki inma nibi mari-djamadjnyir girinyir. Nibi birliny giriny ngurrgima inma nibi mil-bilbaldjny giriny nyungungkima, a nibi mil-pultjdijini nyuniny magayadijpm. Ngly, djin'djining a ngunylatjuy inma nibi bir-bulanggitdjidi gima nyuni yul marr-bulanggitjnyirbi Yawaybi." <sup>30</sup> Girri nyani Yisakdji maypal a wali galngarrarradjili djanngang, girri djani warrpam djin nyinininan wurpilpm, djin dírradjilinan Yisakang mala a Abimilikang. <sup>31</sup> A malipmalir gunyirri inydiin waykungili, girri biling Abimilik a Yisak biri-biri bil nyinininan, girri inydi bil murr-rangirriban inydi bili. Girri Yisakdji djiny bubudjili, girri Abimilik a nyanganngang yulmirrpili djin gubininan miri miy-batpirrginingban djani Yisakang.

<sup>32</sup> A ngunung ngurrgima manngibirri Yisakang djamaginpili bi girali nyanganngali, djanguny inga djin birrungili gapibi gima djin malimdjili gaminirngir, inga djin bindjin wanginban, "Way! Gapi nibi birraldjnyirdjilinan!" <sup>33</sup> A nyani yagirr-yirrpini ngunukima ngambul Djiba (Shibah), a ngunung mayali bilapilang miri namba 7, a bilapilangdjidi ngunung gurribi nyanganngang mala-punyirbili mutjpiningili ngulikima ngunung djin bultjdijini Biya-Djiba, a ngunung ngurrgima yagirri dji'tjarri kirimpum djini'djining ngungirkirri gurrbigi.

<sup>34</sup> Manymak. Ban Yisuw, Yisakang milimiti, ngunukining nyani gatjiddjini 40 gunmal a rarrandjarr, nyani mungan-miyilkgindjininan. Bingili miyilkmirrpili nyani biliny marrngili, yagirri bilingga Djudit (Judith) walkirngim Biyriyang (Beeri) ngunung Yitayit yul, a ngunung wurpitji miyilk yagirri Batjimat (Basemath), walkirngim Yilunang (Elon) - wurpi Yitayit yul. <sup>35</sup> Bil ngunupili miyilkmirrpili mirikunu bili, a bilingapibi miyilkmirrpili biling Yisak a Ribika bil nguy-ginirgindjini wana.

## Djakup inga mani-wangini gunydjirrningirgim

### 27

<sup>1</sup> Ngunukining nyani Yisak ngurrum wurrungdjini, nyani mil-djumilidjiniban. Wurpilim walirrdji nyani inga witjili nyannang milimitigi Yisuwgi, girri inga wangin, "Walkira!" "Ngiy gunydjirra?" Yisuwdjii bumir-wubirdjili. <sup>2</sup> A Yisak bindjin wangin inga, "Nyuni nyamban ngarri mirrpmi wurrungi, a nyadji ngunupilang ngidjirrkngban irr balidji. <sup>3</sup> Nyuni marrgiban nyungung bow a arrows mala, girri ngunyili giri murruurtli, a bungban maypal ngirrki. <sup>4</sup> A ngunukining nyuni birrug i ngunung bapili, batjirriban, a djamatadjwi ngunung latju gidjirri ngarri djal, girri bi gangi bapilipm ngirrki. Rirringir dirradjnyirngir, ngarri nyirr gungban djanguny ngirrapibi guyumpiligi, marrga nyani God irra butjirmarnggidjidjiban, girri nyani inma birraldjnyirdjigi ngunung djanguny. Miri ngarri bindjin inmarr bultjigi ngunukima djanguny ngurrwakng irr wirrdjidji."

<sup>5</sup> Bilakining Yisak inga wanginy kiriny Yisuwgi, nyani Ribika butjir inydji guny kirinyban. Marrga bilakining Yisaw bilay, <sup>6</sup> nyani inga wanginban Djakupgi, inga bindjin, "Yarimban irr marrngini nyungung gunydjirripm inga bultjidjini Yisuwgi miri bindjin, <sup>7</sup> 'Maypal buwi, batjirri, girri irrin y gangban. A rirringir dirradjnyirngir, ngarri nyuninyy irrir gungban ngirrang djanguny guyumpiligi, marrga nyani God butjir-marnggidjidji, girri inma birraldjnyirdjigi ngunung djanguny. Ngarri bintji marrga God inma yitjidjidji ngurrwakng irr balidji. Bilapilang nyani inga wanginiban Yisuwgi. <sup>8</sup> Bil irrin y marrngirriy gapirra. Djini'djining nyuni miri bintji djamatadjigi miri djining ngurrgima ngarri inmarr bultjigibin. <sup>9</sup> Gar-gurryilili nyuni giriban nginmilali maypal malali, girri bingili nanikutmirrpili nyuni bilnyirr rindiligi, yarim yuwardjingmirrpili gultjiginingmirrpili, a bapilipm bilngiriny gangban. Ngarri bilngiriny irr batjigi, irr djamatadjigibin ngunung latju gidjirri, ngunukima nyungung gunydjirrnmg djalngdjirri wana. <sup>10</sup> Girri ngunung wali nyuni inga gangi dirradjnyirgi, a nyani gingidji nyuni ngunung Yisuw, girri nyungulibin nyani gungi ngunung djanguny milimitang, ngurrwakng nyani wirrdjidji." Bilapilang Ribika inga bindjin.

<sup>11</sup> Bil nyani Djakup inga wanginban mumngimngirgim, "Nyuni marnggi miri Yisuw nyani mapalbini' a guyiligin, bil ngarri wirr, ngirrang gilingkal guyilinyirring. <sup>12</sup> Ngunubilang gunydjirrar irrin y maldjatdjigi gumbirrdji, nyani marnggidjidjiban ngarri mayalidji irr ngaginmi nyanyiny miri bindjirri, girri ingkibin nyani irra bultjigi djanguny butal bil djanguny mirkngi marrga nyani irra barranggadjigi gunyambili." <sup>13</sup> Bil ngambirrnngirim bumir-wubirdjili, "Marriban gapirra, ngunubilang nyani barranggadjigi nyuninyy, nguni maridji bargibin ngirrali, ingki nyunguli, gima djiningkima ngirrangi p mayali. Yarim nyuni irra butjir-gindjidjiban, guwu a nanikutmirrpili bilngiriny bagiligidbin ngirrang."

<sup>14</sup> Marrga nyani Djakup giralibin, bilngiriny marrngili nanikutmirrpili, bilngiriny bipini, a munydjal gangiliban ngambirrnngirali. Girri ngambirrnngirim batjidjini latju gidjirri butal ganirbi, miri ngunung ngurrgima gidjirri Yisak djalngdjini dirradjnyirgi. <sup>15</sup> A Yisuwang manymak mirikal mala ngurriny kiriny ngulikima nambidi wininmirri, marrga Ribikadji inga marrngili nyibi mirikalpili, girri djiny yirrpinban Djakupili nyannang djirrakayili. <sup>16</sup> Girri Ribikadji gumbirrmirrpili inga nyani garrrpinban gilingkalldji nanikutdji marrga Djakupang gumbirrmirrpili bil

guyiligidjidji miri ngunung ngurrgima Yisuwang, a guraki inga nyani ngagirrdjini gilingkaldji nanikutdji gurrkunyi.<sup>17</sup> Girri ngunukima latju gjidjirri nyani galwupini nyanngar gumbirimirri, a dampa nyani batjidjini girrgima.

<sup>18</sup> Girri nyani Djakup minyndji ragiliban nyanngali gunydjirrungirali, nyani inga bindjin, "Gunydjirra!" "Ngiy walkira, wari nyini?" <sup>19</sup> "Ngarri Yisuw gunydjirra, nyungung milimiti. Ngurrumban maypal irr bipini miri bindjin ngurrgima nyuni irra bultjidjini. Inydi waykungban a nyinidjiban, nyuni dirradjigi djining maypal inmarr bipini, girri rirringir ngunungir-kirri nyuni irriny gungban nyungung djanguny milbimirri Gar-rayar." Miri bilapilang Djakup inganyndji yulili gunydjirrungirgim. <sup>20</sup> Girri gunydjirrungirim yanyanginban, "Bil nyalikidjini nyuni manyangini maypal bilapilangdji ganydjirrdjipm, walkira?" Djakup bumir-wubirdjili, "Garraydji nyungur Miligidjir nyanngarki irriny gunggatjili djingiriny irr manyangini." <sup>21</sup> Girri Yisak inga wangin Djakupgi, "Guwa, ngidjirrkng bi irra giriw marrga ngarri gumbirrdji nyirr mal-djatdjigi. Bina birral nyuni Yisuw?" <sup>22</sup> Djapup ngidjirrgili inga giraliban gunydjirrungirali, girri Yisakdji nyaniny mal-djatdjilinan gumbirrdji, inga bindjin wanginban, "Nyungung bimbi miri galkngu Djakupang, bil nyungung gumbirimirrpili galkngu miri Yisuwang." <sup>23</sup> Bilapilangdji nyani malubipini Djakupnyi, gima gumbirimirrpili biling guyilibini miri Yisuw. Girri djini-kuyimban nyani Yisakdji inga gunyiri nyanngang djanguny walkiringirgim, bil bidak, <sup>24</sup> madjirrtji nyani butjalminiban, "Bina birral galkngu nyuni Yisuw?" "Ngiy birralgima!" nyani bumir-wubirdjili gundjirrgiriny. <sup>25</sup> A Yisak inga bultjidjinaban, "Bi irra guw nyibi ngunung munydjalgining gidjirri. Rirringir irr dirradjigi, nyungkiban inmarr gungi djanguny ngirrapibi marrga Goddji inma manymakdjigi djamadjigi guyumpiligi." Girri nyani Djakupdji marrngilinan ngunung gidjirri, girri inga gungili, a nyani birrungili minim nganitji nyanngangi gurrkunyi, girri nyani dirradjilinan gunydjirrar.

<sup>26</sup> Rirringir dirradjnyirngir, gunydjirrungim inga bindjinban, "Guwa bapili walkira, nyuni irriny wundigiban djal." <sup>27</sup> Marrga nyani ngidjirrgili inga girali, girri nyaniny wundiniban. A Yisakdji nyumirrdjininan bungan inga mirikalbi Yisuwangpibi, girri nyani marr-pirralkindjininan ngunung nyannang walkiringim Yisuw. Rirringir ngunungirr-kirri Yisakdji inga gungiliban ngunukima djanguny bitma milimitigi. Nyani inga bindjin wangin, "Djining ngirrang walkingirang bungan latju mirrpmi, bilapilang miri bungan murruertbi miri ngungirapibi gurrbibi nyani Goddji djamadjili manymak nginmilang miri maypalcining a waligining."

<sup>28</sup> Walkira, nyani Goddji mayurrik inma yani, a munatja nyani inma manymakdjigi. Marrga ngunukining nyuni djal-rani, galbi inma djurri kiriban wali. A nyuni bintji kiri ngurrgima marrgi galbi wali a gambilki miri nganitjigi. <sup>29</sup> Yulpilingir galbibi malabi djani inma djin djamadjigi, a mulkurupilngirang bapurrrurdji maladji inma djin gungi-baltjigi. A nyuni djina bunggawadjidji djanngangi miri bukmakgi nyungung gurutiginpilngirgi, a warrpam nyungung ngambirrungirang mala-punyirbi mala djani inma djin guraki-gupildjidji. A nyani God inma djamadjigi djinimirri, ngunubilang wirapili ngunupilang djin manyangi inma djin rarri-wangidji, girri nyaniitja djina rarri-wangidji. Bil ngunubilang wirapilingir ngunupilang nyin djin birdjigi, girri nyaniitja djiny birdjigi a djiny gunggatjigi." Bilapilang Yisak inga bultjidjini djanguny marrga nyani God butjir-marnnggidjidji, girri inga birraldjnyirdjigi ngunung djanguny nyanngang walkiringirgim.

### *Yisuwiji birraldjnyirdjili Djakupdji gar-yulili nyaninyi*

<sup>30</sup> Ngunukiñing Djakup djini-kuyim girali gar-gurryilili, djayurrkdjurk nyani Yisaw yulgungiliban maypalngir. <sup>31</sup> Nyani girri gidjirri batjidjini latju gunydgirrgirki, girri inga gangili. Nyani inga bindjin gunydgirrgirki, "Inydji waykungban gunydgirra, nyuni nyinidji a dirradjigibar djining maypalgining gidjirri ngarri inmarr birrungili. Girri nyuni irra gungban ngunukima djanguny marrga Goddji irriny djakadjigi." <sup>32</sup> "Wari nyini?" Yisakdji butjalminiban. "Nyungung milimiti Yisuw" nyani bumir-wubirdjili. <sup>33</sup> Girri nyani Yisak ngurr-yirrpiniñan galngi-wurrwurrtjiniban, a nyani butjalminiban, "Wili bilang ngurrum bipini maypal, a ngirrali irra birrungili? Irr malimdjilinan djini-kuyim ngurawakng nyuni irra yulgungili. Ngungirki yulgi ngarri ingarr bultjidjini nyungung djanguny, a ngunung djanguny miri inga dji'djirridjipmaban ngunyili yipi!" <sup>34</sup> Ngunukiñing nyani Yisuw djining marrngini, wargugungir wanangir nyani witjilinan mirrpni nami, girri gunydgirrgirki inga wanginban, "Ngirrkaban girrgima djanguny irra gungban, gunydgirra!" <sup>35</sup> "Bil walkira, nyungung gulmingirim ngurrum mil-gangliban ngunukima djanguny inmarr manyangini nyungki! Nyani bi irra girali, girri irra mani-wanginban." <sup>36</sup> Girri Yisuw inga bindjinban, "Bumiri bingilipmaban nyani irriny gar-yulili mayalidji. Ngarri marnnggihan nyimki nyuni yagirri-yirrpini nyaninyi Djakup, gima mayali miri bilapilang 'waparr' ngunukima yagirri. Ngurrwakng nyani djamirrdjini bukmak ngunung girri mala ngarri bilang irr marrgi rirringir nyuni wirrdjidji, a djini'djining nyani djamirrdjini ngirrang djanguny guyumpilgi! Gunydgirra, marri wurpmpim nyuni irra galdirrdjini ngirrki djanguny dampingi, ngangi?" <sup>37</sup> Bil Yisakdji bumir-wubirdjili Yisuwnyi, "Wirr walkira, ngarri ngurrum nyanyinbunggawadjnyirdjili nyungung, a ngarri djining ingarr yirrpini miri bukmak nyanganng gurrutiginpili djani inga djin djamagindjidji, a ngarri ingarr bultjidjini nyani Goddji inga gungi galbi wali a nganitji, marrga nyungung w提醒 bintji kiri ngurrgima matitdjidji a dulpidjidji. Ngarri irr mirrbilali wirr nyanganngir, walkira, marrga nyalikidjidjiban djanguny wurpi inmarr manyangban djini'djining nyungung?" <sup>38</sup> Girri Yisuwiji bumir-duwat bu'putjalmini gunydgirrgiriny, "Ingki gunydgirra, bil yarim dampingipm djanguny nyuni irra manyangban, girri irra bultjigi marrga Goddji marrngirrdji. Nyabini yarim dampingi nyuni bintji irra bultjigi djanguny ngirrki girrgima, gunydgirra? Marrga ngirrki wurpi Goddji irra manymakdjigi djamadjigi!" Yisuw ngadjny kirinyban. <sup>39</sup> Girri nyani Yisak manyangini djanguny, girri walkiringirgin inga bultjidjini marrga nyani God butjir-marnnggidjidji girri inga birraldjnyirdjigi ngunukima djanguny. Nyani inga bindjin, "Ngunung gurrbi nyibirri nyuni nyinidji ngunukima wirrpildjidji nyunungi, wirr inma rikidji giri, a munatja inma mirgidjidji, ingki inma djurri giri galbi wali. <sup>40</sup> Miri wapirrimirri rummirri nyuni nyinidji, a wali nyuni marrgi nyungur mandjawakdji; nyungung gulmingim nyani yagirr-wanadjidji, bil nyuni yagirr-ninindjidji marrga nyuni inga djamadjigi miri bintji ngurrgima nyani nyin yan-kungi. Bil guyum ngunupilang nyaninyi nyuni burrdji gungi, girri nyanganngir gumbirrungir nyuni butdjigibar."

<sup>41</sup> Rirringir ngunungir-kirri nyani Yisuw nguy inga margindjiniñan Djakupgi, gima Djakupdji marrngili nyanganngipm djanguny gunydgirribi. MARRGA nyani gungi inydji ngamangamadjili nyani bungi gulmigipm. Nyanibi inydji wangini, "Ngunung walirr nyadji inga lim ngadjidji gunydgirrgirki ngidjirrkngban bi inmila girim nyinibar, rirringir nyani wirrdjidji ngunukiñingban irr bungban Djakupnyi." <sup>42</sup> Bil wari ngunupilang

butjir-marnggidjini yan inga milimitang, girri Ribikany butjirgindjili. Ngunukining nyani Ribika marnggidjini Yisuwang ginginyirbi, nyani inga yan-kungiliban djirrakaygi Djakupgi miri nyani bi inga giri. Nyani yulgungili, girri ngambilrngim inga wanganban, "Marrngirriy, nyungur wuwar nyin ging kirimban djampam nyin rani." <sup>43</sup> Miri bintji nyuni djamadjigibar gapirra. Djini'djining nyuni minydji nunydjirriban, a ngirrali wuwngralira inga giri, ngunukima yul Laban nguli gurrbimirri Yaran nyini kirimi. <sup>44</sup> Girri nyanngar nyuni bar-kalikiban, yarimipm Yisaw nguy-djunggingir nyanibi inydi djanadjanadjigi, girri inma nguy-mingindjidji, <sup>45</sup> a nyani marrbigibar nyaliki nyuni gar-yulili nyaniyi. Girri nyunguli ngarri irr yaniban wirinyi marrga nyani nyin bagililiban ngunungir gurrbingir. Nyuni giribar bintji nyimilinyirr marrbigi ngirrang gapirimirrpili wurpmmirri walirrmirri. Miri bilang Yisuwajji nyin bungi, wili ngunupilang nyaniyi bungban gima nyani muningdjini, bilapilangdjidi walirrmirri wurpmmirri irr yidjipilinyirringdjidjibar."

### *Yisakdji minydji yanili Djakupnyi marrga miyilknyi marrgi*

<sup>46</sup> Girri Ribika inga girali Yisakgi, girri inga bindjin wangin, "Wanngi irr mirgidjinibar bilingapibi ngunupili mulkurumirrpili miyilkmirrpili Yisuwajji biliny marrngili, ngarriban bilinggarr gudjirrdjirri mirrpni. Ngunubilang djingirapibi Yitayitbi bapurrrurri nyani Djakupdji marrgi nyanimngim, manymaktja irr balidji djini'djining bintji wanaban irr nyinidji kiri wargugugining ngungirapibi miyilkibi Djakupang."

## 28

### *Djakupdji birmirrpilidjili Garrayni gurrbimirri Bilil*

<sup>1</sup> Girri nyani Yisak inga witjili Djakupgi nyanngang walkiringirgim. A nyani Djakup inga giralibar, girri nyani gunydjirrungim inga birbulanggitdjini, girri nyani nyin yan-kungiliban miri bindjin gam': "Ingkibar djingirapibi mulkurupilngirapibi nyuni inma marrgi miyilknyi, miri ingki djingirapibi Kananayitbi bapurrrurri rindiligiw!" <sup>2</sup> Yarim ngunyiliban djayurrkdjurrik nyuni giribar Padan-Aramili gurrbili, nyuni bal-pargibar gaykiyirirny nguli gurrbiwi Bituwilang nyungung ngatjtijingim. Girri ngulikima miyilk inma nyuni rindililiban, bilapilang nyuni marrgi nyanimngim inma nyungupibi gurrutiginpilngirapibi, miri wurpmigma Labanang walkiringim nyungung gaykiyngirang midipili. <sup>3</sup> A ngarri inmarr butjalmidji Godnyi ngunung Ganydjirrgining Miligidji miri bilapilang gam'. Nyani Goddji nyin gunggatjigi, marrga nyuni walkir-marrgi galbi, marrga nyungupibi wurpi-wurpi bapurrrr mala inydi ngurriban. <sup>4</sup> Ngiy, nyanyirr irr butjalmidji miri nyani nyin gungi ngunung ngurrgima murr-randinirbi nyani gungili Abrayamnyi biligi, marrga nyani inma mil-wurdjigi a nyin gunggatjigi, a djagadjigi nyungung mala-punyirbi gurrkunyi. Nyani bintji djina djamadjigi marrga djining djawal djani minydjin galikibar inydi mungbinigi, djinikima gurrbi nyibirri lim nyini girimban, djingiriny Goddji gungili Abrayamgi." Bilapilang Yisak inga wangin Djakupgi. <sup>5</sup> Rirringir ngunungir-kirri Yisakdji minydji yaniliban Djakupnyi nyanngang djirrakay. A nyani giralibar ngunyili Labanang gurrbili, gima Laban nyani miri Aramiyanbi bapurrrurri yul, walkiringim Bituwilang, a Ribikang wuwngrim, a gaykiy bilingga miri Yisuwajji a Djakupgi, bilapilang.

### *Yisuwajji marrngili wurpi miyilk ngungirapibi malabi Yitjmayilangpibi*

<sup>6</sup> Ban Yisuwgi, nyani marnnggidjini ngunukima djanguny, miri nyaliki gunydjirrgim inga bir-bulanggitdjini Djakupgi, a nyaliki nyani but-jalmini Godnyi miri nyani djagadjigi gulmigipm bilakinjing girim nyini ngunyili Padan-Aramili gurrbili, marrga nyani marrgi miyilk ngungirapibi. A Yisuwrdji marrngini ngunukima djanguny miri nyalikidjini gunydjirrar butjir-karrdjini Djakupnyi miri bindjin gam', "Ingki nyuni marrgi miyilk djingirapibi bapurrrurbi Kananayitbi." <sup>7</sup> A Yisuwrdji nyangini nyalikidjini Djakup bilingga butjirgindjiniban gunydjirrgirk a ngambirrgirk, gima Djakup ngurrum giralibin ngunyili Padan-Aramili gurrbili. <sup>8</sup> A ngunukining Yisuwrdji djiny nyangini ngunukirri mala, nyani djiringinibin nyani murkungili ngurrwakng ngunukining nyani biliny marrngili ngunpili miyilkmirrpili ngungirapibi Kananayit bapurrrurbi, gima nyani nyangini ngunupiling miyilkmirrpilim bilngiriny bil nguyulkdjny kiriny gundjirrgiriny a ngambirrgiriny. <sup>9</sup> Marrga Yisuwrdji balparngili nyannangng gunydjirrgiriny Yitjmayil, a wurpi nyanimgim rindilaliban. A ngunukima miyilk nyani gadingimi Nibayutgi a walkiringim Yitjmayilgi Abrayamang wuwngimi, a yagirri inga Mayalat. A nyani marrngili djingiriny miyilknyi gurrkunyi rirringir nyani ngurrum biliny gatjidjini ngunupili bingili wurpiwili miyilkmirrpili.

### *Djakupdji birmirrpilidjili Godnyi nguli gurribiwi Bitil*

<sup>10</sup> Manymak, nyani Djakup gubini Biya-Djiba gurribiwi, a larrban ngunyilipm Yaranili gurrbili nyaling nyani Laban nyi'nyininyi. <sup>11</sup> Malngiri, walirr ngurrum mungan inydi yirrpini, nyani guldjili nyibirri ngunupi-langmirri murrurrtmirri, gima ngurrum gar-malirdjiniiban. Rirrikyan nyani marrngili, galwupini munatjamirri, girri gungili bukurrrngili a ngurrinyiniban yakirrigi. <sup>12</sup> Bil nyani bulkiniban. Nyani mabugi nyangini bilapilang gam'; baltjnyirbi mala nyani nyangini, miri djili munatjamirri mungan-yirrpini, a nguli ginimbirimimirri guraki-galwupini qamnammirri, bilapllang. A nyani djiny nyangini Godang wugili djamagining mala djani ngunyili djin baltjnyirbi mala nyani nyangini, miri djili munatjamirri djanginjing ngunungir. <sup>13</sup> Girri nyani nyangini Yawaynyi djarri kirim ngidjirrkng nyanganng. A nyani Yaway inga wanginban, "Ngarri Yaway, Miligidji Abrayamang nyungung mar'mingngirang, a Miligidji Yisakang. Djining gurribi nyaling nyuni ngurri kirimban ngarri nyirr gupirrgungi miri nyunki a nyungung mala-punyirbigi. <sup>14</sup> Nyungung mala-punyirbi djani djin galbidjidji bilapllang miri midjirri munatjamirri ngurri kirim, a ngildji ngunyili-ngunyili inydi ildji garrwurdjigi - miri djimurruli, barrali, lunggarmali, a djalatjangili. A nyungumirrpni a nyungung mala-punyirbimirrpni ngarri djiny irr gunggatjigi warrpam bapurrrur malany marrga rummirri manymakmirri djin nyinidjiban. <sup>15</sup> Ingki marrbirri djining, ngarri inmarr djamadjigi a nyirr gunggatjigi; miri bilang ngunyili ngunupilang nyuni giri, ngarri bintji kiri ngurrigma nyirr djagadjigipm. A mari-djamaginpilngirgi ngarri ngandarrk djinarr djirridjiban nyungungi, marrga magayagining nyuni giri nyinidjji, a bapili nyirr wiñidjingilgi nyunguli gurribili djampen. Ngiy birralgima ngarri ingki nyirr marrbigi, bil yarim inmarr djamadjigi yarimipm irr malimdjigi bubalikinjing nyirr murr-rangirri."

<sup>16</sup> Girri bulkinyirbingir nyani Djakup binygadjiniban, a nyani wangin, "Birral, Yaway djiligima gurribiwi! Nyani gukirri kirim djilikima, a ngarri wawu ngurrinyini!" <sup>17</sup> A yawnginyirbingir nyani wurrwurrdjny kirinyban, girri bindjin wangin, "Djining mirrpni butjir-kanirbi gurribi!

Djinikima Godang gurribiwi marri; a djilikima Godang milak dji'tjarri marrga ngunumirri lim ragi ḥamili!“<sup>18</sup> Djadaw nyani inydji waykungiliban, marrngili ngunung bukurryirbi rirrkiyan, girri mungun-yirrpiniiban munatjamirri marrga ngunukima rirrkiyan dji'djirridji kiri miri gungilbilmiyakiningga. Girri gapi gidjirri djal-walibi nyani djululupmiyngili ḥamili rirrkiyanili, bilapilangdjii ngunung rirrkiyan djuyugindjinibar Godang.<sup>19</sup> Girri nyani bultjidjini ngunung gurribi Bitil, gima ngunung yagirri mayali miri ‘Godang gurribi’. (Guyumi yulpili djin mutjipingili bala'pili nguli, a yagirri djin yirrpini gurribiwi Lutj; bil rirringir ngunungir-kirri Djakupang mala-punyirbi madjirri djin bultjidjini ngunukima gurribi Bitil.)

<sup>20</sup> Girri Djakupdji murr-rangirri Garraynyi djining budjirr-randinirbi matit, “Ngunubilang nyuni irriny gunggatjigi, a ngunubilang nyuni dji'djirridji kiri ngirrar miri namkatdjinginakiningga ngirrang bilakinnga irr gukirri kirim, a ngunubilang nyuni irriny gungi wali a mirikal mala,<sup>21</sup> a ngunubilang nyuni irriny winidjingilgi ngirrali gunydjirrgirali marrga ingarr yulgungi magayagining, Miligidjiban nyuni ngirrang bintji kiri ngurrgima, yarim nyuni ngidawapm.<sup>22</sup> A djili djani yulpili inma djin bumir-baltjigi, yarim djilikima nyaling irr yirrpini djinim gungilbilmiyakiningga rirrkiyan. A ngunukining girripili mala irr marrgi, ngarri bintji inmarr djamadjigi gam: irr butbutnyirdjigi ngunitjini mala marrga 10-bi gandibi irr galbungi, girri wurpmi gandibi nyirr gungibar, bil wurpiwiltji irr galiki miri ngirrangipm, bilapilang.”

## 29

### *Djakup yulgungili Yaran gurribiwi*

<sup>1</sup> Rirringir ngunungir-kirri nyani Djakupdji gubini ngunung gurribiwi, girri minyddji giralibar djimurruli. Rirringir yakirri galbi djin bangiringili, nyani ngidjirrkng bi giriny nyininy Yaran gurribiwi nyibirri yulpili djimurrubi djin nyininy mala.<sup>2</sup> Nyani giriny nyininy, mani-girrirrkginning ralalban nyani mldji bipini gurrrpulumirri, a maypal bimbi mala - warrng-guwili gulukng, liw dap djin ngurriny kiriny rarrmalipm, miri nyani gulukng ngurrinyi rarrmalipm, a nyani wurpi gulukng ngurrinyi rarrmalipm, a bilapilang. Djani warppam djin marrkany kiriny marrga gapi djin dirradjigi. Miri maypal-djagaginiing mala ngungirapibi gurribiwi djani djin djaltjbiny giriny gapi djanngang maypalpilngirgi ngunungir ralalngir. A ngunung ralal djabiri djin minibiny giriny rirrkiyandji murribin, bintji maypal galmidji a gapi mirgidjidiiban.<sup>3</sup> Djanngang rum bilapilang gam: ngunukining bukmak ngunuwiltji maypal-djagaginiipili djin gurrkunyir nguli, giliwilim djin djaltjbinyir ngunung gididjirring rirrkiyan, girri ngunung djin yilbirtjnyir ralalngir, girri djin burrunyir gapi maypalgi malagi. Rirringir ngunungir-kirri ngunung ralal djin minibinyir rirrkiyandji madjirri.

<sup>4</sup> Manymak, nyani Djakup djina yulgungili maypal-djagaginiplngirgi, girri djiny butjalmini, “Way miygpila, nyalinggirapibi ngildji?” “Yaranngir gurrbingir,” djin bumir-wubirdjili.<sup>5</sup> Girri nyani djiny butjalmini, “Bina Laban walkiringim Nayurang ildji marnggi?” “Ngiy nabi marnggi ngungirki,” inga djin bindjin.<sup>6</sup> “Bina nyani manymak?” nyani djina bindjin. “Ngiy, nyani manymak,” djin bumir-wubirdjili, girri inga djin wangin, “Nyawi, nyangan midipili bi inmila girim nyinibar walkiringim inga Ratjil (Rachel), nyani djiny djudju-gam kirim Labanang maypal bimbi malany bapili.”<sup>7</sup> A Djakup djina bindjin, “Bil djini'djining yarim

balnggilipmban, ingkiban ngurrum ildja yulgunnyir ngunung bilidjirri ngunukining ildji gurtjigi maypalpili malirigi. Nyimkiban ingki ildji gapirigi djinikiwiliny maypalpilngiriny djini'djineng, marrga djiny ildji winjidjingilgi yurryarilli marrga djin dirradjigi bilakinjing walirr gurpin kirimipm?"<sup>8</sup> Bil djin bumir-wubirdjili, "Ingki nibi bintji, bidak. Djili nibi marrkang yarimipm djani maypal-djagaginpilingir djin birrugi bapili bukmakgima nginbilang maypal bimbi mala. Rirringir ngunungir-kirri ngnibi warrpam nibi yilbirtjigi ngunung rirrkiyan murrbini, girri gapi nibi marrgiban maypal malagi."

<sup>9</sup> A bilakinjing nyani Djakup djina wanginy kiriny, nyani Ratjil djina yulgungiliban gam kirimban Labanang maypal bimbi mala - nyani maypal-djagagining miyilk nyanganng gunydjirrgirki. <sup>10</sup> A ngunukining Djakupdji nyangini Ratjilnyi a nyanganng gaykiyigirang maypal malany, nyani Djakup giralibamani-girrirrkgingili, ngunung rirrkiyan yilyilmiyngili djabiringir ralalngir, girri ma'marriny kiriny gapi maypalpilngirgi gaykiyigirang Labanang yarimipm djin dulpidjini. <sup>11</sup> Girri nyani wundirrdjini Ratjilnyi, a ngurr-yirrpini ngadjinaban gima mirrppmi galngwakalbini. <sup>12</sup> Girri nyani inga bultjidjini, "Ngarri djining nyungung gunydjirrgirang gurrutigining, Ribikang gapirringim irri." Girri nyani Ratjil nunydjirralibamarrga gunydjirrgirki bultjigi. <sup>13</sup> A ngunukining nyani Laban marrngini ngunung djanguny miri gapirringim inga yulgungili, nyani ɻunydjirralibinga bir-kiri, gurkirrali nyanyinyi, a wundirrdjini, girri nyani birrungiliban Djakupnyi nyanganngali bala'li. Girri nyani Djakup inga bultjidjini bukmak nyim ngunupilang inga birraldjini ngurrwakngi mala. <sup>14</sup> Rirringir nyani Laban marrngini djanguny nyanganngabi, nyani bindjin inga wanginban, "Ngiy, birral galkngu nyuni ngirrang gurrutigining, ngirrangpibi bapurrrurbi!" A nyani Djakup nyininaban nyanganng wurpm rangu, miri inga djamadjny kiriny Labangi yarimban.

### *Djakupdji inga djamadjili Labangi marrga miyilkmirrpili marrgi*

<sup>15</sup> Rirringir wurpm rangu bangirngili, nyani Laban inga bindjin wangin Djakupgi, "Marriban nyuni ngirrang gurrutigining, ingki nyuni bilang irra djamadjigi yarimban. Ngarri nyuniny nyirr bayimdjigiban djamagi, yarim nyuni irra bultjigiban nyabinwili nyuni djalngdjidji." <sup>16</sup> Ban Laban nyani biliny gatjidjini midipilimirrpili - nyanganng walkirwilingim, a yagirri bilingang Liya (Leah) nyanganng galitjirringi, a Ratjil nyanganng mirrdjingi. <sup>17</sup> A ngungirki miyilkigi Liyagi, mil inga bilbaldjini; ban Ratjilgi, galngi inga latju, a nyani mirrppmi djal-malimaling miyilk. <sup>18</sup> A nyani Djakup inga marr-bulanggitdjini Ratjilgi a budjirr-djalngdjini inga, bil Liyagi wirr. Marrga nyani bumir-wubirdjili Labannyi miri bindjin gam', "Nyungki innmarr djamadjigi 7 gunmal a rarranydjarr, bilang nyuni irriny murr-ranibam miri djampen Ratjilnyi nyuni ranytili irra gungi miri nyanimngim irra." <sup>19</sup> Girri nyani Labandji bumir-wubirdjili, "Ngiy, butaltja nyanyiny irr gungi nyunguli, ingki wurpili yulngirali, gima nyuni ngirrang gurrutikining. Irr yitjidjirri, nyuni djilikima nyinidjibancg ngirrarban." <sup>20</sup> Manymak, 7 gunmal a rarranydjarr nyani Djakupdji inga djamadjili Labangi marrga Ratjilnyi marrgi. A ngunung bilidjirri nyani gingini yarim dambingipm galkngu warrngguwilpm yakirri, gima nyani mirrppm inga marr-bulanggitdjini Ratjilgi.

<sup>21</sup> A ngunukining ngunung bilidjirri inyджi malimdjili, nyani Djakup inga wanginban Labangi, "Girrban walirr ngirrang, nyuni irriny gungban ngirrang nyanimngim marrga liny ngurridjibancg wurpilipmban."

<sup>22</sup> Marrga nyani Labandji galngarrarradjili bungkul wana, a nyani djina

walidjirrdjini bukmakgi yulpilngirgi ngungirapibi gurrbibi. Girri bung-gulban djin buny kirinyi. <sup>23</sup> A djinimirri djanangang rum djarrinyini. Maliri nyani yul inga marrkang nyanngang murr-randinirbigi miyilkigi, nambidi wininmirri nyinidji kiri inga marrkam kirim. Girri gunydjir-rngirim nyani marrgibana nyanngang walkiringim, girri ngunung miyilk bi inga birrugibana ngunyili, miri nginipingirang wininili. Bil ngur-rwakng ngunung miyilk inga yulgungi, nyanibi ngurrum inydi garrpigi mirikaldji, bilapilang. Manymak, nyani Djakup inga marrkany kiriny Ratjilgi wininmirri, ngurrum maliridjini, bil ingki Ratjilnyi nyani Labandji inga birrunyir, yarim Liyany inga birrungili Djakupgi, a girrban. A nyani Djakup ngurrinyinaban nyanngar gima nyani wawupm ngunukima ingki Ratjil. <sup>24</sup> (A nyani Labandji gungili Liyanyi wurpm miyilk miri djamaginiing inga, gima ngunung wurpi rum djanangang ngurrwagipi. A ngunung djamaginiing miyilk Labandji gungili nyanngang, yagirri nyani Djlpa (Zilpah).) <sup>25</sup> Manymak, milwartjili nyani Djakup binygadjini a mil-nyanganiban. "Way, djinimkima ingki Ratjil!" Nyani inga warrwarrdjili Labangi, girri inga bindjin, "Nyimki nyuni irriny gar-yulgimi miri bindjirri? Ngarri inmarr djamadjny kiriny marrga Ratjilgima irr marrgi. Nyimki rarii wurpm nyuni irriny gungili?" <sup>26</sup> Girri nyani Labandji bumir-wubirdjili, "Nginbilang rum djingirapibi gurrbibi ingki miri ngunukima. Yarim ngurrwakng nibi gungi galitjirringkima, a rirringir ngunungir-kirri manymak nibi gungban mirrdjingu, bilapilang nginbilang rum. <sup>27</sup> Nyuni bar-kaliki, yarim nyuni inga malimdjigi djingiriny wurpm week galitjirringirgi, girri ngunung wurpi nyinibi gungban ngirrang mirrdjingu. Bilapilang gam', ngili il bumir-tjamigi, miri ngarri nyirr gungi Ratjilnyi, a nyuni madjirrtji irra djamadjji kiri nyibingirgi 7 gunmalpilngirgi."

<sup>28</sup> Nyani Djakup yitjidjinaban. Nyani marrkangili yarimipm Liyang week inydi djingirringili, girri ngunukiningban nyani Labandji ranytili inga gungliban Ratjilnyi girrgima. <sup>29</sup> A nyanngali girri nyani Labandji gungili wurpm djamaginiing miyilk Ratjilali, a nyani yagirri Bilya (Bilhah). <sup>30</sup> Manymak, Djakup a Ratjil biling bil ngurrinyinaban wurpilipm. A nyani Djakup inga marr-bulanggitdjini Ratjilgi, miri mirrpgima nyani inga marr-bulanggitdjini, bil Liyagi yarim marri djayal. Manymak, nyani nyi'nyininy ngulikima nyibiwili 7 gunmalpili marrga bayimdjigi gaykiyiriny Ratjilgi.

<sup>31</sup> Manymak, ngunukining nyani Yawaydji nyangini Djakup ingki inga marr-bulanggitnyir Liyagi, nyanngali nyani gungili yidjipilpilngiriny Liyali, bil Ratjilgi wirr - nyani budjirr-djumildjini. <sup>32</sup> Marrga nyani Liya gapalmirrpilidjini, a djampan milimiti inga bungtjili, a nyani yagirr-yirrpini nyaninyi Riwin (Reuben); gima nyani wangin bindjin, "Djinining yagirri mayali miri, 'Goddji nyangini ngirrang wargugu', a wurpi mayali miri, 'Djinin'djining ngirrang nginipingim irra marr-bulanggitdjidjiban', bilapilang." <sup>33</sup> Girri madjirri nyani yidjipilakindjini, girri djirrakay inga bungtjili, a yagirri nyani yirrpini nyanininy Djimiyun (Simeon). Miri djini'djining bilidjirri nyani bindjin wangin, "Djinining yagirri mayali miri, 'Yaway marrngini irr nyini kirimipm marr-bulanggitnyirring,' marrga djingirinyi wurpi nyani irra gungili yidjipilngiriny." <sup>34</sup> Girri madjirrtji nyani gapalmirrpilidjini, wurpi yidjipili yul marrngili, a djiningkima nyani yagirri bultjidjini Liybay (Levi), gima nyani bindjin, "Djinining ngirrang nginipingim irra djalgdjidjiban, gima ingarr marrngili yidjipilpilngirinyi warrngguwilinan." <sup>35</sup> Girri wurpm bilidjirri madjirri nyani yidjipilakindjini, a djampan yidjipili yul bungtjili. A nyani bindjin wangin, "Djini'djining bilidjirri Yawaygi ingarr gungi-baltjigi"; bilapilangdj

yagirri nyani yirrpini nyaninyi Djuda (Judah). Rirringir ngunungir-kirri nyani dadawdjili marrinyirngir yidjipilpilngirinyi.

## 30

### *Djakupang walgurwalgur djani bungtjili*

<sup>1</sup> Ban ngunukining nyani Ratjil djiringini nyani badatj djiny marrngili yidjipilpilngirinyi Djakupgi, nyani inga mil-dinytjnyirakindjiniban gadingirgim Liyagi. Nyani bindjin inga wanginiban nginipingirgim, "Ngirrinban irriny kuw walgurwalgur, bintji irr balidji wargugungir!" <sup>2</sup> Bil nyani Djakup inga madakarritjdjini, a yan birintilpm inga nguli, "Ingki irr ganydjarrgining miri God! Nyanngarki nyin budjirrdjumilidjnyirdjili, ingki ngarrigima!" <sup>3</sup> Girri Ribika inga wanginban, "Djinimgima ngirrang djamaginiing miyilk Bilya (Bilhah), nyum nyim ngurridji wurpilipm marrga nyanngangir budjirringir djiny irr marrgi yidjipilpili ngirrangipmban." <sup>4</sup> Marrga nyani Djakupdji marrngili ngunukima miyilk Bilya miri wurpi nyanimngim inga, a nyangan garri ngurriny girinyban gurrkunyi. <sup>5</sup> Manymak, guyumi nyani Bilya gapalmirrpilidjini, a walkir-marrngili yidjipili yul Djakupgi. A nyani Ratjildji djagadjiliban ngunung nganarr bitma nyanngangipm. <sup>6</sup> A nyani bindjin wangini, "God-dji bukmaknyi yulpilngiriny djiny mil-lirrpiniban ingki djuburr-mirkng garri. Yarim warrpam djin marnggiban ngarri murkunyirbinyirring, gima Goddji irriny gungiliban djingiriny yidjipilngirinyi rirringir ngarri nyaniny irr butjalmini yidjipiligi ngirrangipm." Bilapilang nyani bindjin, marrga yagirri nyani yirrpini ngungiriny nganarr Dan. <sup>7</sup> A rirringir ngunungir-kirri ngunukima djamaginiing miyilk Bilya gapalmirrpilidjini madjirrtji, a wurpi yidjipili yul djawal-gingini. <sup>8</sup> A nyani Ratjil wangini, "Ngili ngirrang gadingimi Liya inydji il birrirrpirrirrdjim kirrimban, bil marriban, ngarri nyaniny irr burrdji ngulibin!" Bilapilang nyani wangin, marrga nyaninyi yagirri nyani yirrpini Naptali (Naphthali), gima ngunung yagirri gatjinmi mayali miri 'Birrirrpirrirrdjinyirbi'.

<sup>9</sup> Ngunukining nyani Liya nyangini ingki madjirri nyani marrnyir kirinyir yidjipili malany, nyani marrngiliban nyanngang djamaginiing miyilk Djilpa (Zilpah), girri ngunukima inga gungil Djakupili miri wurpi nyanimngim inga. <sup>10</sup> Manymak, Djilpangir wurpi yidjipili yul bungtjili Djakupgi, a nyani Liyadji marrngili ngunukima nganarr a djagadjiliban miri nyanngangipm. <sup>11</sup> Nyani bindjin, "Ngarri djambatjpan!" Marrga nyani yagirri-yirrpini nyaninyi Gat (Gad), gima ngunung yagirri mayali gatjinmi miri 'Djambat'. <sup>12</sup> Girri madjirri Liyang djamaginiing miyilk gapalmirrpilidjini, a wurpi yidjipili yul bungtjili Djakupang. <sup>13</sup> A nyani Liya bindjin wanginban, "Ngarri marrkapginingban! Ngunuwiltji wurpiwili miyilkpilingir djani irriny djin gingidji ngarri marrkapgining miyilk." Marrga ngunukima yidjipili nyani yagirri-yirrpini Atjir (Asher), gima ngunung yagirri mayali gatjinmi miri 'Marrkapgining'.

<sup>14</sup> Wurpilim walirrdji, ngunukining bilidjirri nyadji djin yirryirrdjny kiriny wali marrga djin gurtjigi mirring minitji mala dampagi, Riwbina ngunung milimiti Liyang nyani gukirrnyi mururrtsmirrpsi. Girri nyani birraldjnyirdjili djal-waligining gurrbi, a ngunukima djal-wali butbutnyirdjili, a gurrbili minaliban nyannagli ngambirrgirali. Bil nyani Ratjil nyangini ngunung djal-wali, marrga nyani butjalminiban gaditipm, "Way, bi irriny kuw nyibi ngunukima djal-wali nyungur gapirringirim gurtjili." <sup>15</sup> Bil nyani Liyadji bumir-wubirdjili, "Ngurrumban nyuni milgami ngirrang nginipingim, bina djini'djining nyuni djalngdjirri ngirrang

gapiiringirang djal-wali nyuni djamigi gurrkunyi?" Girri Ratjil inga bindjin, "Il bumir-tjamigi; nyuni irriny gungban ngunukima djal-wali, a ngiltjang ngnipingim nyani ngurridjiban nyunguri djini'djining maliri, bilapilangdji ngarri nyuniny nyirr bumir-winidjingilgi." <sup>16</sup> Marrga djampam ngunukining Djakup wininy kiriny murrurrtngir rirringir djamangir, nyani Liya winiñngir yulgungiliban, girri inga bir-kiralibin. Nyani inga bindjin, "Nyuni ngurridji ngirrarban, gima irr bayimdjili ngirrang gaditipm marrga nyirr marrgi. Ngarri gupirrgungili nyangngali ngirrang djal-wali ngunukima ngirrar gapirringirim butbutnyirdjili djuli." Marrga ngunuban maliri nyani Djakup ngurrinyinaban nyannngari. <sup>17</sup> A nyani God inga mil-wurdjili Liyagi a marrngini nyangngang butjalminyirbi, marrga nyani gapalmirrpilidjini madjirriban. A guyumi wurpi yidjipili yul bungtjili, marrga Liya gatjidjinibin 5 yidjipilpili. <sup>18</sup> A nyani Liyadjii yagirri-yirrpini nyanyinyi Yitjikar (Issachar), a ngunung yagirri mayali gatjimmi galkngu 'Bayarra', gima nyani wangini, "Goddji irrinny bayarradjili gima ngirrang djamagini Miyilknyi irr gungili ngirrali nginipingirali." <sup>19</sup> A madjirrtji nyani Liya yidjipilakindjini, a yidjipili yul bungtjili - namba 6 nyangngangi. <sup>20</sup> A nyani yagirri-yirrpini ngungiriny Djibulun (Zebulun), a ngunung yagirri gatjimmi mayali miri 'Mundjarr', gima nyani bindjin wangin, "Goddji irrinny gungiliban mundjarr butalgima. Marri rirringir djiningir ngirrar nginipingirim bi irrinny gang kiri mundjarr mala, gima ngarri ingarr gungili 6-ban yidjipilpiliban." <sup>21</sup> A djuditjban nyani Liyadjii marrngili yidjipili miyilk, a yagirri-yirrpini nyanyinyi Dina (Dinah).

<sup>22</sup> Bil nyani Goddji ingki marrbinir Ratjilnyi, nyani butjir inydi kungili nyangngang butjalminyirbi, girri nyangngang yarr nyani matitdjili yidjipiligi. <sup>23</sup> A ngunukining Djakup ngurrinyimi nyangngar waymirri, nyani Ratjil wurpi gapalmirrpilidjinibin. A djampam nyangngang milimiti bungtjili. Girri Ratjil bindjin wangin, "Gunigima ngirrang nyani Goddji yilbirtjilinan ngirrangir." <sup>24</sup> A yagirri nyani yirrpini nyanyinyi Dusip (Joseph), a ngunung yagirri mayali gatjimmi galkngu miri 'Wurpi Irr Marrgi', gima nyani bindjinban, "Ngarri djalngdjirri nyani Goddji irrinny gungban wurpigima yidjipili ngirrangipm!"

### *Nyuni mil-gultjigining yul Labandji nyani gar-yulili Djakupnyi*

<sup>25</sup> Manymak, rirringir Ratjilang milimiti Dusip djawal-gingini, nyani Djakup inga wanginban Labangi, inga bindjin, "Bina manymak ngarri irr gubidji djining gurrbiwi, irr winidjiban ngirrali gurrbilinan?" <sup>26</sup> A ngarri djiny irr gangban ngirrang nyanimwilingim a walgurwalgur, a minydi nibi giriban. Bamanban inmarr djamatdjny kiriny nyungki, a ngurrumban nyirr bumir-winidjingini ngirrang miyilkpilngirgi. Miri yirrimban nyuni marnnggi nyaliki ngirrar djamatjii nyin gunggatjili.

<sup>27</sup> Bil nyani Laban inga wanginban, "Ingkiban ildji giriban. Butjir inydi kungban; ngarri djining djanguny irr marnggidjini miri warngarringir djangunyginingir, miri bilapilangir irr birraldjnyirdjili gam': nyani Goddji irra manymakdjim djamatdjim gima nyunikima nyini kirimban ngirrari.

<sup>28</sup> Ngarri irr djalngdjirri nyuni bar-kalikiban djiligima. Yarim nyimki nyuni djalngdjidi ngirrapibi, nyuni irra bultjigibar, a ngarri inmarr gungi ngunukima ngunubilang nyuni madjirri irra djamatjii kiri, bilapilang ngarri nyirr bayimdjigi nyunung djamagi - nyimki ngunupilang nyuni djalngdjidjiban." <sup>29</sup> Girri nyani Djakup bindjin, "Nyuni marnnggi miri ngarri nyuniny nyirr rrupiya-galbidjnyirdjili ngirrar djamatjii, a nyaliki nyungng bimbi a nanikut mala djin galbidjini ngirrapibi djamatjii, gima djin irr djagadjny kiriny manymak. <sup>30</sup> Miri ngurrwakng inmarr yulgungili

biligi nyuni ingki gatjinir galbi maypal mala, bil yarim warrngguwilipmaban. Ban djini gulukung wanagima nyungung, gima nyani Yawaydji irriny gunggatjny kiriny, marrga galbi maypalpili nyani nyin gungili ngirrapibi djamabi. Bil rirringir djiningir-kirri manyamktja nginibi inydi nibi djagadji giriban, gima wirr maypalpili nibi gatjirriban nginbilangpibi. Marrga ngirrangipm miyilkpili a walgurwalgur djiny irr djagadjigibin, a maypal malany djinyi nibi marrgiban nginbilangipm.

<sup>31</sup> Bil Laban butjalminiban madjirri, "Nyili ngarri nyirr bayimdjigi?" A nyani Djakupdji bumir-wubirqjili, "Nyuni irriny gungi wirrpk dñini'djining. Ngarri djiny irr djagadji kiri nyungung maypal mala yarim miri ngurrwakngi, ngunubilang djining ngirrang mayali nyuni yitjidjidjiban. <sup>32</sup> Bilapilang nyungung maypal mala: miri nanikutpili djani mulngi mala, a bimbi djani bardjining mala, bil yarim warrngguwili lurrrkin-djulatdjulatjmiynyakinina mala nyuni gatjinimi bimbi a nanikut, a warrngguwili djultdjultjnyakinipili girrgima. Marrga djiniwili lurrrkin-rindinyirbi a djultdjultjnyakinina maypalpili nyuni djiny gungi ngirrali, miri yarim djinikiwiliny a warrpam minytjigining yuwirdjingpili djani djin bungtjigi djampam nanikut a bimbi, yarim djinikiwilinygima djiny irr marrgi minytjiginpili nyungungpibi maypal malabi. Bilapilangdji nyuni irriny bayimdjigiban, ban nyunibpm djiny galiki warrpam bardjining bimbi, a warrpam mulngi nanikut. Manymak, djamingi irr gukirrdji kiri nyungumirrppi maypalpilmirrppi, djiny irr butbutnyirrdjigiban warrpam minytjigining maypalpili nanikut a bimbi, girri djani ngirrangipmaban. <sup>33</sup> Girri bupalikinim bilidjirri nyuni djiny nyangi ngirrang maypal malany, nyuni miliki a manyangban. A ngunubilang wurpmipm nyuni birraldjnyirrdjigi maypal nyunungpibi, galkngu bardjining bimbi u mulngi nanikut, nyuni marnggiban ngarri waparrbi ngunukima irr djaminmi nyungungir maypalpilingir!" <sup>34</sup> Girri nyani Laban inga wangini, "Ma', miri bintjigima ngurrgima il djamadjigibin miri nyuni irra bultjdjini."

<sup>35</sup> Bil nyani Laban djayurrdjurk wininiban nyanngali maypal malali, girri nyani djiny butbutnyirrdjiliban bukmaknyi ngunuwili lurrrkin-djulatdjulatjmiynyakinina a djultdjultjnyakinina maypal mala, miri nanikutpili a bimbipili, girri djiny gungili nyanngali walgurwalgurli marrga djiny djin djagadji kiri rarrmalipm Djakupngir. <sup>36</sup> Girri Laban a nyanganng walgurwalgur djin yilitjinib Dan Djakupngir, marri bilay miri 3 yakirrpili djin girali, girri inydi nyininiban nguli, marrga ngunuwili minytjigining maypal mala Labandji djiny djagadjny kiriny, a ngunuwili bardjining bimbi a mulngi nanikut mala Djakupdji djin djagadjny kiriny Labangi. Ingkiban djani mayalpili djin mil-kurrukunyir girinyir, bil yarim rarrmali-rarrmalipm bil djirridji kiripmban mala. Miri bilapilang nyani Labandji gar-yulili Djakupnyi.

<sup>37</sup> Bil nyani Djakup girali murruurrtili, girri djarngili wurpi-wurpi mala djadjiyu yuwirdjing, miri diiy a nyim-kunyirri yuwirdjing bumalng ngunuwili djin gatjinimi bardjining galngi nguymirri gilingkalmirri mala. Girri nyani marrngili yiki, girri yalwupiniban gilingkal marrga ngunuwili djadjiyu malany nyani djiny djulatjmiyngiliban, miri bindjin nyani gar-gurryilidjnyirrdjili bardjining galngi nguymirri. <sup>38</sup> Girri nyani ngurriyirrpini ngunukuwiliny lurrrkin-djulatdjulatjmiynyakinina bumalngpili ngunyili munatjali - ngidjirrkng djapidipilimirri nyaling gapi dji'djapin nambidi maypal malagi djin dirradjigi. Nyani miri bindjin djamadjili marrga ngunitjini nanikut maladji djiny djin nyangban ngunukuwiliny djunggipili birbirmirri djanagar, marrga ngunukining yuwirdjingpili nanikutpili djin bungtjigi, gilingkal djina djulatdjulatjmiynyakindjijiban girrgima.

Gima nguligima ngidirrkng ngunuwili djapidipili, bininy kiriny ngurrgima nyani gurrkinginir nanikutdjii burrili inga baltjny giriny miyilkali, girri gudidjilaban, ngunukining bukmak ngunuwili nanikutpili djin gurrkungili nguli dirradjnyirgi.<sup>39</sup> Marrga ngidjirrkng ngunuwili lurrkin-rindinyirbi bumalngpili djani nanikut mala inydjin gudidjilaban. A bilapilangdjii ngunukining yuwirdjingpili djin buntjili, djani warrpam minytjiginingban, miri nyibi lurrkin-djulatjdjułatjmiynyakinpili, a nyibi djultjdjultjnyakinpili.<sup>40</sup> Ban bimbipilngirgi, nyani Djakupdji djinimirri djamadjili gam': nyani djiny butbutnyirdjili bukmak bimbi miyilkpili marrga djin djarriny kirinyban rarrmalipmban. Girri ngunukining djani minytjigining nanikutpilingir djin dirradjny tjarriny gapi djapidimirri djinngirpmi, ngunuwiltji miyilk bimbipili nyani Djakupdji djiny djudu-gangiliban wurpili galiyili, marrga ngungnirpm biri-biri djiny djin nyang djirridjiban ngunukuwiliny minytjigining nanikutpili. Bilapilangdjii ngunukining yuwirdjing bimbi mala djin bungtjili, djani wurpi minytjigining bilapilang mirrpgalbi nanikut a bimbi mala minytjigining; girri nyani djiny butbutnyirdjili Labanngir maypal malangir, girri djiny yagirrdjininan nyanganngalipm maypal malali. Miri Labanang maypalpili nyani Djakupdji djiny djagadjny kiriny rarrmalipm, a nyanganngalipm rarrmalipm, ingkibana inydjin mil-kurrikunyir girinyir.<sup>41</sup> A nyani bindjin djamadjili djinimirri wurpi: ngunukining matitpili gurrkining maypalpili burrili dinya baltjili ngidjirrkng djapidimirri, nyani marrngili ngunukuwiliny lurrkin-rindinyirbi djunggipili, girri munatjaliban nyani djiny ngurr-yirrpiniban nguli milbimirri maypalpilngirar.<sup>42</sup> Bil ingki nyani bininyir djamadjnyir ngunukining bilbalngpili maypalpili inydjin gudidjili. Marrga Djakupdji djiny marrngili warrpam matit maypal malany, bil Labandji djiny marrngili bukmak bilbalng malany.

<sup>43</sup> Bilapilang nyani Djakup yagirr-wanadjininan, a rrupiya-galbingakindjininan, a nyani gatjedjininan mirrpgalbi maypalpili, kamulpili, dungkipili, a djamaginpili - miyilkpili a yulpili.

## 31

### *Djakup nunydjirrali Labanngir*

<sup>1</sup> Manymak, nyani Djakupdji birraldjnyirdjili Labanang walkiriwilingim djin wanginy kiriny nyanganngabibi miri djin bininy kiriny, "Warrpam nginmilang gunydgirrgirang girri malany nyani Djakupdji mil-gamban, bupalikining nyani gunydgirrar gatjinmi mala. Miri bukmak ngunuwili maypalpili a djamaginpili nyani Djakupdji djiny gatjinmiban, nyani djiny gurrkumi ngunukuwiliny gunydgirrgirangpibi malabi, yarim djani bilang guydgirrgirang, ingki Djakupang."<sup>2</sup> A wurpi, Djakupdji nyangini miri nyani Labandji inga rum-ngulibin, ingkibana nyani inga bir-bulanggitjnyir nyininyir miri ngurrwakngi, bilapilang.<sup>3</sup> Girri nyani Yaway inga bindjin wanginban Djakupgi, "Winiyban nyunguli mutjingili nyibirri nyuni bungtjili, a ngarri inmarr maltjigiban marrga nyirr djagadjigi."

<sup>4</sup> Marrga nyani Djakupdji yan yaniliban marrga biling nyaniwilingim inga bil bir-kiri nguli murrurrtmirri nyibirri nyanganng maypalpili djin djarri kirim.<sup>5</sup> A ngunukining inga djin yulgungili, nyani bilingga wangin bilingga bindjin, "Ngarri irr nyangini miri nyumilang gunydgirrgirang djuburr nyani irra wurpidjininan, miri ngurrwakngi ngunukima yul irra marr-bulanggitdjini, ban djini'djining bumirla irriny ngurrngimban. Bil marriban, ngunukima ngirrang gunydgirrgirang Miligidjir nyani irriny

gunggatjim. <sup>6</sup> Nyum nyim marnggi ngarri inga djamadjny giriny mirrpk wana gunydjirrgirki nyumilang, <sup>7</sup> bil nyani irriny gar-yulgimi bumirgalbi bilidjirri, miri nyanngang murr-randinirbi nyani djambidjambidjimi madjirri a madjirri. Bil nyani God ngandarrk inga djarri Labangi marrga ngunung mari Labanbi irranydji yulgimi. <sup>8</sup> Miri bilapilang gam': ngunubilang nyani irra bindjin wangin, "Bukmak mil-kurrkunyirbi minytjigining maypalpili nyuni djiny galikiban, bilapilangdji ngarri nyirr bumir-winidjingilgi djamagi nyungung," girri djani maypalpilingir warrpam djini bunggabu ngarri ngunukuwiliny, "Ingkiban mil-kurrkunyirbi minytjiginpili, bil lurrkin-djulatdjulatjmiynyakinpili nyuni djiny galikiban yarim ngunukuwiliny," girri warrpam maypalpili djani djiny djin bundigaban yarim lurrkin-djulatdjulatjmiynyakinng yuwardjingpili. <sup>9</sup> Bilapilang djiniwili maypalpili nyani Goddji nyaniny gaypili gunydjirrgiriny nyumilang, a djiny gungiliban ngirralibar.

<sup>10</sup> Miri ngurrwakng, ngunukining nyani gurrkining nanikutdji burrili inga baltjny, girri gudidjny, ngarri mabugi irr nyanginibar. Miri mabugimirri irr nyangini galbi gurrkining nanikutpili, djani burrili djina baltjny kiriny miyilkpilingiriny, a ngunuwili gurrkining mala yarim djani warrpam minytjigining - miri lurrkin-djutatdjulatjmiynyakinng, djultjedjultjnyakinng, a mil-kurrkunyirbi minytjigining mala, bilapilang. <sup>11</sup> Girri wari ngunupilang irra witjilinan Godang djanguny-ganyakinng marri, irr bulkinyipm, a nyani irra wangin, "Way, Djakup!" "Ngarri djili," ingarr bindjin.

## Luke

### 2

#### *Christmas Story*

**6** A bilakinij biliŋ ɳuli bil nyininyipm, walirr inga yulgunjiliban Merigi miri gurrulk inga bunjtjigi. **7** Girri nyanyan milimiti djawal-gjinibar, a Meridji marrnili ɳunukima, girri garrpiniiban mirikaldji giliwiliŋiŋ, girri yakirr-galwupini ɳunyili djapidili yurryarrkininjili nyaliŋiri buluki mala djin dirradjigi yurryarr ɳuli bulukinjirar bala'mirri. Bilapilanjirgi nyani yakirr-galwupini djapidili bulukinjiraj, gima wirr gadjigarr biliŋki nambidi bala'mirri yulpilŋiran, gima ɳunuŋ bala'ɳurrum rarri inydji barŋiliban.

**8** Manymak, ɳidjirrkŋ Bitiliyim gurribiwi, gar-gurryili murrurrtmirri nyibi maypal-djamaginpili djani djin nyininy kiriny, maypal bimbi mala djin djin djagadjny kirinyban, a ɳunupan ɳurrum gar-maliridjinibar. **9** Girri ɳunukinjinban wurpmi Garrayan djamaginj wugili nyani djina birraldjini, a Garrayan warrdjinirnr djin liwliwmnyinjili, a munutjaban warrpadadadjini ɳidjirrkŋ djanŋar bitma manŋjibirri. Wanaban inga djin ɳuy-yawŋjinibar. **10** Bil ɳunukima wugili djina waŋini, djina binjin, 'Inkibar ildji yawŋidji. Butjir inydji ildji kuwi, ɳarri ildjarr birrunjiliban djaŋuny butal, marrga bukmak yulpili wanaban djin nitjanydjidji ɳunukinj djin djaŋuny djin marrŋirrdji. **11** Gima djini'djiniŋ maliri, nyani Wannjirnyakinj ildja bunjtjiliban ɳildjanj, djili gurribiwi Dabidan nyani Garay djawal-nyanjinibar ɳunukima Godaŋ Yirryirrpinirbi yul. **12** A bilapilan djinin warŋarri djaŋunyqiniŋ djarri kirimban ɳildjiki, marrga ildji birraldjnyirdjigi ɳunuŋ yidjpili: ildji manyanji nyanyini mirikaldji garrpini, a ɳurri kirim djapidimirri bulukinjirar. Bilapilan ɳunuŋ wugil djina bindjini maypal-djagadjnyakinpilŋirgi.

## 1 John

<sup>1</sup> Djiniŋ djaŋuny ḡarri irr wukirridjim kirimban marrga lidjarr bultjigi yulbi, ḡunuŋi, nibi bultjin girim nyaninyi yagirri "Yan Wanŋiginin". A ḡunuŋi baman ḡurrwakŋ, nyani nyi'nyininy ḡurrnungal bilidjirri; a nyanŋan yan nibi marrŋini, a nyani galŋi nibi nyaniŋi ḡinibilar mildji. Niy, yirrimban nibi nyaniŋi nyaniny, a nyaninyi galŋi nibi gatjidjini ḡinibilar gumbirrdji; a djiniban lidja nibi bultjinmi nyanŋapibi.

<sup>2</sup> Nuni yuldji gatjimi birral wanŋi, ḡunuŋi wanŋi-giliwiliŋakiniŋ, a nyani nyi'nyininy Gunydjirrgirar; a ḡunun wanŋiginiŋ birraldjiniŋban miri yuldjinibar, bilapilan miri ḡilimban, girri nibi nyaniŋinibar nyaniny. A bilapilanban, miri mil-marnŋiginpili nibi, a lidja nibi bultjinmibar nyanŋapibar. Nyani miri wanŋi-giliwiliŋakiniŋ, a wirrban balidji, yarim nyi'nyinidjipm bintjiban ḡurrigma. A ḡunuŋi baman pírr nyani nyi'nyininy giliwiliŋ Gunydjirrgirar ḡunukirri ḡurrnungal bilidjirri, ban djini'djiniŋ nyanibi inydi mil-lirrpiniŋban nyanŋarki djili ḡilimilar munatjamirriban. <sup>3</sup> Bubalkinŋ nabi nyaniŋi a nibi marrŋini, ḡunitjini mala lidja nibi bultjigi, marrga ḡilidji nibila lidji maltjigibar a wurpmban mala yulpili limi, miri wurpriban rummirri lim nyinidjibar. A ḡinibalan, nibi nyini kirimban giliwiliŋ Gunydjirrgirarban, a nyanŋar Walkirgirar Djesur Christarban, miri wurpmban mala. <sup>4</sup> ḡurrumbaŋ nibi galŋ-nitjanydjjiri, a nibi wukirridjim ḡilidjalibar marrga ḡilidji bintji ḡurrigma lidji galŋ-nitjanydjjidi.

<sup>5</sup> A djiniban ḡunun djaŋuny nibi marrŋini nyanŋapibi, miri Djesubi, a ḡunun ḡurrigma djaŋuny lida nibi bultjigi, bilapilan gam': Gunydjirrjimi ḡunun Warrpadadajnyiri a wirrpaŋ nyanŋar gar-maliri, miri mirikunu rum mala, a bilapilan. <sup>6</sup> A marrga ḡunubilan lim bintji gjnidji, "Narri ḡurrum Godkiŋinban", bil bidakipm lim giri gar-malimirrppm, miri rummirrppm mirgimirrppm, girri inydi lim yulgimban, a lim burr-birrindjinin girimban Godnjir birralnjer rumnjir. <sup>7</sup> Bil ḡunubilan lim giri warrpadadamirrppm, bindjirr ḡurrigma miri nyanibipm Gunydjirrjimi girim nyini manŋibirrimirrppm, girri wurpilipmban lim nyinidji giri mala; a Djesu, ḡunun Gunydjirrgirar Walkiripm, nyanŋari budiri limiliny rurrtjirrmigibar, miri limiliny ḡalwirrgidjigi ḡilimilanir mirginir. Ban ḡunubilan bintji ḡurrigma lim gjnidji gam', "Wirrban mirgi irr gatjirri narribibi", girri miri bilapilanban mayali inydi lim ḡagirrgi, a nyanŋan birral rum iŋkiban ḡurriy iŋlimilar. <sup>8-9</sup> Bil ḡunubilan bintji ḡurrigma inganydji lim bultjigi Gunydjirrgirki gam', "Gunydjirra, yirrimban mirikunu yul ḡarri, mirgibar irr djamadjil", girri nyani Gunydjirrar limila djuy-bultjigibar, a limiliny ḡalwirrgidjigibar bukmakŋir ḡilimilanir mirginir, gima Miligidji nyani wili nyanŋapibi yan gatjigi, yarim wirrban limila gar-yulibar, yarim bulangitj limila djamadjigibar. A bilapilan, miri warrpam ḡilimiliny mirgi mala nyani djiny yilyilmaygi ḡilimilanir, a girri lim ḡalwirrgidjidjibar, gima bukmak ḡilimilanj mirgipili inganydji lim bultjidjinibar nyankibar. <sup>10</sup> Bil ḡunubilan bintji ḡurrigma lim waŋidji gam': "Inkirr mirgi-djamadjiw giriwi", girri bilapilanir djaŋunydi nyaniny lim bultjinmibar Gunydjirrgiriny yagirri 'Inydi Yulginyakinin', bilapilan, a nyanŋan yan iŋkiban lim gatjirriban ḡilimilarban.

## 2

<sup>1</sup> Marrkapnyakinin yutjuwili ḥirrani, djińń djańuny ḥarri wukirridjimi ḥilidjali marrga ḥilidji īnkiban lidji djamadjigi mirikunu mala. Bil ḥunubilań mirgi lim djamadjigi, girri lim gatjimmi warjarrinyi, miri namkatdjinakinini, a ḥununuń djarri kirimban ḥilimilar galimurri marrga nyani limiliny gunyatjigi, miri Djesu Christ, ḥununj djuburr-garray yul, wari nyanyar nyi'nyinibar Gunydjirrgirar, a nyani limilanydji ḥurriban, a limiliny gunyatjigibar. <sup>2</sup> Miri, nyadji ḥunupilan lim mirgi-djamadjigi, nyani Gunydjirrnim limila madakarritdjidjiban, bil nyani Djesu limilanydji ḥurriban, girri inga wanidji a nyanyin djanadjanadjigibar, marrga Gunydjirrnimi nyani ḥuy-mindjidjiban, a limila djuv-bultjigibar, īnkipmban nyani limila madakarritdjidjiban muńuy. Niy, miri bintji ḥurrgima Djesudji limila djamadjigi, a īnki yarim ḥilimiliči ḥidawirrka, bil bukmakgi ḥunupili yulpili djin nyini girim djińń munatjamirri mala. <sup>3</sup> A nyalikidjidi ḥilimi birral lim djińńilgi lim marngi Djesugi? Nunubilań lim butjirgindjirr girim nyanyar yan-gunyirbige malagi, bilapilańdji lim djińńilgibar inga lim marngi. <sup>4</sup> Nyibi yulpili djanı bintji djin wanidji gam': "Narri marngi Djesugi," bil djin gurrpinmipm djin butjir-djumilinipmban nyanyar yan-gunyirbige malagi. Nunubilań djin bintji ḥurrgima djin wanidji, girri ḥunitjini yulpili inydjin yulgimban, a badatj djin marngi birralgi. <sup>5</sup> Ban ḥunubilań wari ḥunupilan mil-yirrpın girim Garayili djańunyili, a butjirgindjirr girim ḥunugirki yangi, girri yirrimban ḥununj yul inga marr-bulanxitdjirrban Godki butalban. A djińń ḥarri lidjarr bultjigi nyaliki lim djińńilgi lim nyini kirim Godar nyanyar marr-bulanxitjimirri. <sup>6</sup> Nunubilań lim bintji wanidji, "Narri wurpilipm irr nyini kirim Djesur" girri ḥilimi bilaj lim yati-nyanban Djesuny, miri, nyalikidjny Djesudji djamadjny giriny djińń munatjamirri, ḥilimi wurpi bintji ḥurrgima bilaj lim djamadjigibar miri nyanyibi.

<sup>7</sup> Marrkapnyakinpila, īnkiban ḥarri lidjarr yirrpinmi wurpi rum yuwardjin, bil yarim yiligima lidjnyirr gumban ḥununj wanim yan-gunyirbi, ḥununuń lidji marrpini ḥunukiniń yuwardjakinim lidji marrbirraljakinidjini: miri, ḥilimibи bilaj inydiń lim marr-bulanxitdjidjiban, bilapilan ḥununj yan. Nurrumban lidji marngi ḥunugirki djańunygi, gima biligi lidji marrjnini ḥununuń. <sup>8</sup> Bil ḥarri lidjnyirr gungi-bilmiyban bapili yan-gunyirbili, miri, djińń lidji marr-bulanxitdjidji wurpiwiliki yulpilnırkı, gima Djesu nyanyarki nyininyi giriny ḥunumirri, a ḥununj rum lidja manymakdjirrban ḥilidjiki girri. ḥilimi wirapili djińń Godań yulpili lim gubiniban ḥununj rum gar-maliriginin, a ḥununj gar-maliri limila manydjirr kirimban, a Godań birral warrpadadadjnyiri ḥurrumban limila ḥalapdjim kirimban ḥilimilali. <sup>9</sup> Bil ḥunubilań nyuni bintji wanidji, "Narri nyini kirimban Godar warrpadadamirri", bil bidak nyuni ḥuy-marginidjirripmban wirki ḥunupilan, girri nyuni nyi'nyinipmban gar-malirimirriban, a bidak wirrban nyuni ranyir nyunili Godili warrpadadagli. <sup>10</sup> Ban ḥunubilań nyuni djińń marr-bulanxitdjirr kirim wurpiwiliki yulpilnırkı, birralban nyuni nyini kirimban warrpadadamirri. Marrga īnkiban nyuni djalndjidi nyuni djińń ḥurri-djigitgi wurpiwili yulpili ḥunyili mirgili rumili, gima nyunibi gi'kirim nyinibar warrpadadamirrppi, a nyuni gubidjibar mari. <sup>11</sup> Niy, ḥunubilań wari ḥunupilan ḥuy-marginidjirri gurrutiqinijırkı, gar-malirimirriban nyani nyi'nyinipm, a mil-bambay gu'gukirriban gar-malirimirri, a nyani djuńń nyanydjili girim nyinibar, gima nyuni gar-malirdji mil-djumilidjiliban nyanyinyi, a ḥununj yul mil-djalminibar gadjigarrnjiri Godnjiri. <sup>12</sup> A ḥilidjan yutjuwiliči, nyani Godđi djińń midjirrdjili mirgipili ḥilidjanji, gima marr

lidji yirrpini Djesuli, a bilapilanjirgi ɳarri lidjarr wukirridjimban djining djaŋuny. <sup>13</sup> A ɳilidjan wanapilmirrin marr-birralŋakinpilŋirgi, ɳarri djinin lidjarr wukirridjimban djaŋuny, gima lidji marŋgi Djesugi, ɳunuŋ gaypiŋibi war i nyininyi ɳurrnangalŋiri. A ɳilidjanji marri wana yulpilŋirgi, ɳarri lidjarr wukirridjim girri, gima ɳunuŋ mirikunu wugili lidji ɖimbitjnyirdjiliban. Niy, ɳarri lidjarr wukirridjimi yutjuwiliki, gima Gunydjirrgirki lidji marŋgi. <sup>14</sup> A ɳarri lidjarr wukirridjimi gun-ydjirripilŋirgi, gima lidji djirinmni nyanyi, ɳunuŋ bir-gaypiŋibi war bininy kiriny ɳurrgima nyi'nyininy kiriny ɳurrnangalŋiri. A ɳarri lidjarr wukirridjim yawirrinygi a midipilŋirgi, gima maŋbiŋban lidji djarri kirimban, lidji marŋgidjini Godan yangi, a lidji ɳuy-yirrpini ɳunuŋ yan nambidili ɳilidjal ɳunyili yipi, a lidji ɖimbitjnyirdjiliban ɳunuŋ mirikunu wugiliny. <sup>15</sup> Inkibān djiniŋ munatjabī rum nyuni marr-bulaŋgitdjīyi, inkī djalndjīyi malagi djingirapibī, miri munatjabī mala. Nunubilaŋ nyuni djalndjidi djingirki munatjabī rumgi, inkibān nyuni inga marr-bulaŋgitdjidi Godki Gunydjirrgirki, a nyunuj djaln inga manydjidjibān. <sup>16</sup> Gima djiniwili munatjabī mala djani rarrmalipm, a ɳunuwili nampi mala, miri Gunydjirrgirapibī mala, djani rarrmalipm, bilapilan, rarrmalirarrmalipm biliŋi munatjabī mala a nampi mala, inkī wurpilipmili bili. A ɳunuwili mirgipili rumpili mala djani miri bilapilan gam': nyuni djalnbini yul marri, miri galknū, nyuni djalndjirri latjugi djakiygi, a bilapilanjirgi. A wurpi mirgi rum nyani bilapilan gam': nyuni bindjirr kirim ɳurrgima djalndjirri ɳunuwiliki malagi nyuni nyani nyunuj mildji, miri rrupiyagi galknū, a girripilŋirgi, a bilapilanjirgi. A wurpi mirikunu rum nyani bilapilan gam': nyuni inydi wanadjigi, gima nyuni ginj nyunuj munatjabī rum nyani manymak. Bilapilan mirikunu djuburr inkī milarrdjiw giriw Gunydjirrinjir bil yarim djingirapibī, miri munatjabī, nyani inydi ɳurrgimi. <sup>17</sup> A djiniŋ munatja gurribi nyani manydjidji ɳidjirrkŋban, gima nyani Goddji malimdjigi, a bubalkinjij djalnbini yulŋiriny nyani djinjirigiban ɳunukinjinban girri. Marrga ɳunubilaŋ nyuni bilapilan yul, nyuninyi girri Goddji nyin malimdjigibān, bilaŋ rummirri munatjamirri nyuni nyi'nyinibān. Ban ɳunubilaŋ nyuni djamadjigi nyimki ɳunupilaŋ nyani God djalndjirri, girri nyuni wanŋi nyi'nyinidjipmbān bintji kiri ɳurrgima.

<sup>18</sup> Niy, ɳirraŋ yutjuwili, ɳunuŋ walirr ɳunukinjin Goddji malimdjigi djingirmy munatja gurribi ɳunugima walirr ɳurrumbān ɳidjirrgidjini ɳilimalaŋ bukmakgi. A ɳunuŋ mirikunu yul wiriny lim bultjigi nyanyi yagirri 'Bir-yirrpinaŋinj Christgi', nyani bi giri bapili nyadji ɳunupilaŋ, a nyani djamadjigi marrga bir-yirrpigibān Christnyi a Gar-rayan yulpilŋiriny. ɳilidji yirrimi lidji marrnini ɳunuŋ djaŋuny ɳurrwaknji. A ɳurrumbān galbi yulpili bilapilan miri ɳunuŋ yul inydiŋ ɳulibān, a limila djin yulgunjilibān. Marrga yirrimi lim nyamban ɳunuŋ djawardjnyirbi walirr ɳidjirrkŋ bi girimbān. <sup>19</sup> Bilimi ɳunuwilitji yulpili limila djin maltjiny giriny, bitma djani girri Gar-rayan yulpili, miri ɳilimi. Bil djuditjpan limiliny djin gubini, gima inkī birral djani wurpilipm ɳilimilar. Nunubilaŋ birral ɳunuwilitji yulpili djani gindibi ɳilimalapibī malabi, girri djin gurrpinir girinyir limila djin maltjigi. Bil djin gar-gurryilidjini ɳilimalanjir malanjir, a bilapilaŋdji ɳilimi bukmakdji lim djirinjinban inkibān ɳilimalapibī malabi djini. <sup>20</sup> Inkibān marŋginyirriŋ yulpili lidji, gima nyani Djuyu Wugili lidja yulgunjilibān, a yirrpini nyanganjāŋ ganydjarr ɳilidjal, marrga lidji marŋgibān warrpamgi Gar-rayan djaŋunygi. <sup>21</sup> Niy, yirrimban lidji marŋgibān birralgi. Narri inkirr ginjyi lidji djuŋadjiřipm birralgi, bil lidjarr wukirridjimban

djinin̄ djurra marrga lidjnyirr gungi-bilmiygi ḥunrum lidji marñgibān ḥunugirki birralgi gadjigarrgi Garrayan. A djinin̄girki djanjunyi lidji marñgibān girri, miri, ḥunubilan wari ḥunupilan inydi yulgim kirim, a marñgidjim kirim wiltjnyirin djanjuny, girri ḥunun wiltjnyirin djanjuny inki bi girinyir birralnjiri djanjunyniri. <sup>22</sup> Waribān ḥunun wana inydi yulginyakinin̄ yul? Bubalikin̄iniri yuldji wili bir-yirrpini Djesu Christyi, a bindjirr wanban gam', "Nunun Djesu nyani yarim yul, inki ḥunun Wanñirnyirakinin̄ yanginyirbi Godbi namjiri nyani." Bilapilan yul nyani ḥunun 'bir-yirrpinañin̄ Christgi', a nyangan gulinydjirr yul, gima nyani bilinga inkidjim girim Godki Gunydjirrgirki a nyangan Walkirin̄jirim, bindjirr kirim ḥurrigma biliny bir-yirrpini girimban bilapilanđi yuldji. <sup>23</sup> A ḥunubilan wili ḥunupilan bir-yirrpigi Godan̄ Walkiripm a nyanki inkidjigi, girri yirrimban ḥuni yuldji bir-yirrpigiban God Gunydjirrgiriny girrgima. Inki wili marr-yirrpigi Gunydjirrgirali, a ḥunukinin̄ bilidjirri bir-yirrpigiban nyangan Walkiripm. Bil ḥunubilan wari ḥunupilan milma wanjdji bilapilan gam': "Niy, yirrimi Djesu nyani Godan̄ Walkirin̄jim, a marr-birralnjakinin̄ inga ḥarri," giri bilapilanđir yuldji nyani gumbirrgatjigi Djesunyban, a Gunydjirrgirinyban girrgima. <sup>24</sup> Marrga inki marr-birralnjakinidjyi djanjunyi wurpigi, bil yarim lidji ga'gatjirri ḥunun djanjuny lidji marrnjini ḥurranganjiri. ḥunubilan ḥunun nininjyu djanjuny ḥu'ñurri durkdurkmirri njlidjar, a lidji marr-birralnjakinidjirr girrimban, girri nyanganari lidji nyinidji giriban ḥunyili yipiban Walkirin̄jirar, a Gunydjirrgirar girri. <sup>25</sup> A djinibān ḥunun djanjuny Djesudji nyani limila yirrpini: njilimi miri wannj-giliwiliñakinin̄ lim gatjigi bintji kiri ḥurrigma. <sup>26</sup> Narri lidjarr wukirridjimban djinin̄ djanjuny marrga lidjnyirr butjigarriban inki butjinydji-guw ḥunuwiliti inydi yulginyakinin̄ malany. Djani djin manyam kirim lidja djin gar-yuliban marrga njlidji wurpili djanjunyili lidji djaypirciban. <sup>27</sup> Bilapilan̄ miri ḥarri lidjarr bultjidjini ḥurrwakni, Djuyu Wugiliri nyani yirrpini nyangan ganydjarr njlidjali, a njlidji galiki ḥunun ganydjarr inydi munjbinigiban. Marrga yarim Djuyuny Wugiliny bilan̄ lidji butjinydji gunban, a nyani lidjny marngi-gupirrguñban. Marrga inkibān inga lidji miliki wurpigi yulgi marrga ḥuni lidjny marñgidjigi, bintji nyani lidjanydji yuli, a mayalidji lidjny ḥagirrgi. Bil ḥunun ganydjarr Djuyu Wugilin̄jiran̄ birral ḥu'ñurriban njlidjar, a ḥuni lidjny marñgidjigiban bukmakibi malabi, yarim nyani lidjny milirrpigiban birralnyi, a inkibān lidjny mayali-ḥagirrgi. Marrga bilapilan̄ miri Djuyu Wugiliri nyani lidjny marñgidjili biliđi, njlidji bilan̄ bi'bintji ḥurrigma lidji nyinidjibān, miri, njidjirrkj Garrayar bilan̄ lidji nyinidji giriban munjuyban.

<sup>28</sup> A djinidjinin̄ ḥirrañ yutjuwili, wurpilipm nyanganar nyi'nyinij giriwban, marrga ḥunukinin̄ nyani milarrdjigi a malndjigi yili djili njilimilar munatjamirri, njlidjiban birbimirri nyangan lidji djirridjibān rumrum'nyirrin̄ban, inkibān inydi lidji mirrbiliban nyanganjir, miri, guniginin̄ban ḥunukinin̄ nyani lidja yulguñi. <sup>29</sup> Nunubilan ḥunrum lidji marñgibān Djesu Christ djinin̄ rum-garrayginin̄ yul, girri djinin̄ lidji marñgibān girrgima gam': Godan̄ birral yulpili djani djinin̄ djuburrmanymakginin̄ yulpili, bilapilan̄ mirrpm manymak, girri ḥunun yul buntjili nyanganapibi ganydjirrbi Garrayibi, miri, nyani yuwirdjidjini, a bilapilanđir yuldji inkibān mayalidji lidjny ḥagirrgibān.

### 3

<sup>1</sup> Nyani God limila marr-bulanđitdjirrbān mirrpm wana. Njilidji

lidji nyamban ɳunuŋ djaŋuny nyani birral, gima Gunydjirrar limiliny bultjidjini yagirri "yutuwili Godaj", a ɳunuŋi birral, nyanganj yutjuwili yirrimban limi. Bil ɳunuwilinjir munatjabı yulpilinjir djan iŋkiban limiliny djin djirinjirri, miri, nyanganj yidjipilipi limi, gima iŋki djin marngi Godki djanjarki. <sup>2</sup> Marrkapnyakinpila, yirrimban Godaj yutjuwili limi, bil bidak nyani iŋki limiliny mil-lirrpınır nyim gunyirri yuwardjinj yulpili limi guyumpılıgi, ɳunukinj nyanganj lím nyinidji djamini. Bil lím marngi djingirkı wurpmgi gam': ɳunukinj nyani Djesu yili maljdjigi djili munatjamirri, ɳilimi wirapili Godaj yulpili lím wurpidjidjiban, a ɳilimi girri bilapilan ɳurrgima miri Djesu nyani bilapilan ɳurrgima nyani bilapilan ɳurrgima miri Djesunyban lím nyanganj miri bilapilan ɳurrgima nyanyabi birral dji'djarriban. <sup>3</sup> Nunubilan nyani yul marr inga baltjinmi Djesugi, miri nyani Djesudji inga birraldjnyirdjig ɳunuŋ djaŋuny, girri nyanganj marr-birralnakinjiri ɳa'yalwirrgidjigibana nyanyinyi bukmaknjir nyanganjir mirginjir, marrga nyani midjirrnyirriñdjidjiban, yarim bilapilan miri Djesu nyanyabi. <sup>4</sup> Nunubilan wili ɳunupilan mirgi-djamadjimi, ɳunuŋ yul, miri, rum-dapılıdjnyirakinjiban nyani, gima dapılıdjim kirrimban Godaj rumban. Miri, rum mirikunu ɳunuŋ bilapilan gam': yuldji nyani bir-yirrpigi Godaj djaŋuny, a nyani dji'djalndjidi djamadjigi nyanganjpib mirgipili rum mala. <sup>5</sup> Bil ɳilidji marngi nyani Djesu maljdjili djili munatjamirri marrga limiliny gaypigibana mirgi mala ɳilimanjir. A nyanyabi yirrim ɳalwirrgi, a wirrban mirgi nyanganj. <sup>6</sup> Margga ɳunukinj nyani yul nyi'nyini wurpilipm Djesus, iŋkiban nyani dji'djamadjim mirgi mala. Bil ɳunubilan nyani yul nyi'nyini rummirri mirikunumirri, bilapilanjir yuldji iŋkiban djirinjirri giriw Garraayni, a iŋkipmban marngi Godki. <sup>7</sup> Nirraŋ yutjuwila, iŋki djina maltjiwi ɳunuwiliki yulpilŋirgi wirapili djin nyinipmban bilapilanmirri mirikunumirri rummirri, bintji lidja djin gar-yuliban. ɳunukinj wili ɳunupilan dji'djamadjim bulangitj, ɳunuŋ yul djarriban rum-djunupaginijban milbimirri Godar, bilapilan miri Djesu nyanyabi. <sup>8</sup> Bil ɳunukinj wili ɳunupilan dji'djamadjim mirikunu, miri bindjirr ɳurrgima ɳuni yuldji mil-lirrpınimbana nyani nyi'nyinibana rummirri mirrinjirar, miri, nyanganj djburr bi girimi ɳunuŋi mirrinjir Satanŋir, gima ɳuni mirrir dji'djamadjim girim mirikunu bindjirr kirim ɳurrgima, ɳurrrnangalŋir bi'bininyi nyanyabi, a djinikirriban gunyambi dji'djamadjimban. Bil nyani Godar Walkirinjirim midjirrdjigi bukmaknyi ɳunuŋ mirraŋ djama malany. Bilapilanŋirgi djamagi nyani Djesu maljdjili djili a yuldjini, marrga gulmiygi Satanaŋ djama. <sup>9</sup> Nunubilan nyani yul yuwardjidjini, girri ɳunuŋ yul buntjili nyanganjapibi Godbi, marrga iŋkiban nyani mirikunu dji'djamadjigipmban, gima Godan Wugili nyini girim nyanyari. Miri, ɳuni Wugiliri watjarrdjigibana nyanyinyi djamanjir mirginjir, gima Godđi Gunydjirrar yuwardjnyirdjili nyanyinyi ɳurrgagi, miri, nyani buntjili nyanganjapibi ganydjirrbi Godbi. <sup>10</sup> Bilapilanŋdi djinyi lím djirinjilgi ɳunuwili yulpili wirapili Godaj birral yutjuwili djini, a ɳunuwili wurpiwili wirapili djan ɳunuŋ Mirraŋ yutuwili, miri bilapilan gam': wili iŋki djamadjigi bulangitj, girri ɳunuŋ iŋki Godaj yul; a ɳunubilan iŋki wari inga marr-bulangitjedjidi wurpigi yulgı, girri ɳunuŋ yul iŋkiban Godaj yidjipili nyani, bilapilanj. <sup>11</sup> Nurrnangalŋir ɳilidji marrnjinyi djininj djaŋuny gam': ɳilimibи bilan inydi lím marr-bulangitjedjidi, bilapilan djanjuni lidji marrnjini bumir-galbi bilidjirri. <sup>12</sup> Iŋkiban lidji bintji ɳurrgima lidji nyinidjiban miri Kayin; nyanganima wurpm yul Satanaŋ - nyani bipinj gulmigipm. A nyimki Kayindji bipinj nyanyinyi? Gima nyanganj djama mirikunu, bil gulmigiraj djama manymak, bilapilanj nyani bipinjiban gulmigipm. <sup>13</sup> Marrga iŋkiban ɳuy inydi lidji yaryardjigi,

gulmaw, ɳunukiñij munatjabi yulpili djani lidja djin ɳuy-marginidjidji. Miri, djuburr-mirikunu yulpili bintj ɳurrum djina djin ɳuy-marginidjidji djuburr-manymagki yulpilñirgi. <sup>14</sup> Bil wurpiwiliki yulpilñirgi ɳilimi djina lim marr-bulañgitjdjirri, miri, warrpamgi wirapili Godan yulpili a ɳilimilañ wuwwilinjimi ɳunuwili djina lim marr-bulañgitjdjirriban, a bilapilañmirrpsi marr-bulañgitjnyirbimirrpsi lim djirinjinmiban ɳurrum lim gubini ɳunuñ balinyirin gadjigarr, a lim bariniliban gadjigarr wanji. Bil wari ɳunupilan inkı djina marr-bulañgitjdjyi wurpiwiliki yulpilñirgi, ɳunuñ yul nyani ɳulikirripban, nyi'nyinipmban rummirri balinyirimirri. <sup>15</sup> A ɳunubilan nyuni inga ɳuy-marginidjirri wurpigi yulgi, galkju nyuñun gurrutigininjirgi, girri milbimirri Godan nyuni bilapilañ ɳurrigma miri munin. A nyuni marn̄gi djingirkı gam': wirr munij yul gatjirri Godan birral wanji nyannar, a bilapilan yul inkı nyinidji giri ɳuli nyannar Godan gurrbimirri. <sup>16</sup> Bil ɳili marn̄giban birralgi marr-bulañgitjnyirbigi, gima il nyandinibon nyaliki Djesudji nyanihi litjanydji gunılı, a nilitjar bilamirri nyanihi balinibon. Marrga ɳılıbi wurpi bilan djinanydjl gunban Godan yulpilñirgi, a djannar bilamirri il balidji. <sup>17</sup> A marri nyuni gatjinimi galbi girri mala a wali, a nyuni nyami nyuñun gurrutigininj nyini kirim gumbala, a inkiban nyuni inga gunban nyim ɳunupilan, bil nyuni raymanbidjidjiban. Nunubilan bilapilañ nyuni bintjigima, girri inkiban nyuni gatjirriban Godan birral marr-bulañgitjnyirbi nyunuri. <sup>18</sup> A wurpi, njirra yutjuwila, inkı lidji wanjdji miri bilapilan gam', "Narri djinarr marr-bulañgitjdjirriban wurpiwiliki yulpilñirgi", bilakinj inkiban djinyi lidji gunjatiwi a djina lidji djamadjiw bulançitj. Bil ɳilidjamirrpsi djamamirrpsi djinyi lidji mil-lirrpigi djina lidji marr-bulañgitjdjirriban yirrimi. <sup>19</sup> Nirrañ yutjuwila, ɳunubilan yirrimi ɳili djiny il djagadjigi Godan yulpilñirinyi, girri bilapilanđdi il djirinjilgaban il nyini girimban birralmirri. Marrga ɳunubilan nilitjar gjininyirbili maladji litjny djin mirgi-bultjigi, inkiban butjinydjl gunban ɳilitjañ gjininyirbi malany, girri il ɳuy-laydjigibon ɳunukiñij ɳidjirrgili il giri Godili a il gjinidjiban ɳilitjnyi djuburrnyi. <sup>20</sup> Niy, nyadji ɳunupilan guni il marrnjirrdji, a nilitjar ɳuydji litja bultjigibon, "Nyuni mirrpsi mirkunu yul", bil birralgima wurpiwiliki yulpilñirgi djinal marr-bulañgitjdjirriban. Marriban, nyani God djinin wana mirrpsi, a bukmakgi marn̄gi, niy, nyani marn̄gi ɳunugirkı djanunygi ɳunuñ ɳilitjapibi rumbi. Nunuñ inkiban Godan bimbi litja wanji, inkiban nyani litja bultjirri, miri, mirikunu ɳili, ɳunuñ yarim ɳilitjapibi rumrum'djnyirbi mala litja djin wañban, marrga yarim il marrbigibon, a il ɳuy-laydjigi birbimirri Godar, gima yirrim djiny il dجاجadjiñ girimban nyannar yulpilñirinyi. <sup>21</sup> Marrkapnyakinpila, ɳunubilan ɳilitjar ɳuydji inkiban litja mirgi-bultjirri, girri mil-burrdjini il djirridjibon birbimirri Godar, a ɳidjirrgili bi ingal giribon rumrum'nyirrinban. <sup>22</sup> Girri bubalikinjirgi il butjalmidji nyanninyi, a nyani litja gunban ɳunuñ, gima il bu'butjirgindjirri nyannar yan-gunyirbigi malagi, a il dji'djamadjim ɳunuwili djin galñi-bulañgitjnyirdjigi nyanninyi mala. <sup>23</sup> A djinibon nyannar yan-gunyirbi ɳunuñ nyani Gunydjirrar litja yirrpini. ɳili bilan marr il yirrpigi nyanhali Walkirñjiralim, Djesu Christili, a bilan inydjil marr-bulañgitjdjidi ɳilibinydjl, bilapilan miri nyani litjny yan-gunjili ɳurrwakni. <sup>24</sup> Bubalikinj yul, bilan nyannar Godar yan-gunyirbimirri nyani girim nyini, girri nyani nyi'nyinidjipmban Godar, a God nyanihi nyi'nyinidji nyannar ɳuymirri. A bilapilañmirrpsi il djirinjilgaban nyani God nyi'nyinipm ɳilitjar; nyannari Djuyudji Wugiliri il djirinjilgi ɳunuñ, gima ɳunuñ Wugilinyi nyani litjny gunjiliban Gunydjirrar.

## 4

<sup>1</sup> Marrkapnyakinpila, ɻunubilan wari ɻunupilan lidja bultjigi miri bilapilan gam': "Nirramirrppmi Godaq Wugili nyani wanji", inkibana djayur-rkdjurk lidji marr-birraljakinidjidji ɻunugirki yangi, bidak, manyawi ɻunuŋ wugilinyi ɻurrwaknji, marrga lidji djirinjlgibana bilan ɻunuŋ wugili nyani birral Godniri wan kirimi, gima marri ɻunuŋ waŋ kirimi Mirriñir. Niy, ɻilidji bilan lidji manyanji nyim wugili ɻunuŋ, bintji nyani lidjny gar-yuli marri, gima galbi wiltjnyiwiltjnyirinjabarrkginpili inydjin yulgimban bubalikinimirri djili munatjamirri. <sup>2</sup> Djinimirri lidji djirinjlgii nyim wugili lidja wan kirimi yulmirrppmi: ɻunubilan ɻunuŋ yul lidja wanidji bilapilan gam', "Djesus Christ bapili lidja milarrdjili namnjiri miri yul birral nyani, a gatjidjini birral galni", girri ɻunugima yul lidja wan kirimi Godar Wugiliri. <sup>3</sup> Bil bubalikinijir yuldji wili inkidjimi ɻunuŋ djanjuny Djesubi, nyani inkibana wanji kiriw Godniri, bil wurpijinr wugilinjir wan kirimban. Bilapilanir wugiliri nyani bir-yirrpigi Djesu Christnyi, a nyanjan gulinydjirr wugili nyani, a bubalikinijir yul wari wanidji bilapilajmirrppmi wugilimirrppmi, yagirri nyaninji lim bultjigi 'bir-yirrpinakinin Christgi'. Djinin djanjuny ɻilidji ɻurrum lidji marrnjini, miri, ɻunuŋ 'Bir-yirrpinakinin Christgi' nyani djili malhdjigi munatjamirri nyadji ɻunupilan. A djini'djinin ɻilimi warrpamddji lim nyamban bilapilan wugili nyani ɻurrum limila yulguniliban djili munatjamirri, gima galbidji yulpilniri djin bir-yirrpinmiban Djesu Christnyi djini'djinin djanjar yandji. <sup>4</sup> Bil ɻilidji, ɻirraŋ yutjuwila, djinyi lidji banirinjiliban ɻunuwiliny inydjin yulginyakinpili yulpilnirinyi, gima Godaq yulpili lidji, a Godaq Wugili, ɻunuŋ ɻilidjar nyi'nyinaban, nyani mirrppm ganydjarrginnin, bil ɻunuŋ mirgi wugili wara nyi'nyini munatjabimiri yulpilimirri nyani gatjinmi yarim marri djayal ganydjarr, marrga ɻilidji manbij lidji djirridjiban, bil ɻunitjini munatjabu mala djin djirridjiban bilbalini. <sup>5</sup> Djani yarim munatjabu yulpili, marrga djin wanidji giri munatjabu djanjunypili, marrga wurpiwilinjir munatjabu yulpilinjir djani butjinydjin gunban djanki, a djina djin marr-birraljakinidjidjiban. <sup>6</sup> Ban ɻilimbibi Godaq birral yulpili limi. ɻunubilan wurpi yul nyani birral marn̄gi Godki, ɻunuŋ yul butjinydjin gunban ɻilimiliki. Bil bubalikinijir yul marqginyirri Godki, ɻunugima inkibana limila butjinydjii guni ɻunukinjin inga lim bultjigi ɻunuŋ djanjuny birral Godbi. Bilapilanidji lim djirinjlgii nyim wugili wurpiwilinjir yulpilinjir djin gatjinmi ɻambidi djanjar; nyibili djin gatjinmi Godaq Wugilinyi a djanjamirrppmi ɻuni Wugiliri limila bultjigi djanjuny birral, bil nyibiri djin gatjinmi wugiliny mari-djamadjnyirakinin djanjari, a djanjamirrppmi ɻunuŋ wugili limila wanidji djanjuny wiltjnyirin, a bilapilan yul inkı inga marr-birraljakinidjidji ɻilimila djanjunygi. <sup>7</sup> Marrkapnyakinpila, ɻilimbibi bilan inydi lim marr-bulanjtjdjidji, gima marr-bulanjtjnayirbi djini' Godbi gunyirbi nyannapibi, a ɻunubilan djina lidji marr-bulanjtjdjidji wurpiwiliki yulpilnirgi, girri birralban nyannapibi Godbi lidji bunjtjili marrga lidji yuwirdjiddini, a Godki lidji marn̄gibana. <sup>8</sup> Bil ɻunubilan wari ɻunupilan inkı djina marr-bulanjtjdjidji nyinidji wurpiwiliki, girri ɻunuŋ yul inkı birral marn̄gibana Godki, gima God a marr-bulanjtjnayirbi biliŋ wurpilipmili. <sup>9</sup> A nyani Goddji limiliny mil-lirrpini nyanjan marr-bulanjtjnayirbi ɻilimiliki djinimirri: nyani yanili nyanjan Walkirinjimi bapili munatjali ɻilimiliki, marrga nyanjamirrppmi lim gatjigibana wanji birral. <sup>10</sup> Wiraŋ marr-bulanjtjnayirbi ɻarri inydjirr bultjinmiban? ɻilimila? Inkı. ɻurrwaknji, inkibana inga lim marr-bulanjtjnayiri Godki, bil marriban nyanibi limila marr-bulanjtjdjinipmban. A birral marr-bulanjtjnayirbi nyani

miri bilapilan̄ gam'. Goddji nyani yanili nyanjan̄ Walkiripm bapili, marrga nyani balidji ɳilimilar bilamirri, marrga God dadawdjidjiban nyanjan̄ madakarritjijir ɳilimilar, ɳunukinij lim mirgi-dji'djamadjnyi; bilapilan̄dji Gunydgirrar limiliny mil-lirrpini limila marr-bulan̄gitdjirri.

**11** Marrkapnyakinpila, ɳunubilan̄ miri bindjirr ɳurrgima nyani God limila marr-bulan̄gitdjirri, ɳilimibi girri bilan̄ inydi lim marr-bulan̄gitdjidjiban. **12** Wirr yuldji nyaw giriwi Godnyi nyanjar mildji, inki lim marn̄gidjidji Godki ɳunumirri; bil ɳunubilan̄ ɳilimibi inydi lim marr-bulan̄gitdjidji, girri God nyanjarki nyindjiban ɳilimilar. Bilapilan̄dji lim marn̄gidjidjiban nyanjan̄ marr-bulan̄gitjnyirakinin̄jrgi rumgi, a nyanjan̄ marr-bulan̄gitjnyirbi manbidjidi ɳilimilar durkdurkmirri. **13** Miri bintji lim djiřin̄lgi lim nyini girimban Godar, a nyani nyini girimban ɳilimilar, gam': nyani Gunydgirrar yirrpini nyanjan̄ Wugilinyi ɳilimili durkdurkili. **14** A ɳinibilar mildji nibi nyanjin̄ Garray Djesuny, a lidja nibi bultjin̄miban djinin̄ djaquny birral, miri, Gunydgirrar munatjali yanili Walkirin̄imi, marrga ɳuni limiliny wan̄jirgiban bukmaknyi ɳilimiliny munatjabi yulpiln̄irinyi; miri bilapilan̄ Djesun djama djili munatjamirri ɳilimilik. **15** A bubalikiniñ yul wili inydi bultjigi Djesubi miri bintji gam': "Nyani djinin̄ Godan̄ Walkirin̄imi", girri ɳunuñ yul nyi'nyinaban Godar, a nyani God nyi'nyinaban nyanjar girri. **16** Bilapilan̄dji lim djiřin̄lgi ban ɳunuñ marr-bulan̄gitjnyirbi Gunydgirrgiraj - ɳunuñ nyani gatjinmi ɳilimilik, ɳilimi lim djiřin̄miban ɳunugirki marr-bulan̄gitjnyirbigi, a lim marr-birraln̄akinidjirri nyani birral limila marr-bulan̄gitdjirri. God a marr-bulan̄gitjnyirbi wurpilpmili bili, marrga ɳunubilan̄ marr-bulan̄gitjnyirbirri rummirri lim nyini girimban, girri nyanjari lim nyini girimi Godar nyanjarki, a nyani nyini girimi ɳilimilar. **17** Djinimirri ɳilimilan̄ marr-bulan̄gitjnyirbi nyani wanadjidji a manbidjidji, marrga guyumpiligi, ɳunukinij nammirri lim djirridji birbimirri Godar, inkibana inga lim rumrum'djigiban a inga lim yawnjidjiban; gima Djesu nyanibi inki inga yawnyi Gunydgirrgirki, a bilakiniñ djiniban lim nyini kirim munatjamirri ɳilimi djinin̄ yarim bilapilan̄ miri Djesu, miri, lim gatjimi birral marr-bulan̄gitjnyirbi yulpiln̄irgi, a Gunydgirrgirki. **18** ɳunubilan̄ Godki inga lim marr-bulan̄gitdjirri, inkibana inga lim rumrum'djigiban, gima bilan̄ mirrpni lim marr-bulan̄gitdjidji, girri ɳilimilan̄ yawnjinyirbi nyani manydjidjiban. Bil ɳunubilan̄ inga lim yawnj, girri lim giñ kirimban marri Goddji limiliny yati-dapilidjigi. A ɳunubilan̄ miri bindjirr ɳurrgima lim giñ, girri ɳilimilan̄ marr-bulan̄gitjnyirbi inga inkipmban wanadjnyirban. **19** A ɳilimi inga lim marr-bulan̄gitdjirrbani gima nyani ɳurrwakn̄ limila marr-bulan̄gitdjini. Miri, nyani limila marr-bulan̄gitdjini ɳurrwagi, a ɳunujirr girri lim marn̄gidjini inga lim marr-bulan̄gitdjidji. **20** Bil wari ɳunupilan̄ bindjirr wañi gam', "Narri ingarr marr-bulan̄gitdjirri Godki", a ɳunuñ nyani wañi bilakiniñ inga ɳuy-marginidjirrpom wurpigi yulgi, girri ɳunuñ yul inydi yulgimban. Gima, ɳunubilan̄ inki nyani inga marr-bulan̄gitdjiiy wurpigi yulgi wiriny nyami nyanjar mildji, nyalikiban nyani inga marr-bulan̄gitdjirriban Godki Gunydgirrgirki, wirinyi inki nyaw giriwi? **21** A gurrkunyi, djinin̄ yan-gunyirbi Djesudji limiliny gunili miri bilapilan̄ gam': bubalikiniñ yul wari Godki inga marr-bulan̄gitdjirri, nyani bilan̄ djina marr-bulan̄gitdjidji wurpiwiliki yulpiln̄irgi girri; bilapilan̄ nyani Djesu limila bultjidjini.

## 5

**1** Bubalikiniñ yul wari marr-birraln̄akinidjirri miri bindjirr gam', nyani Djesu djinin̄ Godan̄ Yirryirrpinakinin̄ yul, miri, nyanjan̄ Christ, girri

ŋunuŋ yul nyani birral Godaŋ yidjipili. A ŋilimi bukmak lim marnŋi bilan̄ yulgi inga lim marr-bulanŋitdjirri a ŋunuŋ yul nyani gunydgirrinjimi yidjipiligi, girri inga lim marr-bulanŋitdjidji nyanganj yidjipiligi gurrkunyi. Marrga, ŋunubilan̄ ŋilimibi inga lim marr-bulanŋitdjirrban Godki, girri djina lim marr-bulanŋitdjidjiban warrpamgi ŋunuwiliki yulpilŋirgi wirapili inga djin marr-bulanŋitdjirri Godki, gima djani girri nyanganj yutjuwiliban. <sup>2</sup> Bil nyalikidjidi lim djirinjlgi yirrimi djina lim marr-bulanŋitdjirrban yutjuwiliki Godaŋ? Djinimirriban lim djirinjlgi gam': Godki inga lim marr-bulanŋitdjirri, a lim butjirgindjirri nyanganj yangi. <sup>3</sup> Niy, bilapilandji inga lim marr-bulanŋitdjidji Godki, miri, butjinydji lim gunj nyanganj yangi, ŋunuŋ nyani limiliny gunjili, a ŋunun lim marrgi a lim butjirgindjidji. A nyanganj yan iŋki bir-manbın limila, <sup>4</sup> gima ŋurrumban lim yuwirdjindjinan ganydgirrđi Godar. Niy, bupalikinj yul warı buntjili Godbi nyani manbidjidji, marrga dimbitjnyirdjig nyim mirgi mala djingirapibi munatjabi. A nyalikidjidi lim manbidjidji bilapilan̄ miri ŋunuŋi? Nunukinj marr inydi lim yirrpigi nyanganjali, Djesuli, bilapilandji djinyi lim banjirigi munatjabi yulpilŋirinyi - ŋunuwilinjir wirapilŋir djin iŋki-bultjimmi Godaŋ gadjigirrgi. <sup>5</sup> Niy, ŋunubilan̄ nyuni marrbirralŋakinidjidji nyani Djesu djiniŋi birral Walkirinjimi Godaŋ, nyuniban bilapilan̄ yul wili djiny dimbitjnyirdjim kirim mirikunu yulpilŋirinyi a djanganj mirikunu rumnyi. <sup>6</sup> Djesus Christ bi girali munatjali, a gapimirrpmi a budimirrpmi nyani limiliny mil-lirrpinan nyani Goddji Gunydgirrar bapili yanili nyanyinyi. Miri, gapimirrpmi nyani Djesu bi limila girali, gima gungi-yigilinjili gapili; a budimirrpmi limiliny gunyatjili, gima nyani budı djl̄ndjili nyanganj galnjinjir ŋunukinj gurrtjimirri nyani wirardjinjini a balini, bilapilan̄. İnkibar nyani gungi-yigilinjili a girrban, bil ŋunuŋiŋ girri nyani budiri limila djl̄ndjili, marrga lim marrgiban wanji birral. A Godaŋ Wugili, ŋunuŋ nyi'nyinib ŋilimilar, nyani limila bultjinmi djiniŋ, miri, djanjuny djininj birral, gima Djuyu Wugiliri yarim limila bultjigi birral, iŋki limilandyi yuli giri. <sup>7</sup> Niy, ŋunuwilinjir warrŋuwilidji maladji nyani Goddji limiliny mil-djunupadjili Djesuli, <sup>8</sup> miri, Djuyudji Wugiliri, a gapidji, a budiri; a djiniwili warrŋuwili mala djin ytjjidjirri, yarim wurpm ŋurrigma djanjuny limila djin bultjinmi, miri, Djesu djiniŋ Godaŋ Walkirinjimi. <sup>9</sup> Nunubilan̄ butjinydji lim gunj a djina lim marr-birralŋakinidjidji ŋunukinj yulpilŋir limila djin bultjigi nyim ŋunuŋilan̄ birraldjini, girri bilan̄ butjir inganydji lim gunjban Godki grrigma a yirrimi lim marr-birralŋakinidjidji ŋunugirki djanjunygi nyantija limila bultjigi; gima yulpili inydiŋ yuli bilan̄, bil nyani God wirr. Niy, nyani God limila bultjidjini ŋunuŋ birral djanjuny nyanganjapibi Walkiribi, a djinibar ŋunuŋ djanjuny nyani limila bultjidjini: <sup>10-11</sup> "Narı, Goddji Gunydgirrñirim, ŋilidjarr gunjban birral wanji, marrga inkibar lidji balidji, bil yarim lidji nyindjipm bintji kiri ŋurrigma, a ŋunuŋ wanji lidji marrgiban ŋirramirrpmi Walkirimirrpmi," miri bindjin limila wanjini nyani. A ŋunubilan̄ nyuni inga marr-baltjigibar Djesugi, a nyuni marr-yirrimkinidjidji nyani djiniŋ Godaŋ Walkirinjimi, girri nyuni djirinjlgban Goddji inma bultjidjini djanjuny birral Djesubi. Bil ŋunubilan̄ iŋki nyuni inga marr-birralŋakinidjidji Godki, girri Godnyi nyuni bultjinmiban yagirri miri "yulginyakinj", gima inkibar nyuni marr-birralŋakinidjinyir ŋunugirki djanjunygi ŋunuŋ nyani Goddji Gunydgirrar inma bultjidjini nyanganjapibi Walkiribi, bilapilan̄. <sup>12</sup> Niy, Djesudji Godaŋ Walkirinjirim gatjinmi birral wanji ŋilimili, marrga ŋunubilan̄ nyuni marrŋili Djesuny, girri ŋunuŋ wanji nyuni ŋurrum marrŋiliban nyanganjapibi. Bil ŋunubilan̄ wili ŋunuŋilan̄ iŋki marrnayir girinyir Godaŋ Walkirinjim,

girri ɳunuŋ yul nyani badatj marrgi ɳunugiriny wanni. <sup>13</sup> Djiniwiliny djanjunypili ɳarri lidjarr wukirridjili, miri, ɳilidjiki wirapili inga lidji marrbirralŋakinidjini Djesugi a lidji marrŋili nyaninyi, irr wukirridjili marrga ɳilidji lidji marrŋibān ɳurrum lidji marrŋiliban wanni birralban, a lidji nyinidji giriban bintji kiri ɳurrgima. <sup>14</sup> A miri bilapilan ɳurrgima ɳilimi inga lim marr-baltjigi Godki gam': ɳunukinij nyaninyi lim butjalmidji nyimki ɳunupilanŋirgi, a nyani djalndjirri lim gatjigi ɳunuŋ, girri nyani limiliny marrŋirrdji butjalminyibi. <sup>15</sup> A ɳunubilan lim djirinjlgi nyani limiliny marrŋirriban ɳunukinij lim butjalmidji ɳunugirki, girri lim marrŋibān nyani yirrimban limiliny guŋban nyim ɳunupilan lim butjalmini nyaninyi. <sup>16</sup> Miri galkŋu, ɳunupilan nyuni nyani yulnyi, a nyani djamadjim kirim nyim ɳunupilan mirikunu, a ɳunuŋ mirgi ink'i wana, bil yarim nininipm, a ɳunuŋ yul nyani Garry Djesuginin, manymak, nyuni bilan inga bumirgindjidi ɳunugirki yulgi djuburr-mirikunugi. Girri nyani Godđi djuy-bultjigiban nyaniny, a wanŋirgibān nyaninyi, gima ɳunuŋ mirgi ink'i wanaban, a ɳunuŋ yul ink'i burr-birrindjininir Godnjir rumnjir. Bil wurpiwili yulpili djani djin burr-birrindjininmi muŋuy Godnjiri, a mrrpm wana mirikunu mala djin djamadjim girimban, a ɳuni mirgili nyani buŋban Godaŋ birral wanŋi djanŋari. ɳunubilan nyuni nyani bilapilan yulŋirinyi a nyani mirgi-djamadjim kirim miri bindjirr ɳurrgima, ink'ikan nyuni bumirgindjidi Garryayili ɳunugirki yulgi, gima ink'i nyani Garrydji wanŋi-guŋi ɳunuŋ yulŋiriny, bilaŋ nyani burr-birrindjinini Godnjir djunupanir gadjigarrnjir. <sup>17</sup> Miri, bubalikinij mirgi lim djamadjigi, milbimirri Godar lim murgum kirim; nyibi mirgipili djani mrrpm mirikunu, bil wurpiwili mirgipili djani yarim marri mirikunu, a ɳunuwiliti nininipili mirgipili ink'i djin malimdjigi ɳunuŋ wanŋi lim marrŋili Godnjiri. <sup>18</sup> A ɳilimi lim bindjirri lim marrŋi gam': ɳunubilan Godaŋ yutjuwili limi, girri ink'ikan lim mirgi-dji'djamadjigiban muŋuy, a Djesudji, wari buŋtjili Godbi, nyani limiliny djagadjigiban, a ɳuni mirikunu wugiliri Satandji ink'i nyani limiliny djatdjigiban, gima Godaŋ Walkirinirim watjarrdjjigiban nyaninyi. <sup>19</sup> A wurpigi lim marrŋibān miri bilapilan gam': ɳilimi birral Godaŋ yutjuwili limi, a nyanyar gumbirrmirri lim nyini girimban; bil ɳunuwiliti wurpiwili, miri bukmak ɳunuwili munatjabi yulpili, ɳuni mirikunudji wugiliri nyani djiny gatjinmiban nyanyar gumbirrmirri. <sup>20</sup> A wurpigi lim marrŋibān miri bilapilan gam': Godaŋ Walkirinim nyani milarrdjili bapili munatjali, a nyani limiliny marrŋi-gupirrgunili, marrga inga lim marrŋibān, a nyanyi lim djirinjlgi, miri, nyangima djiniŋ wurpm birral Miligidji. A ɳilimi lim nyini girimban nyanyar, nyi birral, Godar Walkirinirar, Djesu Christar lim nyinibān. A djiniŋ yul Djesu, nyani djiniŋ birral Miligidji, a nyanyari lim nyinidji giriban bintji ɳurrum a bintji ɳurrum. <sup>21</sup> Nirraŋ yutjuwili, ink'i djina lidji marr-baltjigi madayinpilŋirgi djingirapibi munatjabi, galkŋu miri ɳunuwili madayin mala djani munatjabi yulpiliŋir djin djamadjigi djanŋar gumbirrdjii, yarim djinyi lidji gubidjibān, a inydji lidji mirrbiliban ɳunuwiliŋir madayinŋir malaŋir.